

Bedichia' nze'ca' Jesucristo nú uquie'e San Mateo

Bee bene' Jesucristo enu udetela
(Lc. 3:23-38)

1 Ca'a nze'ta nú lee bee bene'
Jesucristo enu udetela, li'inu
enu nze'ta lu familia' arre David nu
Abraham.

2 Abraham unga pa' Isaac,
nu Isaac unga pa' Jacob,
nu Jacob unga pa' Judá nu bee
bichilla.

3 Nu Judá cuna una'lla Tamar,
ulu'cu beella endu' beella enu
lee Fares nu Zara.
Fares unga pa' Esrom,
nu Esrom unga pa' Aram.

4 Aram unga pa' Aminadab,
nu Aminadab unga pa' Naasón,
nu Naasón unga pa' Salmón.

5 Salmón unga pa' Booz,
nu na'llla lee Rahab.
Booz cuna una'lla Rut ulu'cu
beella endu' beella enu lee
Obed.

Nu Obed unga pa' Isaí.

6 Isaí unga pa' arre David,
nu arre David cuna bene enu
unga una'a Urías, ulu'cu
beella tucu endu' enu lee
Salomón.

7 Nu Salomón unga pa' Roboam,
Roboam unga pa' Abías,
nu Abías unga pa' Asá.

8 Asá unga pa' Josafat
nu Josafat unga pa' Joram
nu Joram unga pa' Uzías.

9 Uzías unga pa' Jotam,
Jotam unga pa' Acaz.
Acaz unga pa' Ezequías.

10 Ezequías unga pa' Manasés,
Manasés unga pa' Amón,
nu Amón unga pa' Josías.

11 Nu Josías unga pa' Jeconías
cuna bee bichilla, tiembu cua'
neca chenu uri'i bee bene
Babilonia preso bee bene
Israel.

12 Luze'elá chenu uri'i bee bene
Babilonia preso li'ibeella,
che ulu'cu Jeconías tucu endu'
enu lee Salatiel,
nu che Salatiel unga pa'
Zorobabel.

13 Zorobabel unga pa' Abiud,
nu Abiud unga pa' Eliaquim,
Eliaquim unga pa' Azor.

14 Azor unga pa' Sadoc,
nu Sadoc unga pa' Aquim,
Aquim unga pa' Eliud.

15 Eliud unga pa' Eleazar,

nu Eleazar unga pa' Matán,
Matán unga pa' Jacob.

16 Jacob unga pa' José enu unga
niyu' María.

Nu María neca na' Jesuse nu
le'ca leenu Cristo.

17 Scua unga desde tiembu nú
uhuañi Abraham hasta tiembu nú
uhuañi arre David, uhuañi rtaa
generación bene, nu le'ca rtaa
generación bene uhuañi desde
tiembu' arre David hasta chenu uri'i
bee bene Babilonia preso bee bene
Israel. Nu le'ca rtaa generación
bene uhuañi desde nú uri'i bee
bene Babilonia preso bee bene
Israel hasta chenu uriña bichia nú
ungula Jesucristo lu iliulabe.

Chenu ungula Jesucristo

(Lc. 2:1-7)

18 Singue unga chenu ungula
Jesucristo: María na'nú nzula
nú yuculla José, pero ante nú
yucusa'beella, nu'lá endu' xla'cu
María equie poder' Espíritu Santo.
19 Nu lunú neca José bene nze'ca lá
niarqui'lla nilla nú xi seca María
a'la uri'illa elliebacu' nú tsa'nalla
María a'chi'tsia. **20** Pero diquila
nú rri'illa elliebacu' nucua', che
ulube'lú tucu ángele' Diose lulla
leta xcala'lla, nu uni ángele ze'e
lulla:

—José, li'ilu enu nze'ta lu familia'
arre David, la lliquili nú yuculu
María xne endu' enu acanuulla
equie cuenda' Espíritu Santo
acanuullanu. **21** Nu endu' enu
acanuulla hualeelunu Jesuse. Xne
equie cuenda'nu tsila'a ye bee bene
lachinu Israel lu stula beella.

22 Ye bee nucua' unga para nú
yalu Stichia' Diose tucu nú uni tucu
bee profeta'nú chenu unilla:

23 Tucu una'a e'ne chu'u endu'
xla'cu nu

chenu ala endu'lla, chiu'uleenu
Emanuel,

bedichia' cua' rni: Diose nzu cuna
lia'ahua.

24 Chenu uhuañi José, che uri'illa
tucu nú unibiya' ángelé' Diose lulla
nú ri'illa, nu uyuculla María. **25** Pero
né na'tsellá Marfa hasta nú ungula
endu' María, nu ulualee José
endu'cua' Jesuse.

Uyabi'ya bee mago Jesuse

2 **2** Ungula Jesuse Belén, tucu
eyeche nú nchiucu' lu iliu
Judea, tiembu nú unibiya' arre
Herodes. Nu uriña bee bene enu
reca elliebacu' Jerusalén, nze'ta
beella enza rliñi bichia Jerusalén
nu neca beella magos, **2** che
unidichia' beella:

—¿Cá nchiucu' arre' bee bene
Israel enu ungula? Xne desde
lachiru ulañi'la'ru nú uliñi bela'nu,
enze'e nzelaru para nú lu'curu
ula'na lunu.

3 Chenu ubene' arre Herodes
nú unibeella scua, chiqui' nzenu
arqui'lla, cuna ye bee bene
Jerusalén. **4** Che ubixia arre Herodes
ye bee ule'ya enu rnibya', cuna bee
ulaxcuela enu reca ley nú udete'
Diose lu Moisés para nú nedichia'lla
lubeella cá riala nú ala Cristo. **5** Che
uni beella lulla:

—Eyeche Belén nú nchiucu' lu iliu
Judea alanu, xne scua uni profeta
chenu unilla:

6 Li'ilu eyeche Belén nú nchiucu'
 lu iliu Judea,
 nu li'ilu la necalu tucu bee
 eyeche nú mase lle'na
 nú nchiucu' lu ye bee eyeche
 llene lu iliu Judea.
 Xne lulu chiu'u tucu bene enu
 nibiya',
 nu li'illa bi'yalla bee bene Israel
 enu neca bee benea.

7 Che chu ubixia a'chi arre Herodes
 bee mago cua' para nú unedichia'lла
 lubeella nú xunga itáa ulube'lу belaa
 ze'e lubeella. **8** Nu uxelalla li'i beella
 Belén, nú unilla lubeella:
 —Uquiahuza ze'e, nu ri'i itáahua
 beya' nú xa neca lu cuenda' endu'
 ze'e. Nu chenu ullela'la'huanu, ye'ta
 tixiule'ehua lua para nú le'ca nua
 nza'a nze detea ula'na lunu.

9 Chenu ulaxu nú uni arre Herodes
 scua lubeella, chu nzuebeella. Nu
 belaa enu ulañi' beella nú uliñi
 desde nú nucua'asca' beella lachi
 beella nzuculu lubeella, nu utsuxe
 belaa cua' hasta elu nchiucu' endu'
 ze'e. **10** Chenu ulañi' bee mago
 belaa cua' ze'e, chiqui' nia utsu
 arqui'beella, **11** nu chenu uyu'u beella
 liñi ni'i ze'e, ulañi' beella endu' cuna
 na'nú María, che utsulliqui beella
 lunu nu ulu'cu beella ula'na lu endu'
 ze'e. Chu uxal'a beella ru'u bee caja
 nú nuya' beella nu lia udete' beella
 oro, cuna quiendixi, cuna mirra
 lu endu' me' ze'e. **12** Che udixiule'
 Diose lu xcala' beella nula benchila'
 beella lu Herodes, nu né benchila'
 beella enza enta beella.

Nzenu José cuna María Jesuse Egipto

13 Chenu nziala bee mago ze'e
 lachi beella, che ulube'lу tucu

ángèle' Diose lu xcala' José, nu uni
 ángèle ze'e lulla:

—Uzete, uya' endu' cua' cuna
 na'nú nu uquiahuza Egipto, ze'e
 cua'ahua hasta nú ixiole'a luhua.
 Xne cua'na Herodes endu'cua' para
 nú utilia li'inu.

14 Che chu uzete José, nu
 unguya'lла endu' cuna na'nú, nu
 rula' ze'e uchiu'u beella nziue
 beella enza Egipto. **15** Ze'e ucua'a
 beella hasta nú unguti arre Herodes.
 Scua unga para nú uyalu Stichia'
 Diose tucu nú uninu lu tucu profeta
 chenu uninu: "Ubixia endua enza
 Egipto."

Unibiya' arre Herodes nú ati ye bee endu' me'e

16 Chenu uri'i Herodes beya' nú
 uezequieno bee mago ze'e li'illa,
 chiqui' ulella, nu unibiya'lла nú
 unguti ye bee endu' enu nza chiucu
 lana hasta enu me'e enu nucua'a
 Belén cuna bee eyeche abenchila'
 ze'e, xne nuya' cuendalla lunú uni
 bee mago ze'e lulla nu udetela
 chiucu lana nú ulube'lу belaa
 ze'e. **17** Scua uyalu tucu nú uquie'e
 profeta Jeremías chenu unilla:

18 Uyene tucu chii eyeche Ramá,
 nú runa' nu rixiali.
 Nu Raquel neca enu runa' cua'
 equie cuenda' bee endu'nchu,
 nu lecati enu ri'i ana tsala
 arqui'nchu xne ungutila bee
 endu'nchu.

19 Pero chenu unguti arre Herodes,
 che ulube'lу tucu ángèle' Diose lu
 José elu nucua'a beella Egipto nu
 uni ángèle ze'e lulla:

20 —Uzete, uya' endu' cuna na'nú,
 nu ubenchila' zecahua Israel xne

ungutila bee enu niarqui' nú uti
endu' quie'.

²¹Che chu uzetee José nu
unguya'lla endu' cua' cuna na'nu
nu ubenchila' beella eyeche Israel.
²²Pero chenu ungabiya' José nú
Arquelao lliana' arre Herodes neca
enu rnibiya' lu iliu Judea, ulliquilla
nú challa enza ze'e. Pero chenu
ungabiya'lla lu xcala'lla nú la challa
enza Judea, che nzuella enza lu iliu
Galilea. ²³Chenu uriña beella lu iliu
Galilea, ucua'a beella tucu eyeche
nú lee Nazaret. Scua unga para nú
uyalu tucu nú uni bee profeta nú
Jesuse chiulee bene Nazaret.

Udixiule'e Juan Bautista Stichia' Diose lubeen bene

(Mr. 1:1-8; Lc. 3:1-9, 15-17; Jn. 1:19-28)

3 Tiembu ze'e uyanzee Juan
Bautista lu dañi achi lu iliu
Judea udixiule'ella Stichia' Diose
lubeen bene. ²Nu unilla:

—Utsana' arqui'hua stulahua xne
nze'ta riñala nú rnibiya' Diose.

³Equie cuenda' Juan Bautista
quie', uquie'e profeta Isaías chenu
unilla:

Uyene chi tucu enu juerte rixiali
lu dañi achi elu la nucua'a
bee bene nú rni:

“Utsu tsínhua arqui'hua xne
nze'tala li'inu enu neca
Diose'ahua,
utsana' arqui'hua stulahua
para nú yucu arqui'hua
stichia'nu.”

⁴Xucu Juan necache'e ichia
tsu' camello, nu sinchiu nú riu'u
xla'culla necache' iti, nu elubacu
nú udaculla neca xe'chiu cuna lliña
dañi. ⁵Nu bee bene Jerusalén cuna

ye bee bene lu iliu Judea nu cuna
bee bene enu nucua'a axu re'cu
Jordán uchiu'u beella, uya beella
ubene' beella nú rni Juan. ⁶Cheque
chenu uxucu' dula beella stula
beella, urinza Juan li'ibeella re'cu
Jordán.

⁷Pero chenu ulañi' Juan nú huaxi
bee fariseo cuna saduceo uriña lulla
para nú rinzalla bee, che unilla lubeen:

—iLi'isihua netsínhua xi netsíña bee
be'lá? ¿Ti udixiule'e luhua nú tsila'ahua
lu castiya juerte nú axula nzu zeca
bee bene? ⁸Uhuañi nze'cahua para
nú aca chee nú neli utsana' arqui'hua
stulahua, ⁹nula aca nelliñhua nú
rnihua: “L'iru nzelaru lu familia' tuxie
Abraham”, xne li'á nia luhua nú hasta
bee quiee quie' nu' modo nú ri'i Diose
nú aca bee familia' tuxie Abraham.

¹⁰Nu bee bene enu la zucu' Stichia'
Diose tucu nú rialane, li'inu ri'inu
lubeella tucu nú rri'inu bee bene aca
nú la ayua' ndixilu, xiecu' benene para
nú chiquine. ¹¹Li'á, rniah luhua nú li'á
rrinzahua cuna inza xineca tucu seña
nú utsana' arqui'lahua stulahua, pero
enu nze'ta lulá li'inu rinzanu li'ihua
cuna Espíritu Santo nu cuna quii.

Li'inu maselá rlu'cunu poder luquela
li'á, enze'e ni' nú hua lucunu la yala
xne masela neca equieno luquela li'á.

¹²Nu tucu nú rcuui bene trigo scua
ri'inu Diose bee bene. Nu bee bene
enu sana' arqui' stula huañi bee nze'e
elurnibiya' Diose, nu bee bene enu la
tsana' arqui' stula necala nú cha bee
lu quii nú leca xunga yala.

Urinza Juan Bautista Jesuse

(Mr. 1:9-11; Lc. 3:21-22)

¹³Che uchiu'u Jesuse Galilea para
nú nzanu lu Juán re'cu Jordán, para

nú rinzalla li'inu. ¹⁴Pero chenu uriñanu lu Juan lá zela Juan arinza li'inu, nu unilla lunu:

—Li'ilu riala rinzalu li'á, ¿nu li'á la yala rinza li'ilu?

¹⁵Chequeie uni Jesuse lulla:

—Uzela nú acane scua, xne mase neca nze'ca nú ria'a ye tucu nú rnibya' Diose.

Chee uzela Juan urinza li'inu.

¹⁶Chenu ulaxu nú urinzalla Jesuse, nu uchiu'unu lu inza, tu'natsia uya'la liñibe, nu ulañi'nu nú nze'ta laca Espíritu Santo' Diose xi naa tucu paloma equienu. ¹⁷Nu ubene tucu chii enu uni hasta liñibe:

—Li'inu necanu lli'ñia enu chiqui'se'caa, nu ñia nzu arquia lu.

Chenu uri'i beze'lu preu Jesuse

(Mr. 1:12-13; Lc. 4:1-13)

4 Luze'elá unguya' Espíritu Santo Jesuse lu dañi achi elu la nucua'a bee bene para nú ri'i beze'lu preu li'inu.

²Ze'e uya'na Jesuse chiu'a bichia nu chiu'a rula' nu lecalí xi udacunu nu che ulia'na'nu. ³Chequeie uya beze'lu lunu para nú ri'i preu li'inu nu uni lunu:

—Tunu neli nú necalu lli'ñi Diose, unibya' nú aca bee quiee quie' pá aculu.

⁴Pero ucuaqui Jesuse lu beze'lu:

—Lu ichi' Stichia' Diose rni: "La neca equie cuenda'tsia pá nehuañi bee bene, sino que le'ca nehuañi bee bene lu cuenda' ye bedichia' nú rni Diose."

⁵Che chu uyanu beze'lu li'inu eyeche Jerusalén nu uquienui li'inu equie indu llene Jerusalén elu mase aya, ⁶nu uni lunu:

—Tunu neli nú necalu lli'ñi Diose, utsi'qui li'ilu ca'a hasta lu yuu, xne lu ichi' Stichia' Diose rni:

Xe'la Diose bee ángele'nu para nú ri'i ucu li'ilu.

Nu na'tse beenu li'ilu para nú la ti'qui bee quiee cuchiu'lú.

⁷Che ucuaqui Jesuse lu beze'lu:

—Le'ca rni lu ichi' Stichia' Diose: "La ri'ilu preu Diose Pa liñibe."

⁸Nu le'ca uyanu beze'lu li'inu equie tucu dañi elu aya, nu ze'e ulube'i lunu nzie' bee eyeche nú nu' lu iliulabe cuna bee eluxene nú nu' lubee, ⁹nu uni lunu:

—Li'á liquia ye bee nucua'a lulu, tunu tsulliquilu lua nu lu'culu ula'na lua.

¹⁰Nu uni Jesuse lui:

—Uquia beze'lu, xne lu ichi' Stichia' Diose rni: "Ulu'cu ula'na lu Diose'lu Pa liñibe, nu lu li'itsianu riala nú zibi'lu."

¹¹Chequeie utsa'na beze'lu li'inu, nu uríña bee ángele' Diose urí'i elietsa lunu.

Chenu uquixie Jesuse uzete'nu

Stichia' Diose lubee bene

(Mr. 1:14-15; Lc. 4:14-15)

¹²Chenu ungabiya' Jesuse nú nchiífi Juan Bautista ni'cu', che chu nzazecanu lu iliu Galilea. ¹³Pero né ya'nanu Nazaret, sino que uyanu uzucunu eyeche Capernaum, tucu eyeche nú nchiucu' ru'u inzatu' Galilea enza lu iliu nú lee Zabulón nu Neftalí.

¹⁴Scua ungae para nú uyalu tucu nú uquie' profeta Isaías chenu unilla:

¹⁵Bee bene lu iliu Zabulón nu bee bene lu iliu Neftalí, nu bee bene enu nucua'a lu iliu nú nchiucu' axu re'cu Jordán,

cuna ye beelá bee bene enu
nucua'a axu ru'u inzatu' lu
iliu Galilea elu nucua'a bee
bene enu laca bee bene
Israel.

16 Ye beella uhuañi beella tucu
nú nehuañi bee bene enu
nucua'a leta rula',
pero nee ulube'lula tucu ellie'e
lubeella,
nu ellie'e cua' udu'llie'e lu
elliebacu' beella,
li'ibeella enu lecaxi utsuquie nú
xi liqui' Diose lubeella.

17 Desde che uquixie uzete' Jesuse
Stichia' Diose bee bene nu uninu
lubeella:

—Tsana' arqui'hua stulahua xne
nze'ta riñala elurnibiya' nú rlu'cu
Diose.

Ubixia Jesuse tacu bee bene enu rucu bela

(Mr. 1:16-20; Lc. 5:1-11)

18 Chenu nzedete Jesuse ru'u
inzatu' Galilea, che ulañi'nu Simón,
enu le'ca lee Pedro, cuna bichilla
Andrés, nú rdu'beella ixiu nú rucu
beella bee bela lu inza. **19** Nu uni
Jesuse lubeella:

—Te quiehua li'á para nú zeteahua
xa quiete'sa'hua bee bene para nú
aca beella bee benea luguare nú
rucuhua bee bela.

20 Hora ze'e utsa'na beella ixiu nú
rucu beella bela nu chu nzuebeella
cuna li'inu. **21** Enza luze'elá ulañi'nu
xiucu bee bene, Jacobo nu cuna
bichilla Juan, Iliana' bene enu lee
Zebledo. Nucua'a beella liñi barco
cuna pa' beella, rquiela' beella
ixiu nú rucu beella bee bela. Nu
ubixia Jesuse beella, **22** nu hora ze'e

chu utsa'na beella barco ze'e cuna
sa'beella, nu chu nzequie beella
li'inu.

Uzete' Jesuse huaxi bee bene

(Lc. 6:17-19)

23 Uya Jesuse ye lubee eyeche
lu iliu Galilea, nu cada tucu bee
eyeche uyu'unu liñi bee indu
uzete'nu bee bene Stichia' Diose, nu
uninu lubeella xa neca elurnibiya'
nú rlu'cu Diose nu uriyecanu bee
bene luye clasia' elichia nú seca
beella. **24** Ungabiya' ye bee bene
lu iliu Siria lunú uri'i Jesuse, che
ube'tayu bee bene ze'e bee bene
enu seca huaxi clasia' bee elichia
lunu, le'ca ube'tayu beella bee bene
enu si' nú rcu cuerpo', cuna bee
bene enu seca ichia' benechiqui',
cuna bee bene enu seca ichia ziña
cuna bee bene enu la acalí tsee nu
uriyeca Jesuse ye bee bene cua'.

25 Huaxi bee bene enu nucua'a
lu iliu Galilea, cuna bee bene enu
nze'ta enza lubee eyeche Decápolis,
cuna bee bene Jerusalén cuna bee
bene enu nucua'a lu iliu Judea nu
bee bene enu nucua'a stucu chú
re'cu Jordán, uyaquie li'inu.

Uzete' Jesuse bee bene Stichia' Diose equie tucu dañi

5 Chenu ulañi' Jesuse ye bee
bene cua', uquieno equie
tucu dañi nu uzucunu ze'e. Che
uyetesa' bee bene'nu lunu ze'e, **2** nu
uquixieno uzete'nu li'ibeella nú
uninu lubeella:

Ta bee bene enu ñia nzu arqui'

3 —Ñia neca lu cuenda' bee bene
enu rri'i beya' nú chiqui' rqui'ñialla

elietsa' Diose, xne cua'a beella liñibe elu rnibiy'a'nu.

4'Ñia neca lu cuenda' bee bene enu nehuana nzu arqui', xne ri'i Diose nú ñia tsu arqui'beella.

5'Ñia neca lu cuenda' bee bene enu lle'na arqui', xne yucu beella yuu nú uni Diose nú dete'nu lubeella.

6'Ñia neca lu cuenda' bee bene enu neca xi neca nú rlia'na' nu rebichi', scua nu' ana arqui'beella ri'ibeella tucu nú rnibiy'a' Diose, xne li'nu ri'nu elietsa lubeella para nú ri'ibeella tucu nú niarqui'nu.

7'Ñia neca lu cuenda' bee bene enu rua'a arqui' bee bene, xne le'ca hua'a arqui' Diose li'ibeella.

8'Ñia neca lu cuenda' bee bene enu lecaxi naa lu Diose, xne li'ibeella neca beella enu lañi' li'nu.

9'Ñia neca lu cuenda' bee bene enu rcua'na nú nzuxe arqui' lusa', xne li'ibeella chiu'uleebella lliñi' Diose.

10'Ñia neca lu cuenda' bee bene enu nehuana seca luye nú rri'nu bee bene li'ibeella equie nú rri'i beella tucu nú rnibiy'a' Diose, xne li'ibeella chu'u beella liñibe elu rnibiy'a'nu.

11'Ñia neca lu cuenda'hua chenu riquichi'qui' bee bene li'ihua, nu chenu xitserri'nu bee bene li'ihua nu chenu rta' bee bene yelu clasia' bee eluquichia' li'ihua, equie nú necahua bee benea. **12**'Ñia utsu arqui'hua nu ullila'hua, xne chiqui' ñia neca nú lia liqui' Diose luhua liñibe, nu li'ihua nediya'hua nú le'ca scua uri'i condra beella bee profeta enu udetela enu uhuañi rlutila luquela li'ihua.

Ejemplu' zete cuna ellie'e

(Mr. 9:50; Lc. 14:34-35)

13'Li'ihua necahua xi neca zete lu iliulabequie'. Pero tunu niti nú nerí'i, ¿xa modo zibi' zecae che? Leca' xi zibi'i, tsi'quitsia benene nu ta' bene equiee.

14'Nu le'ca li'ihua necahua xi neca ellie'e lu iliulabequie', li'ihua necahua xi neca tucu eyeche nú nchiucu' equie tucu dañi nú leca modo nú ricu a'ch'i'. **15**Lecati quie'e quii tucu quinqué nu tsacu'lla tucu caja equiee, rqui'ña nú zucune aya para nú du'llie'e luye bee bene enu nucua'a liñi ni'i. **16**Le'ca scua li'ihua, ucua'nahua nú huañi nze'cahua lubee bene para nú chenu lañi' beella beenú neca nze'ca rri'ihua, che nibeella bee bedichia' nze'ca equie cuenda' Pa'ahua Diose enu nzucu liñibe.

Uzete' Jesuse bee bene nú xi rni ley

17'La ri'ihua elliebacu' nú uriña para nú huachua ley, ley nú udete' Diose lu Moisés urre beenú uzete' bee profeta bee bene, xne li'á uriña para nú tsalua tucu nú rni ley. **18**Li'á rnia luhua nú mase fácil nú nitilu liñibe cuna iliulabe, luquelá nú rila tucu letra urre tucu punto nú nze'ta lu ley' Diose, hasta nu yalu lunú nzu nú aca.

19Enze'e bene enu la zucu' tucu bee mandamiento nú nze'ta lu ley cua', mase secalla nú la neca equie bee mandamiento cua', nu le'ca esquie tunu la zete'lla bee bene nú zucu'e, chequie li'illa lle'natsia aca neca equiella elurnibiy'a' Diose liñibe. Pero bene enu sucu' ye bee mandamiento nú nze'ta lu ley cua', nu sete'lla bee

bene nú zucu'e, li'illa acalla enu máse aca neca equie elurnibiya' Diose liñibe. ²⁰Enze'e nia luhua nú tunu la nehuañi nze'caláhua luquelá bee ulaxcuela enu reca ley cuna bee fariseo leca modo chu'uhua liñibe elurnibiya' Diose.

Rni Jesuse equie cuenda' nú rle bene
(Lc. 12:57-59)

²¹'Li'ihua nediya'la'hua lunú uni Moisés lubee bene'ahua enu udetela: "La uti bene sa' bene, xne bene enu ruuti sa' yalalla castiya." ²²Pero li'á nia luhua nú titse bene enu rana arqui'sa', challa lu usticia, nu le'ca titse bene enu rquiexuusa', rqui'ña nú dete bene ze'e lu usticia enu mase neca equie para nú chiulue lu cuenda'lla, le'ca titse bene enu rni bedichia' chi'qui' lusa' nzuche' nú challa lu quii ebila.

²³'Enze'e, tunu nzeyulu u'na ru'u ecu'cu' Diose nu ullu'cu arqui'lu nú rlelu lu bene, ²⁴utsa'nasca' u'na'l lu ze'e. Nu uquiatosalaxuhua arqui' sa'hua, che benchila'lu nu dete'lu u'na lu Diose.

²⁵'Tunu nu' ti dete' cuenda li'ilu lu juese, ante nú chahua lu juese utsuche'xuhua nucua' diquila nú nu' tiempo para nú la dete' cuendalla li'ilu lu juese, xne tunu dete' cuenda benecua' li'ilu lu juese che juese dete'cuenda li'ilu lu policía para nú chalu ni'cu'. ²⁶Li'á nia lulu nú la chiu'a'lu ni'cu' hasta nú ixiuxulu nzie' dimi nú nacu' juese lulu.

**Uzete' Jesuse equie cuenda'
nula lu'cu niyu stucu una'a
enu la neca una'lla**

²⁷'Li'ihua nediya'la'hua nú rni lu ley: "La lu'cu niyu stucu una'a

enu la neca una'i, nu la lu'cu una'a stucu niyu enu la neca niyu'nchu." ²⁸Pero li'á nia luhua nú titse bene enu ri'yatsia lu tucu una'a nu rri'illa elliebacu' nú necha neca chenu ri'yalla lu tucu una'a, uri'ilalla dula arqui'lla lu cuenda'nchu che.

²⁹'Tunu rri'i i'cululu chube nú rri'ilu dula, neca nze'calá nú ubuane nu utsi'quii istu. Xne neca nze'calá nú nitilu tucutsia i'cululu luquela nú diquinecalu chálu ebila. ³⁰Nu tunu rri'i yalu chube nú rri'ilu dula, uchie'cue nu utsi'quii istu. Xne neca nze'calá nú nitilu techu yalu luquela nú cha diquilo ebila.

**Uzete' Jesuse equie cuenda' nú
rle'esa' bene**

(Mt. 19:9; Mr. 10:11-12; Lc. 16:18)

³¹'Le'ca rni lu ley: "Titse bene enu le'e una'a, rqui'ña nú hualla tucu ichi' elu rni nú ule'ella una'alla."

³²Pero li'á nia luhua nú tunu tucu niyu le'e una'a, nula necane nú uril'i una'alla eluhuexe cuna stucu niyu, che le'ca li'illa uril'illa nú rlu'cu una'alla stucu niyu. Nu niyu enu xia tucu una'a enu lá acaxeelá ule'e niyu', rri'illa dula.

**Uzete' Jesuse nú la qui'ña nú
quie'elu Diose chenu xi rniliu
para nú chili arqui' bene**

³³'Le'ca nediyala'hua nú uni Moisés lubee bene'hua enu udetela: "Rqui'ña nú tsa'alu bene lunú unilla nú ril'illa chenu rquie'ella Diose nú ril'illa." ³⁴Pero li'á nia luhua nula qui'ña nú quie'ehua diose'hua nú nihua ista liñibe ri'ya, para nú aca acehe nú neli nú rnihu xne liñibe nzucu Diose, ³⁵nu ni' lu yuu,

xne necane elu nzu e'yanu, nu ni' eyeche Jerusalén, xne necane lachinu, li'inu enu neca arre enu mase rnibiya!. ³⁶Nu ni' la yala quie'e bene equie cuenda' lluca equie bene, xne leca modo nú ril'i bene nú aca nequichi urre aca naatsa ni' tucu ichia equiella. ³⁷Mejora uni'hua, "aahua" urre "a'a", xne ye beela bee bedichia' nú nihua nze'tae lu cuenda' beze'lu.

**La guse'e bene nú necha neca cuna
nú necha neca**

(Lc. 6:29-30)

³⁸'Le'ca ubene'l'a'hua bedichia' nú rni: "Enu lua i'cululu, le'ca ulua i'culu nze'e. Nu enu lua layalu, le'ca ulua laya nze'e." ³⁹Pero li'á nia luhua: Nú la duse'ehua nú necha neca cuna nú necha neca, tunu nu' enu du' tucue xecalu chube, uzela nú du'llae stucu chú xecalu. ⁴⁰Tunu nu' bene enu rliunuu li'ilu para nú axilla lliaca'lu, uzela nú le'ca uya'lla chiamarra'lu. ⁴¹Tunu ti rri'i juersa li'ilu nú uya'lu stene'lla tucu kilometro, uya'e stucu kilometro. ⁴²Titse bene enu rnacu' tucu elietsa lulu, uri'i elietsa lulla, nula aca nechiqui'lu chenu xi ri'ñalla lulu.

Zeca bene bene enu rle lulla

(Lc. 6:27-28, 32-36)

⁴³'Le'ca ubene'hua bedichia' nú rni: "Uzeca bene enu seca li'ilu nu uhuana arqui' bene enu rana arqui' li'ilu." ⁴⁴Pero li'á nia luhua: Uzecahua bene enu rle luhua, nu ni'hua nú cha nze'ca lu cuenda' bene enu rnacu' nú la cha nze'ca lu cuenda'hua, uri'i nze'cahuá lubee bene enu rana arqui' li'hua,

una'cuhua lu Diose lu cuenda' bee bene enu riquichi'qui' li'hua nu xitse rri'inu li'hua. ⁴⁵Scua acahua lli'ñi Diose pa'hua enu nzucu liñibe, xne li'inu rri'inu nú rliñi bichia para yebee bene enu rri'i nze'ca nu cuna lubee bene enu la ril'i nze'ca, nu rri'inu nú rlaca quiu para bee bene enu rri'i nze'ca nu cuna lubee bene enu la ril'i nze'ca. ⁴⁶Xne tunu secatsiahua bee bene enu seca li'hua, ¿xi ati'hua lu Diose che? Xne hasta bee bene enu rri'i cobre equie impuesto rri'i scua. ⁴⁷Nu tunu rnihua Diose lubee sa'tsiahua, lecaxi nú neca nze'ca rri'hua, xne hasta bene enu la chulu Diose rri'i scua. ⁴⁸Aca nze'cahuá tucu nú nze'ca pa'hua Diose enu nzucu liñibe.

**Xa ri'i bee bene elietsa
lu sa' bee bene**

6 'Ubi'yahua nu la ri'hua lunú neca nze'ca lubee bene para nú lañi'tsia beeí lunú xa rri'hua. Xne tunu rri'hua scua, pa'hua Diose enu nzucu liñibe leca' xi liqui'nú luhua. ²Enze'e chenu rri'ilu elietsa lubee bene enu rqui'ñia elietsa, la ti'chia dichia'lue para nú acabiya' bee bene nú xi rri'ilu, xi rri'i bee bene enu nequichia' liñibee indu cuna labe inziu para nú zucu' aya bee bene li'ibeeí, pero li'á nia luhua nú nucua' neca premio' beeí. ³Enze'e chenu rri'ilu elietsa lubee bene enu rqui'ñia nú ri'ilu elietsa lu, la ti'chia dichia'lu nucua' lubee bene, pero ni' lu bene enu máse rquiete'lu la nilu nú rri'ilu. ⁴Mase neca nze'ca nú li'itsialu nediyal'u lunú rri'ilu, nu Pa'lú Diose enu

ri'ya lunú li'itsialu rri'ilu, li'inu liá liqui'nu premio nú rialalu.

Uzete' Jesuse nú xa nacu' bee bene lu Diose
(Lc. 11:2-4)

5'Nu chenu nacu'hua lu Diose, la ri'ihua xi rri'i bee bene enu nequichia', nú riu' arqui'beella nú nzulí beella rnacu' beella lu Diose liñi bee indu, nu bee squiñia inziu para nú lañi' bee bene lunú rri'i beella. Xne li'á nia luhua lunú rri'i beella scua nucua' neca premio' beella. **6**Pero li'ilu chenu nacu'lu lu Diose, uyu'u liñi ni'i, nu utsa'cu puerta nu una'cu' lu Diose enu nzu cuna li'ilu. Nu li'inu enu ri'ya lunú li'itsialu rri'ilu, li'inu lia liqui'nu premio nú rialalu.

7'Chenu rnacu'lu lu Diose, la nilu bee bedichia' nú la zibi' huaxi bese, xi rri'i bee bene enu la chulu Stichia' Diose. Xne seca beella nú tunu huaxi bese rni beella tucu bedichia' che máse ri'i caso Diose nú rni beella. **8**La ri'ihua tucu nú rri'i beella, xne pa'hua Diose nediyala' xi rqui'ñahua ante nú nacu'huane lunu. **9**Enze'e chenu nacu'hua lu Diose uni'hua:

Pa Diose li'ilu enu nzucu liñibe, Chiqui' riala nú lu'curu ula'na lunú leelu.

10 Nu ye'ta nú rnibiyal'lu luru. Nu aca tucu nú riu' arqui'lu lu iliulabe, tucu nú reca liñibe.
11 Uli'qui' elubacu nú da'curu yebichia.
12 Nu urí'i perdona nú necha rri'iru tucu nú le'ca rri'iru perdona bee bene enu necha rri'i luru.

13 La zelalu nú ri'iru dula, sino que uri'i elietsa luru para nú la ri'i ye beenú necha neca ana luru.

Xne li'ilu rnibiyal'lu, nu li'ilu rlu'culu poder, poder nú leca xunga laxu. Amén.

14'Xne tunu rri'ihua perdona bee bene enu rri'i nú necha neca luhua, le'ca scua Pa'ahua Diose enu nzucu liñibe ri'i perdona li'ihua; **15**pero tunu li'ihua la ri'ihua perdona bee bene enu rri'i nú necha neca luhua, le'ca la ri'i Diose Pa liñibe perdona stulahua che.

Chenu la acu bee bene equie nú rlu'cu bene ula'na lu Diose

16'Chenu la acuhua equie nú rlu'cuhua ula'na lu Diose, la ricu' nehuana luhua tucu nú nehuana reca lubee bene enu nequichia', rri'i bee scua para nú lañi' bee bene nú la acu bee equie nú rlu'cu bee ul'a'na lu Diose. Pero li'á nia luhua nú nucua'tsia necala premio' bee. **17**Pero li'ilu, chenu la aculu equie nú rlu'culu ula'na lu Diose, udi'ñi nu uri'cuche' equielu, **18**para nú la ri'i bee bene beya' nú la aculu lunú rlu'culu ula'na lu Diose. Tucutsia Pa Diose enu nzu cuna li'ilu li'itsianu riala acabiya'nunu lunú rni li'itsialu, nu li'inu liqui'nu premio nú rialalu.

Eluxene nú nu' liñibe

(Lc. 12:33-34)

19'La la'nahua nú lu'cuhua huaxi eluxene'hua lu iliulabe quie', elu acu bee belala'e nu nitilue, nu chu'u bee huana' cachi' bee. **20**Mejora ucua'nahua nú ri'ihua ana eluxene

nú nu' liñibe, elu leca bee belala'
para nú acune, nu le'ca lecaxi
nitilu ze'e nu la chu'u bee huana'
ze'e para nú cachil'i. ²¹Xne lu
eluxene'huá ze'e nzu arqui'huá.

Ellie'e cuerpo'ahua

(Lc. 11:34-36)

²²I'culua'ahua neca xi neca
ellie'e lu cuerpo'ahua, nu tunu rri'i
bene lunú neca nze'ca, diqui cuerpo'
bene nu' ellie'e, ²³pero tunu rri'ilu
lunú necha neca, diqui cuerpo'lu
neca xi neca nú nzu leta xcabe,
iLeta xcabe nú naatsacabelí!

Diose nu dimi

(Lc. 16:13)

²⁴Ni' tucu moso' leca modo ri'i
riña' lu chiucu patrón, xne leei lu
tuculla, nu stuculla zecai, urre ri'i
nze'cai lu tuculla, nu lu stuculla la
ri'i nze'cai. Enze'e leca modo nú
zibí'huá lu Diose nu tsu arqui'huá
lu dimi.

Rriucu Diose bee bene'nu

(Lc. 12:22-31)

²⁵Li'á nia luhua: La chenu
arqui'huá lunú xi acuhua cuna
nú xi hue'huá para nú huañihua.
Le'ca la chenu arqui'huá lu cuenda'
xucuhua nú utuhua. Máse seca lunú
nehuañi bene luquela nú racu bene,
nu cuerpo' bene máse seca luquela
xucu bene. ²⁶Bi'yacuruhua bee iñi
enu rcuecu' liñibe. La du' beeí nii
nula ri'i beeí ula'cu, nu la lu'cu
beeí elu chuche'e, pero Pa'ahua
Diose enu nzucu liñibe lia rdete'nú
nú racu beeí. ¿Enzialáquie! li'ihua
nú másescalá secahua luquela bee
iñi? ²⁷Nu le'ca esquie, ¿xie'lianú

máse chiqui' nzenu arqui'huá nú
duñilahua lle'na la?

²⁸¿Xinu nzenu arqui'huá lunú xi
utuhua? Ubi'yacuruhua xa rru'cu
bee quie dañi, la ri'i bee riña' nu
la reche'e xi utune, ²⁹pero ni' arre
Salomón luye nú ñia utsuche'lla, né
tsuche'lla tucu nú ñia nzuche' bee
quie. ³⁰Nu tunu suche'e Diose bee
huañi scua, nú nee nu'e dañi nu
ye'e chiquine. iEnzialáquie! li'ihua
bee bene enu lle'natsia nzeli arqui'
li'inu, nú la tsuche'nu li'ihua scua!
³¹Enze'e, la chenu' arqui'huá nú
rnihuá: "¿Xi da'cuahua nee? nu ¿xi
diya'ahua? nu ¿xi utu'ahua?" ³²Xne
bee bene enu la chili arqui' Diose
nzenu arqui' ye bee nucua', pero
li'ihua rlu'cuahua tucu pa'hua liñibe,
nu li'inu nediyá' nze'canu nú xi
seca la'cha'huá. ³³Pero uzu'cu'huá
nú rni Diose nu uri'ihua tucu nú
niarqui'nu che liqui'nu ye nú seca
la'cha'huá. ³⁴La chenu arqui'huá lu
cuenda' bichia ye'e, xne ye ye'e nu'
xi nzenu arqui' bee bene. Xne cada
bichia nu' xi chenu arqui' bene.

La yala nú ze'ta bee bene sa'lla

(Lc. 6:37-38, 41-42)

7 ¹Nu la ze'tahua sa'huá para
nú lecati ze'ta li'ihua. ²Xne
tucu nú se'tahua bee bene, le'ca
scua ze'ta bee bene li'ihua, nu
tucu nú rri'inuhua bee bene le'ca
esquie ri'inu bee bene li'ihua. ³¿La
ze'tahua beelá bee bene lunú
lle'natsia rri'i beella, nzalá nú
uyanu arqui'huá lunú llenelá falta
nú rlu'cuahua? ⁴Nu tunu llenelá falta
nú rlu'cuahua, ¿xa modo nihua lu
stucu bene: "La neca nze'ca lunú
rri'ilu scua"? ⁵iBene enu nequichia!

Rluti uri'li tucu nú necane, che nu'
modo nilu lu stucu bene la yala nú
ri'ilu scua.

6'La ri'ihua juersa bee bene enu la
niarqui' ri'i caso lunú neca cuenda'
Diose, para nú lecaxi ri'inu beeí
li'ihua. Xne tunu ri'ihua juersa beeí,
neca nucua' xi neca chenu si'qui
bene tucu nú necachi neca lu nicu.
Le'ca la ri'ihua juersa bee enu la
yu' arqui' lunú neca cuenda' Diose.
Xne tunu ri'ihua juersa beeí, neca
nucua' xi neca chenu rdu' bene tucu
nú huaxi seca lu cuchi nu tse tsiaí
equiee.

**Na'cuhua lu Diose nu ula'nahua
li'inu**

(Lc. 11:9-13; 6:31)

7'Una'cuhua lu Diose che liqui'nu
lunu rnacu'huá lunu, ula'nahua
li'inu nu che llela'huá li'inu,
uzequiehua lunu che ri'i casonu
li'ihua. **8**Xne bene enu rnacu' nú
rnacu' lunu yucu nze'ene, nu bene
enu rla'na Diose llela' nze'e li'inu,
nu bene enu rnacu' nu sequie lunu,
ri'i casonu nze'e.

9'¿Xie' nu' ta tucuhua enu
dete' quiee acu endu' chenu nacu'
endu'huá pa acu la? **10** ¿Urre xie'
dete'huá tucu be'lá acu endu'huá
chenu rnacu' endu'huá bela acu
endu'huá la? **11** Li'ihua enu la neca
bene nze'ca, nu'luhua rdete'huá
nú neca nze'ca lubee endu'huá,
ienzaláquie' Pa'ahua Diose liñibe
nú la liqui'nu nú neca nze'ca lubee
bene enu rnacu' nucua' lunu!

12'Uri'ihua lubee bene tucu nú
niarqui'huá nú ri'ibeella luhua. Xne
scua rnibiyá' ley' Diose cuna ye
beenú uquie' bee profeta'nu.

Ru'u puerta nú nuxu' neca

(Lc. 13:24)

13'Uyu'uhua ru'u puerta nú nuxu'
neca. Xne ru'u puerta nú llene neca,
nu inziu nú llene neca, nucua' neca
nú ruya' li'ibee bene lu inziu nú
necha neca, nu huaxi bee bene nza
inziu cua!. **14**Pero puerta nu inziu
nú ruya' bee bene lu elunehuañi
me'e nu nuxu'e, nu la huaxi bee
bene enu nza inziu ze'e.

**Equie cuenda' ndixi nú rayu lu aca
esquie nu'lú bene xi acae**

(Lc. 6:43-44)

15'Le'ca ubi'yahua li'ihua lubee
bene enu li'á rnibee nú neca beeí
profeta' Diose, nu rri'i beeí nú lle'na
arqui'beeí, pero scuatsia rri'ibeeí
para nú sequieno beeí bee bene,
nu chiqui' necha rri'i beeí. **16**Pero
li'ihua ri'ihua beya' nú xa neca bee
bene cua', lunú rri'i beeí rixiule'e
núti neca beeí, xne la ayu cuchiu'
lube' lubee aca eche, nu la ayu higo
lubee huañi eche. **17**Enze'e ye bee
aca nze'ca rayu ndixi nze'ca lu. Nu
bee aca nu la neca aca nze'ca la ayu
ndixi nze'ca lu. **18**Leca modo nú
ayu ndixi núa neca nze'ca lu aca
nú neca nze'ca, le'ca esquie la ayu
ndixi nú neca nze'ca lu aca núa
neca nze'ca. **19**Ye bee aca nú rayu
ndixi nu la zibi' lu, rrecu'e nu riu'e
lu quii. **20**Scua ri'ihua beya' ti neca
beella equie nú rri'i beella.

**La chu'u ye bee bene liñibe
elurnibiyá' Diose**

(Lc. 13:25-27)

21'Laca ye bee bene enu rni lua:
"Detá, Detá", chu'u liñibe elurnibiyá'

Diose, sino que chu'utsia bee bene enu sucu' lunú rni Diose Pa liñibe. ²²Bichia ze'e huaxi bee bene ni lua: "Detá, Detá, li'iru uniru lunú leelu lubee bene, nu equie nú leelu uluaru bee benechiquí' arqui' bee bene nu equie nú leelu uri'iru huaxi bee milagro." ²³Pero chequie cuaquia lubeei: "Leca xunga uyulua li'ihua, ulluna'hua lua, li'ihua bee bene enu necha uri'i."

Ejemplu' chiucu simiendu

(Lc. 6:47-49; Mr. 1:22)

²⁴'Enze'e, bee bene enu riene' stichia'a nu sucu'e, necalla xi neca tucu bene enu netsiña rreche' ni'i equie quiee. ²⁵Añinzuca nú rlaca quiu nu rlaca huaxi inza riu'u tetsu' ni'i ze'e nu reca bii, pero lá rila ni'i ze'e xne nchiucu' simiendu' equie quiee. ²⁶Pero bene enu riene' nú rnia nu la zucu' stichia'a, li'illa necalla xi neca tucu bene enu netundu enu ureche' ni'i lu eyuxi. ²⁷Chenu rlaca quiubi, nu rlaca huaxi inza riu'u tetsu' ni'i ze'e, che uluquie ni'i ze'e. iNu urilalii!

²⁸Chenu ulaxu nú uni Jesuse scua lubee bene ze'e, chiquí' uyanu arqui' ye beei xneca uzete'nu li'ibeei, ²⁹xne sete'nu beei xi sete' tucu bene enu chiquí' rlu'cu poder, nu la zete'nu xi sete' bee ulaxcuela enu reca ley.

Uriyeca Jesuse tucu bene enu seca elichia nú lee lepra

(Mr. 1:40-45, Lc. 5:12-16)

8 Chenu ulaca Jesuse equie tucu dañi, huaxi bee bene uyanala li'inu. ²Nu che uyabica tucu bene

enu seca elichia nú lee lepra lunu, che utsu lliquii lunu nu uni lunu:
—Detá, tunu chiu'u arqui'lù, nu' beya' riyecalu li'á.

³Chequie uricu' Jesuse yanu equie niyu ze'e nu uninu:

—Chiu'u arquia uyeca' nee.

Chenu uni Jesuse scua, hora ze'e uyeca' bene ze'e nu leca' xi nalla.

⁴Chequie uni Jesuse lulla:

—Uzu'cu' diaca nú nia lulu, la ixiule'elu lu ni'tucu bee bene nú uyeca'là'lù. Uquia lube'tsia li'ilu lu ule'ya, nu uya' u'na lu Diose tucu nú unibiya' ley' Moisés, para nú lañi' bee ule'ya nú uyeca'lù.

Uriyeca Jesuse moso' capitán Roma

(Lc. 7:1-10)

⁵Hora nú nzechu'u Jesuse eyeche Capernaum, uriña tucu capitán Roma lunu nu uezquiella lunu, ⁶nu unilla lunu:

—Detá, mosoa nuxu nia ritu nu leca' modo tsulii, chiquí' nehuana secai nú ritii.

⁷Nu uninu lu capitán:

—Li'á nzeriyecalla.

⁸Chequie uni capitán ze'e lunu:

—Detá, la yala nú chu'ulu nia.

Pero uni'tsia tucu bedichia' desde ca'a para nú yeca' mosoa, ⁹xne le'ca sucua nú rni bee bene enu rnibiy'a' lua, nu le'ca rlu'cua nú rnibiy'a' lubee sundado. Chenu nia lu tucu beei nú cha nze'e elu cha nze'e chu nza nze'e che, nu chenu nia lu stucui nú ye'ta nze'e lua chu nze'ta nze'e che, nu chenu rnibiy'a' lu mosoa nú xi ri'i nze'e, rri'i nze'ené.

¹⁰Chenu ubene' Jesuse nú uni capitán ze'e scua, chiquí' uyanu

arqui'nu nu uninu lubeen bene enu
nzenala li'inu:

—Li'á nia luhua nú ni' luye bee
eyeche Israel lasca' chechu'a ni'
tucu bene Israel enu chiqui' nzeli
arqui' Diose tucu nú nzeli arqui'
benequie' Diose. ¹¹Li'á nia luhua
nú huaxi bee bene diqui lu iliulabe,
yala cua'anu Abraham, cuna
Isaac cuna Jacob liñibe elurnibiya'
Diose. ¹²Pero bee bene Israel enu
necadichia' nú riala nú chu'u liñibe
elurnibiya' Diose li'ibeei riala chue
beei eli'ya' elu natsacabe, nu ze'e
una'beei cuna nú acuxa' laya bee.

¹³Chequie uni Jesuse lu capitán
ze'e:

—Uquia ni'llo, nu aca tucu nú
uchili arqui'lu.

Nu hora ze'e uyeca' moso' capitán
ze'e.

Uri'iyecea Jesuse suegra' Pedro

(Mr. 1:29-31; Lc. 4:38-39)

¹⁴Chenu uya Jesuse ni' Pedro,
ulañi'nu nú nchiicu' suegra' Pedro
lu luna seca xle. ¹⁵Che una'tsenu
yalla, nu chu uchiu'u xle nú secalla,
che uzetella nu udete'lla nú udacu
beella.

Uriyeca Jesuse huaxi bee bene enu riti

(Mr. 1:32-34; Lc. 4:40-41)

¹⁶Chenu uyu'u rula', uriñayu
bee bene huaxi bee bene enu
nu' benechiqui' arqui' lu Jesuse,
nu cuna tucu bedichia' uluanu
benechiqui' arqui'beella, nu
le'ca uriyecanu ye bee bene enu
riti. ¹⁷Scua unga para nú uyalu
tucu nú uni profeta Isaías chenu
unilla: "Li'inu uyucunu elchia

nú se'ca'ahua nu unguya'nu nú
nehuana se'ca'ahua."

Bee bene enu niarqui' nú chequiee Jesuse

(Lc. 9:57-62)

¹⁸Chenu ulañi' Jesuse nú huaxi
bee bene rriña lunu, che unibiya'nu
lubeen bene'nu nú detenunu beella
stucu chu ru'u inzatu' ze'e. ¹⁹Nu
che uyabica tucu ulaxcuela enu
reca ley' Moises lunu, nu unilla
lunu:

—Maestro, niarquia nú nzelanala
li'ilu catse elu nzalu.

²⁰Che uni Jesuse lulla:

—Bee betsa rlu'cu beeí iliu'u nú
neca ni'i beeí, nu bee iñi rlu'cu beeí
exlia'tse' beeí. Pero li'á Bene enu
uxe'la Diose ni' elu quienchiña'a
equiea la lucua.

²¹Nu stucu bene'nu enu nzenala
li'inu uni lunu:

—Detá, uzela nú bi'ya paa hasta
nú atinu.

²²Pero uni Jesuse lu bene ze'e:

—Utequie li'á, nu uzela nú bee
bene enu la niarqui' ye'tanala li'á,
cachi' bee nze'e pa'llo chenu atilla.

Uzucu' bii cuna inzatu' nú uni Jesuse

(Mr. 4:35-41; Lc. 8:22-25)

²³Chequie uyu'u Jesuse liñi barco
cuna bee bene'nu, ²⁴nu diquila nú
rdete beella lu inzatu' ze'e, uquixie
unga tucu bii juerte nu uyu'u inza
liñi barco. Pero ra'tse Jesuse nuxu
liñi barco ze'e. ²⁵Che uya cuañi
bee bene'nu li'inu nu uni beella
lunu:

—iDetá, utsila'a lia'ahua! iXne nze
chatse'la'ahua lu inza!

²⁶Che ucuaquinu lubeella:

—¿Xiquie nú chiqui' xiquihua?
¡Xinu lle'natsia nzeli arqui'hua li'á!

Chequie uzetenu nu unibiya'nu
nú acaxe bii cuna inzatu' nu hora
ze'e ungaxeli ye bee nucua! ²⁷Nu
chiqui' uyanu arqui' bee bene'nu nú
unibeella lu sa' beella:

—¿Ti neca benequie?, nú hasta bii
cuna inzatu' sucu' nú rni nucua!

Uhua Jesuse bee benechiqui' arqui' tucu bene Gadara

(Mr. 5:1-20; Lc. 8:26-39)

²⁸Chenu uriña Jesuse stucu
chu inzatu' lu iliu' bee bene
Gadara, che chiucu bee niyu enu
seca ichia' benechiqui' uchiu'u
beei liñi pandiuñi nu uriña beei
lunu. Nu rucu beei chiqui' nelachi
beei, nu hasta nú lecati dete inziu
elu nucua'a beei. ²⁹Nu juerte
urixialibeei nú unibeei:

—¿Xinu ri'chialu li'iru Jesuse
Lli'ñi Diose? ¿Xie' uriñalu ca'a para
nú ri'ilu nú zecaru castiya'rú chenu
lasca' riña tiembu nú acane scua la?

³⁰Axu enza ze'e nucua'a huaxi
bee cuchi racu, ³¹chequie uziquie
bee benechiqui' ze'e lu Jesuse nú
unibeei lunu:

—Tunu hualu li'iru arqui' bee
benequie!, ala' zelalu nú chu'uru
arqui' bee cuchi cua'.

³²Che uni Jesuse lubeei:

—Uyu'uhua che.

Chequie uchiu'u bee benechiqui'
arqui' bee bene ze'e nu uyu'u
beei arqui' bee cuchi ze'e. Che ye
bee cuchi ze'e uyecaxu'u beeí nu
utsundi qui beeí ru'u be'e hasta lu
inzatu', nu ze'e unguti beei.

³³Nu bee bene enu rriucu bee
cuchi ze'e, nzexu'u beei, nu chenu

uriña beei eyeche ze'e udixiule'e
beei lubee bene ye nú unga ze'e,
cuna lunú ulle'ca bee bene enu
uyu'u benechiqui' arqui!. ³⁴Chequie
uchiu'u ye bee bene eyeche ze'e uya
elu nzu Jesuse, nu chenu ulañi' beei
li'inu, uziquie beei lunu nú chiu'unu
lu iliu ze'e.

Uriyeca Jesuse tucu bene enu neati cuerpo'

(Mr. 2:1-12; Lc. 5:17-26)

9 Chequie uyu'u Jesuse liñi
barco nu udetenu stucu chu
inzatu' nu uriñanu elu neca lachinu.
²Ze'e uriñayu bee bene tucu bene
enu neati cuerpo' nchiucu' lu
camiya lunu. Chenu ulañi' Jesuse
nú nzeli arqui'beei li'inu, che uninu
lu bene enu riti ze'e:

—Du' ana arqui'lú endua. Uri'ilá
perdona stulalu.

³Che chiucu chuna bee ulaxuela
enu reca ley' Moisés urí'i elliebacu':
“Benequie! necha rni lu cuenda'
Diose.” ⁴Nu lunú nediyal'a' Jesuse
xi rri'i beella elliebacu', uninu
lubeella:

—¿Xinu necha rri'ihua elliebacu'?

⁵¿Ta nú mase neríña' nú aca, nú
nia: “Uri'á perdona stulalu”, urre
nú nia: “Uzeteet nu utse””? ⁶Pero
nee lubea luhua nú li'á Bene enu
uxé'la Diose rlu'cua nú rnibiya'a lu
iliulabe para nú ri'á perdona stula
bee bene.

Chequie uninu lu bene enu riti
ze'e:

—Uzeteet una'tse camiya'lú nu
uquia'a ni'ilu nee.

⁷Che chu uzete bene ze'e nu
nzialla enza ni'lla. ⁸Chenu ulañi'
bee bene ze'e nucua' chiqui'

ulliqui beeí, nu uquixie unibeeí
bedichia' nze'ca lu Diose, equie nú
udete'nu poder nú rlu'cunu lubee
bene.

Ubixia Jesuse Mateo

(Mr. 2:13-17; Lc. 5:27-32)

9 Chenu uchiu'u Jesuse ze'e nu
nzanu, che ulañi'nu tucu bene
enu lee Mateo, nzuculla elu rri'lilla
cubre impuesto, nu uni Jesuse
lulla:

—Utequie li'lá.

Che chu utsuli Mateo nu chu
nzequiella li'inu.

10 Chenu nzucu Jesuse lu mexa
racu eta ni' Mateo, cuna beelá bee
bene enu rri'i cubre impuesto nu
cuna beelá bee bene enu la nehuáñi
tucu nú rnibya' ley nú sucu' bee
bene Israel, ye beella nucua'anu
beella Jesuse lu mexa cuna bee
bene'nu. **11** Pero chenu ulañi' bee
fariseo nucua', unidichia' beeí lubee
bene'nu:

—¿Xinu racunuu maestro'hua
bee bene enu rri'i cubre impuesto
nu cuna bee bene enu rlu'cu
dula?

12 Chenu ubene' Jesuse nú unibeeí
scua, uninu lubeeí:

—Bee bene enu la aca riti, la
qui'ña bee nze'e doctor. Sino
que bee bene enu riti bee nze'e
rqui'ña doctor. **13** Uquiahuá nu
ze'tehua xi rni lu ichi' Stichia'
Diose elu rni: "Niarquia nú hua'a
arqui'hua bee bene, luguare nú
rliqui'hua nañi u'na lua." Xne
lá yelaa lubee bene enu la lu'cu
dula sino que uriña lubee bene
enu rlu'cu dula para nú che'e
arqui'beeí lu stula beeí.

**Unedichia' bee bene lu Jesuse equie
nu la acu bene lunú rlu'cu bene
ula'na lu Diose**

(Mr. 2:18-22; Lc. 5:33-39)

14 Chequie uriña bee bene' Juan
Bautista lu Jesuse nu unidichia'
beella lunu:

—¿Xiquie nú li'iru cuna bee
fariseo, la da'curu huaxi bese equie
nú rlu'curu ula'na lu Diose, nu bee
bene'lu la ri'i scua?

15 Che uquaqui Jesuse lubeeí:

—Etu xia tucu bene, ¿xie' nu'
modo nú nehuana tsu arqui' bee
bene enu nezene' ze'e chenu nzu
bene enu xia ze'e cuna li'ibeella la?
Pero riña bichia chenu leca' bene
enu xia ze'e. Chee si dete' bee bene'
bene enu xia bichia nu la acu beella.

16 'Lecati quiela' tepedaso laquie
cuqui lu tucu laquie uxu, xne riu'be
laquie cuqui, nu ri'i nucua' nú tsa
laquie uxu. **17** Le'ca la ch'u biñu
cuqui liñi iti uxu, xne tsaa iti uxu,
nu che nitilu biñu cuna iti. Enze'e
rqui'ña nú ch'u biñu cuqui liñi iti
cuqui para nú la nitilu ni'tucue.

**Uriyeca Jesuse endu' Jairo cuna
una'a enu uti'ya ru'u xucunu**

(Mr. 5:21-43; Lc. 8:40-56)

18 Chenu rnisca' Jesuse scua,
uriña tucu bene enu rnibya' liñi
indu' bee bene Israel lunu, nu
utsulliquilla lunu nu unilla lunu:

—Penatsia unguti endua, pero
tunu ye'talu nu ricu'lú yalu
equienchu huañi zecanchu che.

19 Chequie nzenu Jesuse li'ililla,
cuna bee bene'nu. **20** Chequie tucu
una'a enu riti, nu ungala chi'chiucu
lana nú rlaca rene, uyabica di'chi

Jesuse nu uti'nchu yanchu ru'u xucunu,²¹ xne uri'inchu elliebacu': "Tunu ti'tsia yaa ru'u xucunu, yecaa che."²² Pero ubelleta Jesuse, nu ubi'yanu lu una'a ze'e nu uninu lunchu:

—Du' ana arqui'l'u endua uyeca'l'a'l'u xne uchili arqui'l'u li'á. Nu hora ze'e uyeca'l'i'nchu.

²³ Chenu uriña Jesuse ni' bene enu rnibiya' liñi indu' bee bene Israel ulañi'nu nū nucua'ala bee musica ze'e para nú nzeachi' endu'lla, nu chiqui' runa'nuu bee bene li'inchu,²⁴ chequie uni Jesuse lubee bene ze'e:

—Uchiu'uhua ca'a xne lá ati endu' una'a quie', ra'tse tsianchu.

Chequie ulli'chinuu bee bene ze'e li'inu,²⁵ pero unibiya'nu nū chiu'u bee bene ze'e ele'ya', nu chu uyu'unu liñi ni'i nu una'tsenu yanchu, nuchu uzeteenchu.²⁶ Nu ye bee luhuare enza ze'e uril'chialetse bedichia' lunú uril'inu.

Uriyeca Jesuse chiucu bene enu niquie'l'u

²⁷ Chenu uchiu'u Jesuse ze'e, chiucu bene enu labi'ya nzenala li'inu, nu urixialibeei nū rnibeei:

—iJesuse, Iliana' David uhua'a arqui' li'iru!

²⁸ Chenu uyu'u Jesuse liñi ni'i, nu uyabica rucu bee bene ze'e lunu, nu unidichia'nu lubeei nū uninu:

—¿Nzelí arqui'hua nū acaa riyecaa i'culuhua la?

Che ucuaqui beeи lunu:

—Aahua!, nzeli arqui'ru detá.

²⁹ Nu chu, uti' Jesuse yanu i'culu

beeи nu uninu lubeei:

—Aca Tucu nū nzeli arqui'hua.

³⁰ Che uye'e i'culu beeи. Nu uninu lubeei:

—La ixiole'etsiahua nucua' lu ni' tucu bene.

³¹ Pero uchiu'utsia beeи lunu, chu udixiule'e beeи lubee bene diqui lu iliu ze'e nū uriyeca Jesuse beeи.

Uriyeca Jesuse tucu bene enu la nilí

³² Chenu nziatsia bee bene enu uriyeca Jesuse i'culu, che uriñayu bee bene tucu bene enu la ni nchiñi benechiqui' arqui' lunu. ³³ Nu chenu uhua Jesuse benechiqui' arqui' bene enu la ni ze'e, che uquixiei uni. Che chiqui' nzenu arqui' bee bene ze'e nū unibeei:

—iLeca xunga ulañi'ahua sa'
milagro quie' leta bee bene Israel!

³⁴ Pero uni bee fariseo:

—Benequie' rlua benechiqui' arqui'
bee bene cuna poder beze'l'u enu
rnibiya' lubee benechiqui'.

Uhua'a arqui' Jesuse bee bene

³⁵ Uya Jesuse lu ye bee eyeche llene cuna lu ye bee eyeche lla'na, nu cada tucua lubee eyeche cua'
uyu'unu liñi bee indu uzete'nu
bedichia' nze'ca' Diose lubee bene,
nu uninu lubella nū xa neca
elurnibiya' Diose, nu uriyecanu elu
rcu cuerpo' bee bene, nu cuna bee
bene enu seca yelu clasia' elichia.

³⁶ Chenu ulañi' Jesuse bee bene añi
cua' uhua'a arqui'nu li'ibeella, xne
nehuana nzu arqui'beella, nu lixiu
nzu arqui'beella, nu nucua'a beella
xi nucua'a bee sanchi enu leca' ti
ri'i ucu. ³⁷ Chequie uninu lubee
bene'nu:

—Li'á nia nū nu' huaxi bee bene
enu niarqui' yene' bedichia' nze'ca'

Diose, pero leca huaxi bee bene enu ixiule'e lubee bene. ³⁸Enze'e una'cuhua lu Diose para nú xe'lalu huaxi bee bene enu ixiule'e stichia'nú lubee bene.

Ucañi Jesuse chi'chiucu bee bene'nu
(*Mr. 3:13-19; Lc. 6:12-16*)

10 Chequie ubixia Jesuse chi'chiucu bee bene'nu, nu udete'nu poder lubeella para nú hua beella bee benechiqui' arqui' bee bene nu riyeca beella bee bene enu rccuu catse cuerpo', cuna ye clasia' elichia nú seca bee.

²Bee benequie' neca lu chi'chiucu apóstol' Jesuse:

Rluti,
Simón enu le'ca lee Pedro,
nu bichilla Andrés;
nu Jacobo cuna Juan, rucu
benequie' neca lliana'
Zebedeo.

³Nu le'ca ucañinu Felipe,
Bartolomé,
Tomás cuna
Mateo enu uri'i cubre bee
impuesto;
Jacobo lliana' bene enu lee Alfeo;
nu Lebeo enu le'ca lee Tadeo.

⁴Nu cuna Simón enu ullutse leta
tucu partido nú lee cananista;
nu Judas Iscariote enu udete'
cuenda Jesuse lubee bene nú
ungutinu.

**Uxe'la Jesuse bee apóstol'nu
chetixiule'e beella stichia'nú**

(*Mr. 6:7-13; Lc. 9:1-6*)

⁵Ante nú xe'la Jesuse chi'chiucu
bee apóstol'nu lubee bene uninu
lubeella:

—La chuehua elu nucua'a bee
bene enu la neca bee bene Israel
ni' lubee eyeche lu iliu Samaria;
⁶sino que uquiahuia lubee bene
Israel enu la chenala inziu' Diose.
⁷Uquiaxiule'ehua lubeella nú
nze'ta riñala bichia nú nibiya'
Diose. ⁸Riyecahua bee bene enu
riti, nu ri'ihsa nú huañi zeca bee
bene enu unguti, ryecahua bee
bene enu seca elichia nú lee lepra,
huahua bee benechiqui' arqui' bee
bene. Tucu nú lia uliquia poder cua'
luhua, le'ca chenu ryecahua bee
bene la ri'ihsa cobre.

⁹'La uya'hua cobre ni' oro ni'
plata. ¹⁰Uya'hua biti, nu la uya'hua
xucuhua nú che'ehua, nu la uya'hua
steinza lucuhua, nula uya'hua
xcahua, xne bee bene enu rri'i riña'
rialá nú ati'lla nú aculla.

¹¹'Chenu riñahua tucu eyeche
llene urre tucu eyeche lla'na, ze'e
cua'nahua ni'i tucu bene nze'ca
ya'nahua nu uya'nahua ze'e hasta nú
chiu'uhua eyeche ze'e. ¹²Nu chenu
chu'uhua liñi ni'i bene ze'e, uni'hua
Diose lubee bene enu nucua'a ze'e.

¹³Tunu bee bene liñi ni'i ze'e rialá nú
nzuxé arqui'beella, ria'na nú nzuxé
cua' arqui'beella, pero tunu lacane
para li'ibeella, benchila'e cuna li'ihua
che. ¹⁴Nu tunu la yucu arqui' bee
bene li'ihua tucu eyeche urre tucu
ni'i, uchiu'uhua eyeche ze'e urre ni'i
ze'e, nu ri'quihua yuube'cha' nú nu'
cuchiu'hua, xi neca tucu seña nulá
zela beella ayene' beella bedichia' nú
unihua. ¹⁵Xne li'á nia luhua nu chenu
hualu Diose lu cuenda' yebee bene,
masesca'lá zeca bee bene eyeche
cua' castiya luquela bee bene eyeche
Sodoma cuna Gomorra.

**Nze'ta nú nehuana zeca
bee bene' Diose**

16 Le'ca uni Jesuse lubee bene'nú: —iBi'yacuruhua! Li'lá xe'la li'ihua lubee bene xi neca chenu nza bee sanchi leta bee bichiuu. Enze'e aca netsiñahua xi netsiña bee be'lá nu aca lle'na arqui'hua xi neca bee paloma. **17** Ubi'yahua li'ihua xne dete' cuenda bee bene li'ihua lubee usticia nu zete'che' beei li'ihua liñi bee indu. **18** Nu hasta uya' beei li'ihua lubee gobernador nu lubee arre equie nú nzeli arqui'hua li'lá, pero scua nu' modo ixiule'ehua stichia'a lubeei, nu lubee bene enu la neca bee bene Israel. **19** Nu chenu dete' cuenda bee bene li'ihua lubee usticia, la chenu arqui'hua xi nihua urre xa nihua lubeella; xne hora nú nihua Diose liqui' bee bedichia' nú riala nihua. **20** Xne laca li'ihua enu ni. Espíritu Santo' Diose Pa liñibe neca enu liqui' bedichia' nú nihua.

21 Enta bichia nú dete' cuenda bee bene bee bichilla nú ati bee nze'e, nu le'ca dete' cuenda bee paa bee endu'lla para nú ati beei. Nu le'ca enta bichia nú ri'i condra bee endu' bee uzana' beei nu hasta nú dete' cuenda bee li'ibeella nú ati beella. **22** Nu chana arqui' ye bee bene li'ihua equie nú necahua bee benea. Pero bee bene enu tsata' arqui' lunú nzeli arqui' li'lá diqui tiembu nú nehuañilla, tsila'a Diose bee nze'e. **23** Chenu ri'i bee bene nú nehuana zecahua lu tucu eyeche equie nú necahua bee benea, uquiahua stucu eyeche, xne li'lá nia luhua nu lasca' laxu chuehua lu yebee eyeche Israel chenu riña li'lá Bene enu uxel'a Diose.

24 Ni' tucu bene enu sete' la neca equielálla lu bene enu sete' li'illa, nu le'ca ni' tucu moso' la neca equielá lu patron'i. **25** Bene enu sete' rqui'ña nú aca conformella nú recalla tucu nú reca ulaxcuela'lla, nu tucu moso' rqui'ña nú aca conformei nú necai tucu nú neca patron'i. Nu li'lá enu rnibiy'a luhua rni bee bene nú necaa beze'lú, ñenzaláquie' li'ihua nú necahua bee benea ti ni bee bene nú necahua?

Ti rqui'ña nú Iliqui bee bene
(Lc. 12:2-9)

26 Enze'e la lliquihua bee bene. Xne ni' tucu beenú a'chi' neca la ya'nane scuatsia sin nú acabiya, riña bichia nu acache bee nucua', le'ca ni' tucu beenú a'chi neca rri'i bee bene la ya'nane scuatsia, riña bichia nú acabiya yebee nucua'. **27** Lunú a'chi'tsia rnia luhua, uni'huane lu yebee bene nu lunú rnia a'chi diacahua. Juerte uni'huane. **28** La lliquihua bee bene enu niarqui' uti li'ihua. Pero leca modo utila espíritu'hua. Mejora ulliquihua Diose, xne li'nu rlu'cunu poder nú nitilunu espíritu'hua cuna cuerpo'hua ebila.

29 ¿La huaxi seca bee iñi? Pero ni' tucu beeí la zana' beeí lu yuu tunu la zela Pa'ahua enu nzucu liñibe nú acane scua. **30** Nu li'ihua hasta yebee ichia equiehua nebacu' Diose. **31** Enze'e la lliquihua. Xne mase secahua luquela nú seca huaxi bee iñi.

**Bee bene enu la tsacu' arqui' nu neca
bene' Jesuse**
(Lc. 12:8-9)

32 Titse bee bene enu ni nú neca benea lu beelá bee bene, le'ca esquie li'lá nia nú neca beella bee benea ante lu Diose Pa liñibe.

33 Pero bee bene enu ni nú laca bee benea lu beelá bee bene, le'ca esquie li'á nia nú laca beella bee benea ante lu Diose Pa liñibe.

Rle'esa' bee bene equie cuenda'

Jesucristo

(Lc. 12:51-53; 14:26-27)

34 La ri'ihua elliebacu' nú tia uriña lu iliulabe para nú ri'á nú aca tucunecatse bee bene lu sa'bee, sino equie nú chili arqui' bee bene li'á liunu sa'bee. **35** Bee pa liunu cuna bee endu'lla, nu bee naa liunu cuna bee xinchiu'cu nu bee llixí liunu suegra!. **36** Nu bee bene liñi tucu ni'i le'catsia li'ibeella chana arqui' sa' beella.

37 Bene enu seca pa' nu na' masesca'lá luquela li'á, leca modo aca nze'e benea, le'ca esquie enu mase seca endu' urre xinchiu'cu luquela li'á, le'ca leca modo aca nze'e benea. **38** Bee bene enu niarqui' ye'ta quie li'á pero la niarqui' nú nehuana zeca equie cuenda' li'á, leca modo aca bee nze'e bee benea. **39** Bene enu maselá seca elunehuañi nú rlu'culla lu iliulabe quie' enta bichia nú laxu nucua'; pero bene enu ati equie cuenda' li'á, lu'culla elunehuañi lu Diose.

Nu' xi ati' bee bene' Diose

(Mr. 9:41)

40 Bee bene enu ri'i caso li'ihua, ri'i caso bee nze'e li'á; nu bee bene enu rri'i caso li'á le'ca rri'i caso bee nze'e Pa liñibe enu uxe'la li'á. **41** Le'ca bee bene enu rri'i caso tucu profeta equie nú neca profeta quie' enu uxe'la Diose, le'ca ati'lla

premio nú ati' profeta lu Diose. Nu bene enu ri'i caso tucu bene enu rri'i nze'ca, le'ca iguale ati'lla premio nú ati' bene enu rri'i nze'ca lu Diose. **42** Nu titse bee bene enu liqui' masia tucu basu inza luhua lunú necahua bee benea, li'á nia luhua nú dete' Diose premio lubee bene ze'e.

Uxe'la Juan Bautista bee bene'lla lu

Jesuse

(Lc. 7:18-35)

11 Chenu ulaxu nú unibiya' Jesuse lu chi'chiucu bee bene'nu nú xi che ri'i beella, che uchiul'nu nze zete'nu nu nze tixiule'enu Stichia' Diose lubee bene lubee eyeche nú nchiucu' lu iliu ze'e.

2 Nu chenu nchiñi Juan Bautista ni'cu' ubene'lla luye nú rri'i Jesuse. Che uxel'alla chiucu chuna bee bene'lla, **3** para nú che nedichia' beella lu Jesuse:

—¿Li'ilu ncalu Cristo enu nzu nú nze'ta la, urre lluaquieeru stucu enu enta la?

4 Che ucuaqui Jesuse lubeella:

—Uquia tixiule'ehua lu Juan Bautista lunú rlañi'hua nu lunú riene'hua. **5** Udixiule'ehua lulla nú rlañi'la' bee bene enu nequie'lu nu bee bene enu necuxu see la bee nze'e, nu le'ca uyeca'la' bee bene enu seca elichia nú lee lepra, nu bee bene enu nenguata' riene'la', nu bee bene enu unguti uhuañi zeca bee nze'e, nu bee bene enu seca elitsi riene'la' bedichia' nze'ca' Diose nú tsila'a li'ibeei. **6** Nia neca lu cuenda' bee bene enu la chiecu' arqui' nú nzeli arqui' li'á.

⁷Chenu nziue bee bene' Juan enu uya lu Jesuse, che uquixie Jesuse nú uninu lubeen bene ze'e equie cuenda' Juan, nu uninu lubeella:

—¿Ti uya bi'yahua lu yuu achi elu la nucua'a bee bene? ¿Ti secahua nú neca bene enu uya bi'yahua, tucu etaa nú rcuñi bii la? ⁸Urre ɿxa naa bene enu uya bi'yahua? ¿Xie' uya bi'yahua tucu bene enu nutu laquie fiñu la? Li'iuhua nediyahua nú bee bene enu rutu laquie fiñu liñi palacio nucua'a beella. ⁹¿Ti uya bi'yahua che? ¿Uya bi'yahua tucu profeta la? Neli nú scua necane, pero masesca'lá neca equiella luquela tucu profeta. ¹⁰Equie cuenda' Juan quie' rni lu ichi' Stichia' Diose elu rni:

Xe'lлаa tucu benea cha rluti lulu, para nú reche'lla inziu'lü.

¹¹Li'á nia luhua nu luye bee bene enu nucua'a lu iliulabe lá chu'u ni' tucu bee bene enu masesca'lá neca equie tucu nú neca equie Juan Bautista. Pero bene enu menola neca equie liñibe elurnibya' Diose nze'e mase neca equie luquela Juan.

¹²Desde bichia nú ube'ta Juan Bautista nu hasta nee, huaxi bee benechiqui' rcula'na xa modo chu'u elurnibya' Diose. Nu bee bene enu neli rcula'na nú chu'u elu rnibya'nú, li'ibeella neca beella enu chu'u ze'e.

¹³Ley nú udete' Diose lu Moisés cuna yebee profeta udixiule'e beella nú xi nze'ta aca, hasta bichia nu uriña Juan, ¹⁴nu tunu li'iuhua chili arqui'huá nú nia luhua, nú Juan neca profeta Elías enu uni bee profeta nú riña. ¹⁵Titse bee bene enu niarqui' nú yene' nú rnia, quie'e diaca nze'e.

¹⁶¿Xa nia luhua nú xa neca bee bene enu nehuañi lu iliulabe quie' nee? Li'á nia luhua nú neca beei xi neca bee endu' enu rcula'a ru'u i'ya rita nu rixiali beei lusa' beei, nú rnibeei: ¹⁷"Ungularu chí para nú ye'ehua nu né ye'ehua, nu le'ca ungularu canción nú nehuana se, nu né una'hua." ¹⁸Scua necahua xne uriña Juan Bautista nú lá aculla nu le'ca la hue'lla viñu nu rnihua nú nchiñi benechiqui' arqui'lla.

¹⁹Neequie uriña li'á Bene enu uxel'a Diose, nú racua nu rue'a biñu, nu rnihua nú racuxeta'a nu riu' arquia rue'a viñu nu rquietea bee bene enu rlu'cu dula nu cuna bee bene enu rri'i cubre impuesto para Roma. Pero yebee bene rri'i beya', li'ibeella nediyahua' beella nú neca nze'ca lunú rri'i Diose.

Bee eyeche nú la niarqui' zucu'

Stichia' Diose

(Lc. 10:13-15)

²⁰Chequie uquixie Jesuse nú uqui'ya'nú bee bene bee eyeche elu mase uri'inu bee milagro, xne né tsana' arqui'beei stula beei. Nu uninu lubeei:

²¹—¡Cue'huá bee bene Corazín! ¡Cue'huá bee bene Betsaida! Xne tunu eyeche Tiro cuna eyeche Sidón a aca bee milagro nú unga lachihua, xi tiembula a tsana' arqui' bee bene ze'e stula beei, nu le'ca a utu beei laquie natsa nu a tiqui beei tii equie beei, xi neca tucu seña nú lube' nú nehuana nzu arqui'beei. ²²Pero li'á nia luhua nú bichia chenu laxu iliulabe, maselá juerte castiya zecahua luquela nú zeca bee bene eyeche Tiro cuna eyeche Sidón. ²³Nu li'iuhua bee bene

eyeche Capernaum, ¿la za' arqui'hua nú riala chu'uhua liñibe? ¡Xne li'ihua riala chu'uhua hasta elu mase aquíe rqui' ebila! Xne tunu eyeche Sodoma a aca bee milagro nú unga lachihua, che pianu hasta bee bichia quie' nchiucu'sca' bee eyeche cua' che.

²⁴Pero li'á nia luhua nú bichia chenu laxu iliulabe mase juerte castiya nú zecahua luquela castiya nú zeca bee bene eyeche Sodoma.

Tucutsia Jesuse nediyá' ti neca Pa liñibe (Lc. 10:21-22)

²⁵Bee bichia ze'e uni Jesuse: "Pa liñibe li'ilu enu rnibya' liñibe cuna lu iliulabe, zucu ayaa li'ilu xne ulube'l lu lubee bene enu lecaxi reca, nu ucachí'lu lubee bene enu reca nu rri'i beya!. ²⁶Scua necane Pa liñibe, xne scua niarqui'lu nú acane.

²⁷'Uliquí' Pa Diose nú nibiya'a luye beenú nu!. Lecati nediyá' ti neca Jesucristo lli'ñii Diose, Diose tsia nediyá' nucua', le'ca tucutsia Jesucristo cuna bee bene enu nzeli arqui' li'inu nu'l Diose. ²⁸Yehua bee bene enu nellaca nzenala lunú neca bee custumbre, nu yehua bee bene enu nellaca lu stula, utehua cuna li'á nu li'á ri'á nú tsulachihua. ²⁹Uzu'cu'hua stichia'a, nu ze'tehua nú acahua bene nze'ca enu lle'na nzu arqui' tucu nú necaa. Che ri'á nú huañi nze'cahua. ³⁰Xne laca neríña' nú zucu'hua stichia'a nu le'ca laca neríña' nú ri'ihua lunú niarquia.

Ucha'ñi bee bene' Jesuse trigo bichia nú sulachi bee bene Israel

(Mr. 2:23-28; Lc. 6:1-5)

12 Tucu bichia nú sulachi
bee bene Israel, udetenu

Jesuse bee bene'nu lu yuu elu nu'
trigo, nu chequei uquixie nú ulia'na'
beella nu unguxi beella tuu lu
trigo nu uzu'cu beellae nu udacu
beellae. ²Chenu ulañi' bee fariseo
nú ucha'ñi bee bene'nu trigo, uni
beella lu Jesuse:

—Bi'yacuru, bee bene'lu rri'i lunú
la yala ri'i beei bichia nú sulachi
bee bene.

³Nu ucuauqui Jesuse lubeella:
—¿Xie' lasca' ulahua lu ichi'
Stichia' Diose elu rni nú xa urí'i
David cuna bee bene enu nulla
tucu besé chenu ulia'na' beella la?
⁴Uyu'u David liñi indu' Diose nu
udete' ule'ya pá nú necale'ya yalla
nu udacullae nu le'ca udete'lla pá
cua' udacu bee bene enu nuulla
añinzuka nú bee ule'yatsia nu' modo
nú acu bee pá cua!. ⁵¿Urre xie' lasca'
ulahua lu ley nú udete' Diose lu
Moisés elu rni nú laca dula lunú rri'i
bee ule'ya liñi indu añinzuka núa
tsulachi beella bichia nú sulachi
bee bene la? ⁶Nu li'á enu nzu cuna
li'ihua, nia luhua nú masela neca
equiea luquela indu. ⁷Tunu li'ihua
rrí'ihua beya' xi rni lu ichi' Stichia'
Diose elu rni: "Niarquia nú hua'a
arqui'hua bee bene luhuare nú
liqui'hua u'na bee nañi lua." Tunu
rrí'ihua beya' xi rni bee bedichia'
cua' che lecalí xi ta'quiyahua bee
bene enu la lu'cu ni' tucu equiya.
⁸Nu li'á Bene enu uxel'a Diose le'ca
rlu'cua nú rnibya'a lu bichia nú
sulachi bee bene.

Bene enu ubichicu' ya

(Mr. 3:1-6; Lc. 6:6-11)

⁹Chenu ulaxu nú udete Jesuse
ze'e uyu'unu liñi indu nú nzuci

enza ze'e. ¹⁰Nu liñi indu ze'e nzucu tucu niyu enu ubichicu' techu ya, nu lunú rcua'na bee fariseo nuxi ta'quiya beei li'inu che unedichia' beei lunu:

—¿Xie' nu' modo nú riyecalu tucu bene enu riti bichia nú sulachi bee bene la?

¹¹Chequie uni Jesuse lubeei:
—Tunu tatusuhua rlu'cu tucu sanchi nu yecataí liñi tucu i'chiiu bichia nú sulachi bee bene, ¿xie' la chehuahuaí bichia cua' la? ¹²Nu imasela huaxi seca tucu bene luquela tucu sanchi! Enze'e nu' modo nú ri'i bee bene nú neca nze'ca bee bichia nú sulachi bee bene.

¹³Che uninu lu niyu enu ubichicu' ya ze'e:

—Ulí yalu.

Che ulí niyu ze'e yai nu hora ze'e uyeca' yai, nu nae tucu nú naa stucu chu yai. ¹⁴Nu chenu uchiu'u bee fariseo liñi indu ze'e, uquixie beei ubedichia' beei nú xa modo ri'i beei para nú uti beei Jesuse.

Uyalu bee bedichia' equie cuenda' Jesuse

¹⁵Pero chenu urí'i Jesuse beya' nuxi niarqui' bee fariseo ze'e ri'inu li'inu uchiu'unu ze'e nzanu, nu huaxi bee bene uyaquie li'inu, nu uriyecanu ye bee bene enu riti, ¹⁶nu uninu lubeei nu la ixiule'e beei lu ni' tucu bee bene nú uriyecanu beei. ¹⁷Scua unga para nú uyalu tucu nú uni profeta Isaías chenu unilla:

¹⁸—Bi'yacuruhua li'inu necanu enu ucaña para nú zibi' lua, Li'inu enu chiqui' se'caa, nu chiqui' ñia nzu arquia lunu.

Nu xe'la Espíritu Santoa equieno,
para nú ixiule'nu lubee bene iliulabe xa rnibiya'a.

¹⁹Nu ni' tucu bene la liununu, nula bixialínu, nu la necanu bene enu bixialí labe bee calle.

²⁰Lecaxi ri'inunu bee bene enu la nehuañi nze'ca, nu la nitilunu bee bene enu lle'natsia nzeli arqui' xi neca qui sera nú llenetsia rululá.

Hasta nú ri'inu ana nú aca elu usticia tucu nú necane.

²¹Nu nzuculu bee bene iliulabe nú li'inu tsila'anu li'ibeella.

Uni bee bene nú rlu'cu Jesuse poder nú rlu'cu beze'lú

(*Mr. 3:19-30; Lc. 11:14-23; 12:10*)

²²Uyayu bee bene tucu bene enu la ye'e i'culu nu la ni lu Jesuse, xne nchiñi benechiqui' arqui'i. Nu uriyeca Jesuse li'i nu uquixie nú uni nu uye'e i'cului. ²³Chequie ye bee bene ze'e chiqui' nzenu arqui'beei nú unibeei:

—¿Xie' laca benecua' enu necadichia' nú nze'ta lu familia' David la?

²⁴Chenu ubene' bee fariseo nucua' unibeei:

—Beze'lú enu rnibiya' lubee benechiqui' neca enu udete' poder lu bene cua' nú rlualla benechiqui' arqui' bee bene.

²⁵Pero nediyá' Jesuse lunú rri'i beei elliebacu', che uninu lubeei:

—Ye bee nación nu bee eyeche llene nú la neca tucunecatse rle'esa'e, le'ca scua tunu tucu famili

liñi tucu ni'i laneca tucu necatse beella rle'e sa'lla. ²⁶Le'ca scua tunu rliunu beze'l lu le'catsia li'i. ¿Xneca modo nū di'ya elurnibuya' nū rlu' cui che? ²⁷Li'ihua rnihuá nū rluaa bee benechiqui' arqui' bee bene cuna poder beze'l lu. Pero tunu scua necane, ¿ti rdete' poder lubee bene'hua para nū rlua beei bee benechiqui' arqui' bee bene che?, le'ca nia luhua nū li'ibeei rlube' beei nū la neli nū rnihuá. ²⁸Xne liá rlua bee benechiqui' arqui' bee bene equie cuenda' Espíritu Santo' Diose, nucua' rlube' nū uriñala nū rnibuya' Diose luhua.

²⁹Xne leca modo nū chu'u bene ni'i tucu bene enu naaqui para nū cachi'i stene'lla, tunu la llica' cuxuilla. Che scua nu' modo nū cachi'i stene'lla.

³⁰Bee bene enu la nzú chua, rri'i cundra bee nze'e liá, nu bee bene enu la ri'i elietsa lua, rca nze'e nū aca huaxilá bee banea.

³¹Enze'e nia luhua nū ri'i Diose perdona ye dula nū rri'i bee bene cuna ye bee bedichia' chi'qui' nū rni bee bene. Pero la ri'inu perdona bee bene enu rni bee bedichia' chi'qui' equie cuenda' Espíritu Santo. ³²Rri'i Diose perdona titse bee bene enu rni bedichia' chi'qui' equie cuenda' liá, Bene enu uxel'a Diose, pero titse bene enu nechi'qui' Espíritu Santo leca' perdona para bee benecua' ni' lu iliulabe quie' nu ni' liñibe.

Lunú rri'i bee bene rlube' nū xa neca bene

(Lc. 6:43-45)

³³Li'ihua nediyahua nū aca nze'ca rayu ndixi nze'ca lue, nu

aca nū la neca nze'ca la ayu ndixí nze'ca lue, xne lu cuenda' ndixí nū rayu lu aca nu'l u bene nū xi acae. ³⁴iLi'isi'hua netsiñahua xi netsiña bee be'l a! ¿Xa modo nū nihua bee bedichia' nze'ca chenu li'ihua necha necahua? Bee bedichia' nū nu' arqui' bee bene enze'e rni bene. ³⁵Bene nze'ca rni bedichia' nze'ca, xne nucua' nu' arqui'lla. Nu bene enu necha neca rni bee bedichia' nū necha neca xne nucua' nu' arqui'lla. ³⁶Pero liá nia luhua nū bichia nū hualu Diose lu cuenda' bee bene iliulabe, che ye bee bene dete' cuenda lu Diose luye bee bedichia' nū necha neca unibeei. ³⁷Xne equie cuenda' stichia' bene, scua rlube' tunu yala nū zecalla castiya nū dete' Diose lulla, nu tunu la yala zecalla castiya.

Unacu' bee fariseo lu Jesuse nū ri'inu tucu milagro

(Mc. 8:12; Lc. 11:29-32)

³⁸Chequie chiucu chuna bee fariseo cuna bee ulaxcuela enu reca ley uni lu Jesuse:

—Maestro, niarqui'ru nū lañi'ru ri'ilu tucu milagro.

³⁹Che ucuaquí Jesuse lubeei:
—Li'ihua bee bene enu necha rri'i nu sequieno bee bene rnacu'hua nū ria'a tucu milagro, pero la riá ní'tucu milagro luhua, lañi'tsiahua tucu nū ulle'ca Jonás. ⁴⁰Xne tucu nū ullutse Jonás chuna bichia cuna chuna rula' xla'cu be'na', le'ca scua liá Bene enu uxel'a Diose llutsea liñi yuu chuna bichia nu chuna rula'. ⁴¹Nu bichia chenu laxu iliulabe chenu chiu'lue lu cuenda' bee bene tiembu quie', che huañi

zeca bee bene eyeche Nínive ni nú riala bee bene cua' castiya xne bee bene eyeche Nínive uzucu'beei nú uni Jonas chenu unilla lubeei nú huañi beeí tucu nú niarqui' Diose. Nu li'á Jesuse enu nzu cuna li'ihua maselá neca equiea luquela Jonás. **42** Nu bichia chenu laxu iliulabe, chenu hualu Diose lucuenda' bee bene, chequie reina eyeche nú lee Sabá huañi zecalla nu nilla nú riala bee bene enu nucua'a nee castiya nú dete' Diose. Xne li'illa nze'talla enza mase istu, nu ube'talla para nú ubene'lla lunú reca arre Salomón, nu li'á Jesuse enu nzu cuna li'ihua, másela neca equiea luquela arre Salomón.

**Chenu rebenchila' zeca benechiqui'
arqui' tucu bene**
(Lc. 11:24-26)

43 Chenu xiu'u tucu benechiqui' arqui' tucu bene, enzei bee luguare elu nebichi rcua'nai elu tsulachii, nu chenu la llela'i elu tsulachii, che rri'i elliebacu': **44** Nú rni: "Mejora benchila' zecaa arqui' bene elu uchiu'a." Nu chenu ubenchila' zecai llela'i arqui' bene elu uchiu'i xi neca liñi tucu ni'i nú nelata, nu nelucu' nu rna nze'ca. **45** Chequie nzetucui se achi benechiqui' enu maselá necha rri'i luquela li'i, nu chu'u ye beei arqui' bene ze'e, nu che masesca'lá necha aca bene ze'e lunú necalla hua'tu. Le'ca scua zeca bee bene enu necha rri'i nucua'a tiembu quie'.

Na' Jesuse cuna bee bichinu
(Mr. 3:31-35; Lc. 8:19-21)

46 Rdichia' nusca' Jesuse bee bene ze'e, chenu uriña na'nu cuna bee

bichinu nucua'a eli'ya' nu niarqui' beella bedichia'nu beella li'inu. Nu lunú nucua'a beella eli'ya', **47** che uyatixiule'e tucu bene lu Jesuse nú unilla lunu:

—Nzu na'lú cuna bee bichilu eli'ya' nu niarqui' beella bedichia'nu beella li'ilu.

48 Pero uninu lu bene enu uya udixiule'e lunu:

—¿Ti neca naa, nu ti neca bee bichia?

49 Chequie ulube'yanu lubee bene'nu, nú uninu:

—Bee benequie' neca naa cuna bee bichia. **50** Xne titse bee bene enu rri'i lunú niarqui' Diose Pa liñibe, bee nze'e neca bee bichia, cuna bee zanaa nu naa.

**Uni Jesuse ejemplu' tucu bene enu
nzetu' nii trigo**
(Mr. 4:1-9; Lc. 8:4-8)

13 Le'ca bichia ze'e uchiu'u Jesuse ni'i elu uya'nanu nu uya zucunu ru'u inzatu'. **2** Nu lunú chiqui' huaxi bee bene uyetesa' lunu, che uquieno equie tucu barco nu uzucunu liñii nu ye bee bene ucua'a lunu ru'u inzatu' ze'e. **3** Nu huaxi beenú uzete'nu bee bene ze'e cuna puro bee ejemplu. Nu uninu lubeei:

—Uchiu'u tucu bene nzetu' nii, **4** nu chenu rdu'lla nii, uzana' lle'na ebichi ze'e lu inziu, nu uriña bee iñi udacue. **5** Lle'nae uzana' leta quiee, elu leca huaxi yuu, nu yexetsia uliñi ebichi ze'e xne la aca aquié lu yuu. **6** Pero chenu uliñi bichia, nu unga nele ungu'lune nu ubichii xne laca aquié nchiñi lue lu yuu. **7** Nu lle'na ebichi uzana' leta bee eche nu

chenu enta ru'cue, ubichii xne uri'i eche ana lue. ⁸Pero lle'na ebichi nú uzana' lu yuu ru'cu, chiqui' unguyu'e, mae unguyu' tucu ayu'u ebichi lu, nu mae unguyu' sesenta ebichi, nu mae unguyu' treinta ebichi scua unguyu' bee. ⁹Titse bee bene enu niarqui' yene' nú rnia, iquie'e diaca nze'e!

Udixiule'e Jesuse xinu uninu bee ejemplu

(Mr. 4:10-12; Lc. 8:9-10)

¹⁰Che uyabica bee bene' Jesuse lunu nu unidichia' beella lunu xinu sete'nu bee bene cuna puro bee ejemplu tsia. ¹¹Nu ucu aquinu nú uninu lubeella:

—Li'i hua uliqui' Diose nú ri'i hua beya' xneca neca lunú a'chi neca nú rnibya'nú. Pero lubeen benequie' lá dete'nu nú ri'i beella beya' nucua!. ¹²Xne bee bene enu rri'i beya' Stichia' Diose, liqui'lánú nú ri'ilá beella beya' stichia'nú, pero bee bene enu lle'natsia rri'i beya' stichia'nú, nu la la'nalla nú ri'ilálá beya' stichia'nú hasta lu lle'natsia nú rri'lla beya' la ria'lla beya' nucua!. ¹³Enze'e rnia lubeella equie cuenda' bee ejemplu tsia, xne mase ri'ya beella nu neca xi neca nula lañi' beella nu mase riene' beella pero neca xi neca nu la yene' beella. Nu la ri'i beella beya!. ¹⁴Scua rialu nú uquie'e profeta Isaías chenu unilla:

Mase riene' beei, pero la ri'i beei beya!.

Nu mase ri'ya beei,
pero neca xi neca nú la lañi'beei.

¹⁵Xne chiqui' unga nziti arqui'beei,

nu rri'i beei xi neca nú la lañi'beei,
nu xi neca nú nenguata' beei para nú la lañi'beei,
nu la yene' beei nu la ri'i beei beya',
xne la zela' beei ye'ta beei cuna li'á,
para nú ri'a perdonna stula beei.

¹⁶Pero li'i hua: Ñia neca lu cuenda'hua nú rlañi'hua lunú rlañi'hua nu riene'hua lunú riene'hua. ¹⁷Xne li'á nia luhua nú huaxi bee profeta nu huaxi bee bene enu uhuañi nze'ca uniarqui' beella lañi' beella lunú rlañi'hua. Nu né lañi' beella nucua'. Le'ca uniarqui' beella yene' beellla lunú riene'hua, pero né yene' beellae.

Udixiule'e Jesuse xi rni ejemplu nú uninu

(Mr. 4:13-20; Lc. 8:11-15)

¹⁸'Uzu'cu' diacahua ne ixiule'a xi rni ejemplu' bene enu uya tu' nii trigo. ¹⁹Bee bene enu riene' Stichia' Diose nu la ri'i beya' xi rnii, li'i beei neca beei xi neca ebichi nú uzana' inziu, xne chu nze'ta beze'lu nu raxii Stichia' Diose nú ubene'la' beei. ²⁰Nu bee ebichi nú uzana' leta quiee, neca xi neca bee bene enu riene' Stichia' Diose nu ñia riucu arqui'beei, ²¹pero lunú neca beei xi neca bee huañi nú leca huaxi luu la nzuta' arqui'beei chenu nehuana seca beei nu rana arqui' bee bene li'i beei, che sana' arqui' beei Stichia' Diose nú ubene'la' beei. ²²Bee ebichi nú uzana' leta eche, neca xi neca bee bene enu riene' Stichia' Diose, pero lunú máse nzenu arqui'beei nú nu' lu iliulabe quie'

nu máse seca beeí eluxene nú nu'
lu iliulabequie', che ye bee nucua'
rrí'i nú sana' arqui'beeí Stichia'
Diose. Nu lecaxi zibi' nú ubene'beeí
Stichia' Diose che. ²³Pero bee
ebichi nú ubenii lu yuu ru'cu, neca
xi neca bee bene enu riene' Stichia'
Diose nu rrí'i beya'e, nu li'lbeeella
rrí'i beella ana bee bene para nú
chili arqui'beeí Stichia' Diose, tucu
nú neca bee ebichi nú unguyu' tucu
ayu'u ebichi lu, nu unguyu' sesenta
ebichi, nu unguyu' treinta ebichi.

**Ejemplu' bee huañi nú
nu' leta bee trigo**

²⁴Uni Jesuse stucu ejemplu lubee
bene ze'e:

—Lunú xneca rnibiya' Diose
neca xi neca tucu bene enu
uquienii ebichi nze'ca lu yuu';
²⁵pero diquila nú ra'tse bee bene
uriña bene enu rana arqui' li'illa
uquienii ebichi' huañi nu la zibi'
leta bee trigo'lla, nu chu nza
nze'e. ²⁶Chenu uru'cu trigo nu
uliñi tuu lue, le'ca nuu bee huañi
nu la zibi' ze'e nu' leta bee uru'cu.
²⁷Nu che uyatixiule'e bee moso'lla
lulla, nu unibeei lulla: “Detá, lanu
ebichi nze'catsia uquienii lu
yuu'lu la, ¿cá uchiu'u bee huañi
nú nu' leta bee trigo?” ²⁸Che uni
bene enu neca stene trigo: “Tucu
bene enu rana arqui' li'á uri'i
nucua!.” Che uni bee moso' ze'e
lulla: “¿Niarqui'llu nú nzetaxiru
bee huañi nu la zibi' cua' letae
la?” ²⁹Che unilla lubeei: “Mejora
nú la axihuane, xne canu chenu
axihuane le'ca nuu bee trigo yetsu.
³⁰Mejora nú zela'ahua nú ru'cu bee
cuna trigo hasta chenu aca ula'cu'

trigo. Che nia lubee bene enu ri'i
ula'cu' trigo nú rluti quiete'sa'xu
beeí huañi cua' nu ri'i menuxu
beeí para nú chiquine. Cheelá
quiete' sa'beeí trigo nu duche' beeí
trigo elu riala nú chuche'e.”

Ejemplu' ebichi mestasa

(Mc. 4:30-32; Lc. 13:18-19)

³¹Le'ca uni Jesuse stucu ejemplu
lubee bene:

—Lunú xneca rnibiya' Diose
neca xi neca tucu ebichi' mestasa
nú rquienii tucu bene lu yuu'lla.
³²Nú masela me'e luye bee ebichi.
Pero chenu rru'cue, masesca'la
llenee luye beelá bee huañi, nu
rru'cue xi rru'cu tucu aca, hasta
nú rreche' bee iñi exlia'tse' beeí
lu ellutsa'e.

Ejemplu' levadura

(Lc. 13:20-21)

³³Le'ca uni Jesuse stucu ejemplu
lubee bene:

—Lunú xneca rnibiya' Diose neca
xi neca levadura nú rcucha tucu
una'a cuna chuna medida harina
para nú tsebichi ecucu.

Xinu uzete' Jesuse puro bee ejemplu
(Mr. 4:33-34)

³⁴Ye beenú uzete' Jesuse bee
bene, li'inu uzete'nu li'ibeei cuna
puro bee ejemplu nu lecaxi nu lá
zete'nu li'ibeei sin lu cuenda' bee
ejemplu tsia. ³⁵Scua ungae para nú
uyalu tucu nú uni profeta:

Nia lubee bene cuna puro bee
ejemplu.

Nia lubee bene beenú a'chi'
neca lubeei desde chenu
ureche' Diose iliulabe.

Udixiule'e Jesuse xi ni ejemplu' huañi nú la zibi' nu' leta trigo

36Chenu ulaxu nú uni Jesuse lubee bene ze'e che inziue beella nu uyu'u Jesuse liñi ni'lí cuna bee bene'nu, nu uni bee bene'nu lunu:

—Udixiule'e luru xi rni ejemplu' bee huañi nú la zibi' nú nu' leta bee trigo.

37Nu ucuaquinu lubeella nú uninu:

—Bene enu udu'nii ebichi nze'ca ze'e, neca li'á Bene enu uxel'a Diose,

38nu lu yuu elu uyu'u nii neca iliulabe. Nu bee ebichi nze'ca neca bee bene' Diose, nu bee huañi nu la zibi' neca bee bene enu neca bee bene' beze'l'u, **39**nu enu rana arqui' li'á uquienii huañi nu la zibi' ze'e neca beze'l'u. Nu ula'cu neca xi neca chenu laxu iliulabe, nu bee enu rri'i ula'cu neca bee ángele' Diose. **40**Nu tucu nú riete' sa' huañi nu la zibi' para nú chiquine, le'ca scua aca chenu laxu iliulabe. **41**Li'á Bene enu uxel'a Diose lu iliulabe, xe'laa bee ángelea para nú huachu beenu bee bene enu necha rri'i leta bee benea, nu cuna ye bee bene enu rri'i dula. **42**Nu tsil'qui beenu bee bene cua' luquii liñi horno, elu una' beella nu acuxa' laya beella. **43**Che bee bene enu nehuañi tucu nú niarqui' Diose, aca rulusiqui' beella elurnibya' Diose Pa liñibe xi rulusiqui' bichia. Bee bene enu niarqui' nú yene' nú rnia, quie'e diaca nze'e.

Ejemplu' tucu nú huaxi seca nú nuche' a'chi'

44'Lunu xneca rnibya' Diose neca xi neca tucu nú huaxi seca

nú nu'che' a'chi' lu tucu yuu. Nu tucu bene ullela'e nu udu'che' a'chi' zecallae elu ullela'liae, che chiqui' ñia nzu arqui'lla nze tutilla yebee stene'lla para nú tsilla yuu ze'e.

Ejemplu' perla nú huaxi seca

45'Le'ca nia luhua nú lunú xneca rnibya' Diose neca xi neca tucu bene enu rri'i berexe nu rcua'nalla perla nú huaxi seca, **46**nu chenu ullela'lla tucu perla nú huaxi seca, che nzalla nze tutilla yebee stene'lla nú rlu'culla para nú tsilla perla ze'e.

Ejemplu' ixiu nú rucu bela

47'Le'ca scua lunú rnibya' Diose neca xi neca tucu ixiu nú rdu' bee bene lu inzatu' nú rucu yelu clasia bee bela. **48**Nu chenu ucheela ixiu ze'e, ulua beellae ru'u inzatu', nu ze'e ucua'a beella ucañi beella bee bela enu nu' liñii, nu udu'che' beella bee bela nze'ca liñi llume, nu utsil'qui beella bee bela enu la zibi'. **49**Le'ca scua aca chenu laxu iliulabe; nze'ta bee ángele'nu para nú huachu beenu bee bene enu necha rri'i leta bee bene enu rri'i nze'ca, **50**nu tsil'qui bee ángele bee bene enu necha rri'i cua' lu quii liñi horno, elu una' beella nu acuxa' laya beella.

Ejemplu' tucu bene xene

51Nu uni Jesuse lubee bene'nu:

—¿Uri'ihua beya' yebee nú unia la?

Che uni beella:

—Aahua', uri'iru beya'.

52Chequie uni Jesuse lubeella:

—Yebee ulaxcuela enu reca ley, nee rri'ilaa beella beya' xa neca elurnibya'

Diose, li'ibeella neca beella xi neca tucu bene enu neca stene tucu ni'i enu nuche' beenú nuche'e nu recalla rcañilla beenú cuqui cuna beenú uxu leta ye beenú rlu'culla.

Ubenchila' Jesuse eyeche Nazaret

(Mr. 6:1-6; Lc. 4:16-30)

53 Chenu ulaxu nú udixiule'e Jesuse xi rni bee ejemplu cua' lubee bene, uchiu'unu ze'e nzanu **54** nu uriñanu lachinu. Che uzete'nu bee bene liñi indu eyeche ze'e. Chiqui' nzenu arqui' bee bene ze'e nú unibeei lu sa'bee:

—¿Cá unga nucua' ye nú reca nucua'? ¿Nu xneca reca nucua' rri'i nucua' bee milagro? **55** ¿Xie' lanu Iliana' bene enu rri'i riña' ru'u bangu nucua', nu lanu María neca na' nucua'la? ¿Nu lanu bee bichi nucua' neca Jacobo, José, Simón nu Judas la?

56 ¿Nu xie' lanu eyeche quie' nucua'a bee zana nucua' la? ¿Cá unga nucua' lu ye nú chiqui' reca nucua' che?

57 Nu lá ri'i caso beeí Jesuse. Che uninu lubeei:

—Catse rlu'cu bee bene ula'na lu tucu profeta. Pero lachilla nu ni'lla, la lu'cu bee bene ula'na lulla.

58 Nu né ri'inu huaxi bee milagro ze'e xne né chili arqui' bee bene ze'e li'inu.

Unguti Juan Bautista

(Mc. 6:14-29; Lc. 9:7-9)

14 Timbu ze'e arre Herodes enu rnibiya' lu iliu Galilea, ubene'lla ye beenú rri'i Jesuse, **2** nu unilla lubee moso'lla:

—Juan Bautista nucua', uhuañi zeca. Enze'e rlu'culla poder cua' nú rri'illa bee milagro.

3 Uni Herodes scua xne li'illa unibiya'lla nú ulluna Juan nu uyaca'culla cuna cadena uyu'ulla ni'cu'. Uri'i Herodes scua equie cuenda' Herodías, enu unga una'a bichilla Felipe, **4** xne uni Juan lu Herodes:

—La yala nú zucunuulu le'catsia una'a bichilu.

5 Nu niarqui' Herodes nú utilia Juan, pero xiquilla bee bene, xne ye bee bene rni nú neca Juan tucu profeta.

6 Pero chenu reca eliñi nú rellu'cu Herodes lana, che uye'e xinchiu'cu Herodías lubee bene enu nezene' lu eliñi ze'e, nu chiqui' uyu' arqui' Herodes xa uye'enchu, **7** nu hasta uquie'ella Diose nú dete'lla xitse nú nacu'nchu lulla. **8** Nu na' endu' cua' uni lunchu, nú ninchu lu Herodes:

—Uli'qui' lluca equie Juan Bautista liñi tucu pliato lua.

9 Che nehuana utsu arqui' arre Herodes, pero lunú uquie'elalla Diose lu ye bee bene enu nezene' lu eliñi'lla nú dete'lla xitse lunú nacu'nchu, enze'e unibiya'lla lubee sundadu'lla nú ye'tayu beeí nú rnacu'nchu lulla. **10** Che unibiya'lla nú chiecu' bee sundadu lluca equie Juan liñi ni'cu', **11** nu uriñayu beeí lluca equie Juan nchiucu' liñi tucu pliato, nu udete' beeii yanchu, nu chu udete'nchue ya na'nchu.

12 Che uriña bee bene' Juan unguaya' cuerpo' Juan nu uya ca'chi' beella cuerpo'lla, cheelá uyatixiule'e beella lu Jesuse lunú unga.

Udete' Jesuse nú udacu ayu' mili bee bene

(Mr. 6:30-44; Lc. 9:10-17; Jn. 6:1-14)

13 Chenu ubene' Jesuse nú unguti Juan, uchiu'unu ze'e nza tuculi'nu

liñi tucu barco, tucu luhuare elu lecalí tinu', para nú nzu tuculi'nu ze'e. Pero chenu urj'i bee bene beya' nú nzanu uchiu'u bee bene bee eyeche enza ze'e nzenala li'inu nu se e'ya beei nzuebee elu riñanu. ¹⁴Chenu ulaca Jesuse equie barco, ulañi'nu nú tesquiela' huaxi bee bene nucua'a ze'e nu uhua'a arqui'nu beella, che uriyecanu bee bene enu riti nuya' beella. ¹⁵Nu chenu uchela, uyabica bee bene'nu lunu nu uni beella lunu:

—Uchela nee nu ca'a neca tucu luhuare elu la nucua'a ni' tucu bee bene. Uni' lubee bene nú chue beei lubee eyeche para nú tsi beei nú acu beei.

¹⁶Nu uni Jesuse lubeella:

—La qui'ña nú yue beei, li'ihua ude'tehua nú acu beei.

¹⁷Nu uni beella lunu:

—Pero rlu'cutsiaru ayu' pa cuna chiucu bela.

¹⁸Che uni Jesuse lubeella:

—Uteyuhuane ca'a.

¹⁹Chequie unibiya'nu nú cua'a bee bene añi ze'e lu ixi xata. Nu una'tsenu lu ayu' pa ze'e cuna rucu bela nu ubi'yanu enza liñibe nu udete'nu che'tsa lu Diose. Nu chu ule'enu bee pa cua' udete'nu ya bee bene'nu para nú ritsi' beellae lu ye bee bene. ²⁰Ye bee bene ze'e udacu beei hasta nú ubela' beei, nu uquietesa'sca' beei chi'chiucu llume bee pa nú uya'ná. ²¹Bee enu udacu neca casi ayu' mili puro bee niyu, sin nú bacu' bee una'a cuna bee endu'.

Utse Jesuse lu inzatu'

(Mr. 6:45-52; Jn. 6:16-21)

²²Che chu unibiya' Jesuse nú chu'u bee bene'nu liñi barco para

nú riculubeella chue beella stucu chu inzatu'. Diquila nú rrinu lubee bene nú nzanu. ²³Chenu ulaxu uninu lubee bene ze'e nú nzanu, uquieno equie tucu dañi para nú nacu'nu lu Diose ze'e. Chenu uyu'u rula' nzu tuculi'nu ze'e, ²⁴nu barco nú nza bee bene'nu istula nzae lu inzatu', nu chiqui' necha rri'inu inzatu' barco, xne chiqui' reca bii enza lu barco. ²⁵Nu elliecabé see Jesuse lu inzatu', nzanu enza lubee bene'nu. ²⁶Chenu ulañi' bee bene'nu nú senu lu inzatu', ulliqui beella nu ubixialí beella nú uni beella:

—iTucu benechiqui!!

²⁷Pero uni Jesuse lubeella:

—iUtsu naaqi arqui'hua! iLi'á nucua' la lliquihua!

²⁸Chequie uni Pedro lu Jesuse:

—Detá, tunu li'ilu nucua', unibiya' nú tsea lu inzatu' nzela hasta lulu.

²⁹Che uni Jesuse lulla:

—Utee che.

Nu che chu ulaca Pedro equie barco nu uquixiella sella lu inzatu' nzalla lu Jesuse. ³⁰Pero chenu utsi'lla nú chiqui' reca bii, ulliquilla nu uquixie ratse'lla lu inzatu', nu urixialilla unilla:

—iDetá, utsila'a li'á!

³¹Hora ze'e una'tse Jesuse yalla, nu uninu lulla:

—iXinu lle'natsia nzeli arqui'l lu li'á! ¿Xique nú uza' arqui'l lu?

³²Nu chenu uquie beella equie barco, ungaxe bii. ³³Chequie beelá bee enu nchiucu' equie barco, utsulliqui beella lu Jesuse nú uni beella lunu:

—iNelíca nú li'ilu necalú lli'ñi e'cu Diose!

**Uriyeca Jesuse bee bene eyeche
Genesaret
(Mr. 6:53-56)**

34 Chequie udetē beella lu inzatū ze'e, nu urīña beella stucu chu ru'u inzatū' lu iliu nú lee Genesaret.
35 Nu yuu'ulu bee bene luhuare ze'e li'inu nú necanu Jesuse, nu ungabiya' ye bee bene diqui enza ze'e nú uriñanu ze'e, che uriñayu bee bene ze'e bee bene enu riti lunu.
36 Nu uziqie beeī lunu nú zelanu nú ti'ya beeī masia ru'u xucunu, nu ye bee bene enu uti'ya ru'u xucunu uyeca' beeī.

**Lunú rri'i nú rri'i bee bene dula
(Mr. 7:1-23)**

15 Chequie uyabica chiucu chuna bee fariseo cuna bee ulaxcuela enu reca ley lu Jesuse, nu nze'ta beella enza Jerusalén, nu uni beella lunu:

2 —¿Xiquie nūla zucu' bee bene'lu custumbre nú utsa'na bee bene'ahua enu udetela? ¿Xiquie nūla naa bee bene'lu chenu racu beeī tucu nú neca custumbre?

3 Che uni Jesuse lubeella:

—¿Le'ca xiquie nū sana' arqui'hua Stichia' Diose, para nú nzenalahua lunú neca costumbre'tsiahua? **4** Xne uni Diose: “Lu'cu ula'na lu pa'lū cuna lu na'lū”, nu “Enu riquichi'qui' pa' cuna na' rqui'nia nū ati nze'e.”

5 Pero li'i hua rnihua nū nu' modo ni bene lu pa'lla cuna lu na'lla: “Leca modo ri'á elietsa luhua, xne ye nú rlu'cua necalane u'ná para Diose”, **6** rnihua nū titse bee bene enu ni scua, la qui'nia nū ri'i nze'e elietsa lu pa' nze'e cuna lu na' nze'e.

Scua ruachuhua Stichia' Diose, nu nzenalahua costumbre'hua. **7** ¡Lia rri'i hua nū nehuañi nze'cahua! Neli nū uni profeta Isaías lu cuenda'hua chenu unilla:

8 Bee benequie' rnibeei nú rlu'cu beeī ula'na lua, pero ni' teme' la lu'cu beeī ula'na lua.

9 Lecaxi sibi' nú rlu'cu beeī ula'na lua, xne sete'tsia beeī lunú xelatsia arqui' bee bene.

10 Chequie ubixia Jesuse ye bee bene ze'e, nu uninu lubeei:
 —Uzu'cu' diacahua nu uri'i hua beya' nū nia luhua: **11** La neca nū racu bene nū rri'i, nū rri'i bene dula. Sino que bee bedichia' nū rni bene enze'e rri'i nū rri'i bene dula.

12 Chequie uyabica bee bene' Jesuse lunu nu uni beella lunu:
 —¿Uri'ilu beya' nū né yu' arqui' bee fariseo bee bedichia' nū unilu la?

13 Nu ucuaquinu lubeē bene'nu nū uninu:

—Ye bee aca nū lá quieni Paa liñibe yetsu hasta lue. **14** Cuala' beella, xne necatsia beella xi neca bene enu nequie'lu enu rlube' lu stucu bene enu nequie'lu nū cá enza tsella, nu tunu tucu bene enu nequie'lu rlube' stucu bene enu nequie'lu cá enza tsella, che rucu beella nu' modo nū zana' beella liñi tucu i'chiu.

15 Che uni Pedro lu Jesuse:

—Udixiule'e luru xi rni bee bedichia' nū unilu.

16 Chequie uni Jesuse:

—¿Xie' le'ca nuuhua lá ri'i hua beya' lunú unia la? **17** ¿Xie' la ri'i hua beya'

nú ye bee elubacu nú racu bee bene rlacea xla'cu bee bene, nu che chu xiu'u zecae la? ¹⁸Pero bee bedichia' nú rni bee bene, xiu'u nucua' arqui' bee bene, nu bee nucua' rri'i nú rri'i bee bene dula. ¹⁹Xne liñi arqui' bee xiu'u nú necha rri'i bee elliebacu', nú ruuti bee sa'bene, nú rlu'cu niyu stucu una'a, urre rlu'cu una'a stucu niyu, nú rri'i bee eluhuexe, nú rri'i bee eluhuana', nú rni bee eluquichia', nú riquichi'qui' bee sa' bene. ²⁰Bee nucua' rri'i nú rri'i bee bene dula. Pero tunu la naa bene chenu racu bene tucu nú neca custumbre nú riala ri'lí bene ante nú acu bene, la neca nucua' nú rri'i nú rri'i bee bene dula.

Uriyeca Jesuse xinchiu'cu tucu una'a Canán

(Mr. 7:24-30)

²¹Chenu uchiu'u Jesuse lu iliu Genesaret nzanu enza lu eyeche Tiro cuna lu eyeche Sidón. ²²Enza ze'e uchiu'u tucu una'a enu neca bene lu iliu Canaán lu Jesuse nu urixialinchu nú uninchu lunu:

—iDetá, llliana! David, uhua'a arqui' li'á! Bi'yacuru xinchiu'cua nchiñi benechiqui' arqui' nu chiqui' nehuana secanchu.

²³Nu né cuaquilí Jesuse lunchu. Che uyabica bee bene'nu lunu nu uziqie beella lunu nú uni beella:

—Uni' lu una'a cua' nú yanchu xne rixialinchu nze'taquienchu lia'ahua.

²⁴Che uni Jesuse lubee bene'nu:

—Uxe'la Diose li'á para nú ri'litsia elietsa lubee bene Israel enu la chenala' inzui' Diose.

²⁵Pero che uyabica una'a ze'e lunu nu utsulliquinchu lunu, nú uninchu lunu:

—iDetá, uri'i elietsa lua!

²⁶Nu uni Jesuse lunchu:

—La neca nze'ca nú axi bene pá ya bee endu' nu dete' benene acu bee nicu.

²⁷Chequie uni una'a ze'e lu Jesuse:

—Neli'lu nucua' Detá, pero hasta bee nicu racu bee pá ube nú sana' liñi mexa' bee enu neca stene nicu.

²⁸Che uni Jesuse lunchu:

—iUna'a li'isi'lu chiqui' nzeli arqui'lu li'á! Aca tucu nú niarqui'lu.

Nu hora ze'e, uyeca' endu'nchu.

Uriyeca Jesuse huaxi bee bene enu riti

²⁹Chenu uchiu'u Jesuse ze'e uriñanu ru'u inzatu' Galilea. Che chu uquieno equie tucu dañi nu uzucunu ze'e. ³⁰Nu uyetesá' huaxi bee bene lunu ze'e, nu uriñayu beeí bee bene enu necuxu, cuna bee bene enu niquie'lu, cuna bee bene enu nemangu, cuna bee bene enu la ni, cuna bee bene enu seca huaxilá lu elichia. Uriñayu beeí bee bene quie' lunu, nu uriyecanu beeí.

³¹Chequie chiqui' uyanu arqui' bee bene ze'e chenu ulañi' beeí nú rnila bee bene enu lani, nú uyecala' bee bene enu nemangu, nú sela bee bene enu necuxu, nú ri'yala bee bene enu niquie'lu. Nu uquixie uni beella bedichia' nze'ca lu Diose' bee bene Israel.

Udete' Jesuse nú udacu tacu mili bee bene

(Mc. 8:1-10)

³²Chequie ubixia Jesuse bee bene'nu nu uninu lubeella:

—Ru'u arquia bee benequie', xne necala chuna bichia nú nucua'a beeí lua nu la uya' beeí nú acu beeí.

La niarquia nú xe'laa beeí yue beeí scuatsia ni'l beeí, xne cá chiula' beeí inziu.

33 Che uni bee bene'nu lunu:

—Pero ¿ca chiya'ahua nú acu ye bee bene añiquie', luhuare quie' elu lecati nucua'a?

34 Nu unedichia' Jesuse lubeella, nú uninu:

—¿Xala pa rlu'cuhua?

Nu ucuaqui beella lunu:

—Rlu'curu achine cuna chiucu chuna bee bela.

35 Nu che chu unibiya'nú nú cua'a bee bene ze'e luyuu. **36** Nu una'tsenu lu achi bee pa cuna bee bela, nu udete'nu che'tsa lu Diose. Nu ule'enu bee pa ze'e udete'nu ya bee bene'nu para nú ritsi' beellae luye bee bene ze'e. **37** Ye bee bene ze'e udacu hasta nú ubela' beeí. Nu uzucu subrasca' achi llume bee pa nú uya'na. **38** Bee bene enu udacu neca tacu mili bee niyu, pero la nebacu' bee una'a cuna bee endu'. **39** Chenu ulaxu nú uni Jesuse lubee bene ze'e nú nzalanu. Che chu uyu'unu liñi barco nu nzantu lu iliu nú lee Magdala.

Unacu' bee fariseo cuna bee saduceo nú ri'i Jesuse tucu milagro

(Mr. 8:11-13; Lc. 12:54-56)

16 Uya bee fariseo cuna bee saduceo lu Jesuse para nú ri'i beeí preo li'nu. Nu unacu' beeí lunu nú ri'nu tucu milagro nú lube'nu lubeei tunu neli nú nze'tantu lu cuenda' Diose.

2 Che uni Jesuse lubeei:

—Bee uche chenu neluu rnaa liñibe, che rnihuá: “Nú nze'ta nú ñia tsu bichia ye'e.” **3** Nu bee zila'

chenu rlañi'hua nú neluu rnaa liñibe nu nu' xcabe che rnihuá: “Necha tsu bichia quie', rri'i'hua beya' xa neca bee seña liñibe.” ¿Xiquie nú la ri'i'hua beya' xa neca lunú reca nee? **4** Bee enu necha rri'i bee lee lecaxi chili arqui'hua nu rnacu'hua tucu milagro lua, pero leca' xi milagro lañi'l'a'hua ulañi'tsiahua tucu milagro nú ulle'ca Jonás. Nu chu utsa'nanu bee bene cua', nu chu nzanu.

Levadura' bee Fariseo

(Mr. 8:14-21)

5 Chequie chenu udete beella stucu chu inzatu', uzañi' bee bene'nu a uya' beella pa acu beella.

6 Che uni Jesuse lubeella:

—Ubi'yahua li'i'hua, lu cuenda' levadura' bee fariseo cuna bee saduceo.

7 Che uni bee bene'nu lu sa'beella:

—Uninu scua xne lá auya'ahua pá da'cua'ahua.

8 Pero uri'i Jesuse beya' nú unibeella lu sa'beella, nu uninu lubeella:

—¿Xinu rnihuá nú la lu'cuhua pá? iXinu lle'natsia nzeli arqui'hua li'á! **9** ¿Xie' lasca' ri'i'hua beya', nu la ellu'cu arqui'hua chenu udetea ayu'tsia pá udacu ayu' mili bee bene la? ¿Nu se xala llume pá nú uzucu subrasca' uquietesa'hua?

10 ¿Nu xie' le'ca la ellu'cu arqui'hua chenu udetea achi pá udacu tacu mili bee bene, nu se xala llume pá nú uzucu subra uquietesa'hua la?

11 Xiquie nú lá ri'i'hua beya' nú lá nia luhua lu cuenda' pá, li'á rnia luhua nú bi'yahua li'i'hua lu levadura' bee fariseo cuna bee saduceo.

12 Che uri'i bee bene'nu beya' nú lá ninu lu cuenda' levadura, sino que uninu lubeella nú bi'ya beella li'ibeella lunú xa sete' bee fariseo cuna bee saduceo bee bene.

Uni Pedro nú neca Jesuse Cristo

(Mc. 8:27-30; Lc. 9:18-21)

13 Chenu uriña Jesuse lu iliu Cesarea de Filipo, unedichia'nú lubebee bene'nu nú uninu:

—¿Ti rni bee bene nú neca Li'á Bene enu uxe'la Diose?

14 Nu ucuaqui beella lu Jesuse, nú unibeella:

—Nu' bee bene enu rni nú necalu Juan Bautista, nu le'ca nu' bee enu rni nú necalu profeta Elías, nu nu' bee enu rni nú necalu profeta Jeremías, urre stucu profeta hua'tu.

15 Che uninu lubeella:

—Li'i quehuela, ¿ti rnihuá nú necaa?

16 Nu ucuaqui Simón Pedro lunu:

—Li'ilu necalu Cristo, Lli'ñi Diose enu nehuañi.

17 Che uni Jesuse lulla:

—Nia neca lu cuenda'lú Simón lliana' Jonás, xne ni'l tucu bee bene ne ixiule'e nucua' lulu, sino que Paa enu nzucu liñibe ulube' nucua' lulu. **18** Nu li'á nia nú necalu Pedro, nu rni nucua' quiee, nu equie cuenda' li'ilu aca huaxilá bee benea nu ni' eluti la ri'i ana nitilu li'ibeella. **19** Li'á liquia elurnibya' nú nze'ta enza liñibe lulu, nu lu titse enu niilu nú neca perdonala stula lu iliulabe quie', le'ca neca perdonala stula nze'e liñibe, nu bene enu niilu nú la neca perdona stula lu iliulabe quie', le'ca la neca perdona stula nze'e liñibe.

20 Che uni Jesuse lubebee bene'nu nú la ixiule'e beella lu ni'tucu bee bene, nú li'inu necanu Cristo.

Udixiule'e Jesuse nú atinu

(Mr. 8:31-9:1; Lc. 9:22-27)

21 Desde che uquixie Jesuse udixiule'nu lubee bene'nu nú rqui'ñia nú nzanu Jerusalén. Nu bee usticia' bee bene Israel cuna bee ule'ya enu rnibiya' lubeelá bee ule'ya cuna bee ulaxcuela enu reca ley, ri'libei nú chiqui' nehuana zecanu. Nu udixiule'nu nú utibei li'inu, pero bichia rriuna huañi zecanu. **22** Chequeiunguya' Pedro li'inu tucu chu nu unilla lunu:

—iLa zela Diose nú acane scua!
iNu la zecalú scua!

23 Che ubelleta Jesuse nu uninu lu Pedro:

—iUlluna' lua beze'lu, nu la ri'ixi'ilu lua! Xne elliebacu' nú rri'ilu la ye'ta nucua' lu Diose, rri'itsialu elliebacu' tucu nú rri'i bee bene iliulabe elliebacu'.

24 Che uninu lubeelá bee bene'nu:

—Tunu nu'ta tucu bee bene enu niarqui' aca bee benea, la yala nú ri'illa tucu nú niarqui'tsialla, rqui'ñia nú riqui'lla xitse nú nehuana zecalla nu ye'ta quiella li'á. **25** Xne bee bene enu masela niarqui' nú huañi lu iliulabequie' enta bichia nú nitilu nucua', pero bee bene enu ati equie nú neca bee bee benea, lu'cu bee nze'e elunehuañi nú leca xunga laxu lu Diose. **26** ¿Lecaxi zibi' nú ri'i bee bene ana ye nú nu' lu iliulabequie', tunu nitilulla ante Diose? Xne leca modo tsibene elunehuañi' bene liñibe. **27** Nu Li'á Bene enu uxe'la Diose, chenu nzela stucu bese, nzela cuna poder nú rlu'cu Pa Diose nu cuna bee ángele'nu. Bichia ze'e detea lu cada tucua bee bene lunú

rialá ati'lla, equie cuenda' lunú uri'illa. ²⁸Li'á nia luhua, nú nu' bee bene enu nucua'a ca'a lá ati hasta nú lañi'beei nú riña zeca Li'á Bene enu uxe'la Diose, nzela cuna poder nú rlu'cua para nú nibiya'a.

Uche'e nú xneca rnaa Jesuse

(Mc. 9:2-13; Lc. 9:28-36)

17 Chenu udete xu'cu bichia,
che uyanu Jesuse Pedro,
Jacobo nu cuna Juan enu neca bichi
Jacobo uya beella equie tucu dañi
elu aya, ²ze'e uche'e nú xa rnaa
Jesuse lubeella. Nu chiqui' rulu
siqui' lunu xi rulu ellie'e bichia, nu
unga niquichua'quie' xucunu nu
rulu siqui'i. ³Hora ze'e ulañi' beella
nú rdichia'nú Jesuse Moisés cuna
Elías. ⁴Che uni Pedro lu Jesuse:

—Detá, ineca nze'ca nú
nellua'anuru li'ilu ca'a! Tunu
niarqui'lu reche'ru chuna ranchu:
tucue para li'ilu, stucue para Moisés
nu stucue para Elías.

⁵Diqui nú rniscal' Pedro, hora
ze'e ulaca tucu xcabe nú rulusiqui'
utsacu' equie Jesuse cuna bee
bene ze'e. Nu liñi xcabe ze'e ubene'
beella tucu chii nú uni:

—Neca ninguié! Lliñia enu
chiqui' se'caa. Nu ñia nzu arquialu,
uzu'cu'hua nú rrinu.

⁶Chenu ubene' bee bene' Jesuse
chi cua', uzucu lliqui beella nu
hasta luyuu uzi'quindiqui beella,
nu chiqui' ulliqui beella. ⁷Che
uyabica Jesuse lubeella, nu uti'yau
li'ibeella nu uninu lubeella:

—Utsulíhua, nu la lliquihua.

⁸Nu chenu uletsa beella lubeella
ulañi' beella nú leca' tinu' ze'e,
stucutsia Jesuse nzulá ze'e.

⁹Chenu enta laca beella dañi ze'e,
uni Jesuse lubeella:

—La ixiule'huá lu ni'tucu bee
bene lunú ulañi'huá, hasta bichia
nú huañi zeca Li'á Bene enu uxe'la
Diose.

¹⁰Chequie unedichia' bee bene'nu
lunu nú uni beella:

—¿Xiquie nú rni bee ulaxcuela
enu reca ley nú rltut Elías rqui'ñia
nú riña?

¹¹Che ucuaquinu lubeella:

—Neli nú nze'ta rltut Elías para
nú tsuche'lla yeene. ¹²Pero Li'á nia
luhua nú ube'tala Elías, nu né chulu
bee bene li'illa tucu nú riala nú a
chulu beei li'illa, nu xitse urí'linu
ye bee bene li'illa. Nu le'ca scua
nehuana ri'linu bee bene Li'á Bene
enu uxe'la Diose.

¹³Che urí'i bee bene'nu beya' nú
rrinu lu cuenda' Juan Bautista.

Uri'iyecea Jesuse tucu endu' enu seca ichia ziñia

(Mr. 9:14-29; Lc. 9:37-43)

¹⁴Chequie chenu uriña beella elu
nucua'a bee bene, uyabica tucu
bene lu Jesuse nu utsulliqui lunu
nú uni:

¹⁵—Detá, uhua'a arqui' endua xne
secái ichia ziñia nu chiqui' nehuana
secái, nu huaxi bese sana'i lu quii,
cuna lu inza. ¹⁶Uriñayua endua
lubee bene'lu, pero lá aca beella
riyeca beella li'i.

¹⁷Chequie ucuaqui Jesuse nú
uninu:

—iCue'hua bee bene enu rlu'cu
dula núa chili arqui'huá li'á! ¿Se
xala tiembu rqui'ñia nú tsunua
li'ihua?, nu ¿se xalalá tiembu riquilá
li'ihua? Uteyuhua endu'cua' ca'a.

18 Che uqui'ya' benechiqui' uri'i Jesuse nu unibiya'nú chiu'ui arqui' endu' ze'e, nu hora ze'e uyeca' endu' ze'e.

19 Chenu nucua'a li'itsia Jesuse cuna bee bene'nu unedichia' beella lunu nú uni beella:

—¿Xique nú né acaru ahuaru benechiqui' arqui' endu' ze'e?

20 Che uni Jesuse lubella:

—Xne lle'natsia nzeli arqui'hua Li'á. Li'á nia luhua nú tunu neli nzeli arqui'hua masia xi lle'na ebichi mestasa, neca lunú nzeli arqui'hua Li'á, nu' modo nihua lu dañique': "Ulluna' ca'a nu uquia stuci luhuare"; nu zucu' dañi nú nihua. Lecaxi aca neríña' para li'ihua tunu neli nzeli arqui'hua.

21 Pero para nú chiu'u clasia' bee benechiqui' cua', rqui'ña nú dete'hua bichia núa acuhua, nu nacu'hua lu Diose.

Udixiule'e Jesuse bese rrucu nū atinu

(Mr. 9:30-32; Lc. 9:43-45)

22 Chenu nucua'a beella lu iliu Galilea, uni Jesuse lubee bene'nu:
—Li'á Bene enu uxel'a Diose dete' cuenda bene li'á lubee bene,²³ nu uti beei li'á, pero bichia rriuna huañi zecaa. Chenu ubene' bee bene'nu nú uninu scua chiqui' nehuana utsu arqui'beella.

Udixiu Jesuse impuesto' indu

24 Chenu uríña Jesuse cuna bee bene'nu eyeche Capernaum, uya bee bene enu rri'l'i cubre impuesto para indu llene Jerusalén lu Pedro nu unidichia' beei lulla, nu unibeei:

—¿Rixiu maestro'lu impuesto' indu la?

25 Che ucuaqui Pedro lubeei:
—Aahua' rixiunue.

Nu chenu uyu'u Pedro liñi ni'i elu nzu Jesuse, rlutilánu uninu lu Pedro:

—¿Xa nilu, Simón? ¿Ti riala ixiu impuesto lubee arre iliulabequie': bee bene lachilla la, o bee bene rene la?

26 Nu ucuaqui Pedro nú unilla lunu:

—Bee bene rene.

Nu uni Jesuse lu Pedro:

—La qui'ña nú ixiu bee bene lachilla impuesto. **27** Pero para nú lecati lee lua'ahua, mejora uquia ru'u inzatu', nu du'l'u anzuelu'l'u lue, nu bela rluti enu uculu. Liñi ru'í ulua tucu melu nú riqui' chetixiulu equie impuesto, cuendaa cuna cuenda'l'u, uya'e nu uquia tixiu.

Ti máse neca equie

(Mr. 9:33-37; Lc. 9:46-48)

18 Che le'ca bee bichia ze'e, unedichia' bee bene' Jesuse lunu, nú unibeella:

—¿Ti máse neca equie elurnibiya' Diose liñibe?

2 Chequie ubixia Jesuse tucu endu' utsunu labe beella, ³ nu uninu lubeella:

—Li'á nia luhua nú tunu la che'e arqui'hua lu stulahua nu acahua xi neca bee endu', la chu'uhua elurnibiya' Diose liñibe. **4** Enze'e nia nú bene enu aca lle'na arqui' xi neca arqui' endu' quie', nze'e aca enu máse aca neca equie elurnibiya' Diose liñibe. **5** Nu titse bene enu ri'i

elietsa lu tucu endu' equie cuenda'
Li'á, lua rri'i nze'e elietsa.

**Ubi'yahua li'iuhua para nú la
zana'hua lu dula**

(Mr. 9:42-48; Lc. 17:1-2)

6'Pero titse bee bene enu ri'i nú zana' tucu endu' enu nzeli arqui' Li'á lu dula, máse neca nze'ca para bene ze'e nú llica'cu bene tucu quie molino añilla nu ts'i'qui benella hasta aquiee lu inzatu!. **7**iCue' bee bene iliulabe nú nu' huaxi beenú necha neca bee nú rri'i nú rri'i bee bene dula! Siempre nu'beenú necha neca lu iliulabe, pero icue' bene enu ri'i nú ri'i stucu bene dula!

8'Enze'e tunu ri'i yalu urre cuchiul'u nú ri'ilu dula, mejora uchie'cu'e nu utsi'quii istu, xne máse neca nze'ca nú chu'ulu liñibe cuna tucutsia yalu nu tucutsia cuchiul'u, luquela nú chalu cuna rucu yalu nu rucu cuchiul'u lu quií nú leca xunga laxu. **9**Le'ca tunu rri'i i'cululu nú rri'ilu dula, mejora uhuane nu utsi'quii istu, xne máse neca nze'ca nú chu'ulu liñibe cuna tucutsia i'cululu, luquela nú chalu luquii ebila cuna rucu i'cululu.

Ejemplu' sanchi enu uniti
(Lc. 15:3-7)

10'La huachuhua ni' tucu bee endu' quie', xne nia luhua nú bee ángele enu rriuci li'ibeei nucua'a lu Diose Pa liñibe. **11**Xne Li'á Bene enu uxel'a Diose uriña para nú tsiala'á bee bene enu nza inziu nú necha neca.

12?Neca xi neca nú tucu bee rlu'cu tucu ayu'u sanchi, nu nitilla tucui? ?Xie' la tsa'nsca'lla noventa

y nueve bee sanchi ze'e dañi nu che cua'nalla sanchi enu uniti la?

13Nu tunu llela'llaí, masesca'la ñia tsu arqui'lla nú ullela'lla sanchi enu uniti luquela noventa y nueve sanchi enu lá niti. **14**Le'ca scua, pa'hua enu nzucu liñibe, la niarqui'nu nú nitilu ni' tucu bee bene enu nzeli arqui' li'inu.

Xa riala ri'i bene lu sa'lla

(Lc. 17:3)

15'Tunu nu' xi necha uri'linu sa'lu li'ilu, ubedichia' rucutsiahua uni'lulla nú necha uri'illa lulu. Che tunu uri'i casolla nú unilu lulla, uri'ilálu ana nú nucua'a nze'cahua che. **16**Pero tunu lá ri'i casolla nú unilu lulla, uya' chiucu chuna bee bene para nú nihua lulla. **17**Nu tunu ni' nú rni bee benecua' la zucu'lla, che udixiule'e lubeelá bee bene enu nzeli arqui' Diose, nu tunu la ri'i casolla nú rni bee bene enu nzeli arqui' Diose, che lu'cu cuendatsiahualla nú necatsialla xi neca tucu bene enu la chili arqui' Diose urre xi neca tucu bene enu rri'i cubre impuesto.

18'Li'á nia luhua nú titse sa'hua enu nzeli arqui' Diose enu ri'iuhua perdona lu iliulabequie' le'ca neca perdonalalla liñibe, nu titse sa'hua enu nzeli arqui' Diose enu la ri'iuhua perdona stula lu iliulabequie' le'ca la neca perdona stula nze'e liñibe.

19'Le'ca nia luhua, nú tunu chiucuhua aca tucunecatse para nú nacu'hua xi nacu'hua lu Diose Paa liñibe lu iliulabequie', li'inu liqui'nue. **20**Xne elu riete'sa' chiucu chuna bee bene equie cuenda' li'á, ze'e nzua cuna li'ibeella.

²¹Che uyabica Pedro lu Jesuse nu unedichia'lла lunu, nú unilla:

—Detá, ¿xala bese rqui'ña nú ri'á perdona bee sa'a, tunu nu' xi uri'i nze'e lua? ¿Hasta achi bese la?

²²Nu ucuaqui Jesuse lulla:

—La nia nú achitsia bese. Sino que nia lulu nú hasta setenta bese siete rqui'ña nú ri'ilu perdona bee sa'lу, nucua' rni nú diqui tiembu ri'ilu perdona sa'lу.

Ejemplu' bene enu lá ri'i perdona

²³Tucu nú rnibya' Diose neca nú rnibya' tucu arre enu uri'i elliebacu' nú uza'lа bichia nú ixiu bee bene enu rri'i riña' lulla nú nezi'qui beei lulla. ²⁴Nu chenu uquixie arre ze'e nú rlacu'lла calu nezi'qui cada tucua bee bene lulla, che uriñayu bee bene tucu bene enu rri'i riña' lulla enu nezi'qui huaxi dimi lulla. ²⁵Nu lunú la lu'cui xi ixiui lu arre. Che unibya' arre ze'e nú iquii cuna una'i cuna bee endu'i, nu cuna ye bee stene'i para nú yaxu nú nezi'quii lu arre ze'e.

²⁶Che utsulliqui moso' ze'e lu arre nu uziquiei lu arre, nú uni: “Detá, ala' chiu'u arqui'lu tsuquiesca' lle'na ixiuca ye nú nezi'quia lulu.”

²⁷Chequie uhua'a arqui' arre ze'e li'i, nu né ixiui nú nezi'quii lu arre ze'e nu che utsana' arre li'i. ²⁸Pero chenu uchiu'u moso' ze'e lu arre, uchu'ui stucu moso' enu le'ca sibi' lu arre nu nezi'qui moso' quie' lui lle'na dimi. Che chu una'tsei añi moso' ze'e utsi'ii, nu uni: “iUdixiu nú nezi'quilu lua!” ²⁹Che utsu lliqui bene ze'e lui, nu uziquie nze'e lui nú uni nze'e: “Ala' chiu'u arqui'lu tsuquiesca' lle'na, ixiuca ye nú

nezi'quia lulu.” ³⁰Pero né zelai atsuquiei, nu udu'i bene ze'e ni'cu' hasta nú ixiu nze'e ye nú nezi'qui nze'e lui. ³¹Chenu ulañi' beelá bee sal'i enu rri'i riña' lu arre ze'e nucua', chiqui' ulebeeи nu uyatixiule'e beei lu arre lu ye nú unga. ³²Chequie chu unibya' arre nú ye'ta bene enu unga nezi'qui lulla, nu unilla lu bene ze'e: “iChiqui' necha rri'ilu! Li'á uri'á perdona ye nú nezi'quilu lua, xne uziquielu lua. ³³Le'ca scua li'ilu riala nú ahua'a arqui'lu sa'lу, tucu nú uhua'a arquia li'ilu.” ³⁴Nu lunú chiqui' rle arre ze'e, chequie unibya'lла nú cha bene ze'e ni'cu' hasta nú ixiui ye nú nezi'quii lu arre.

³⁵Chenu ulaxu nú uni Jesuse ejemplu cua', che uninu:

—Le'ca scua ri'inu Pa liñibe li'ihua tunu la ri'ihua perdona bee sa'hua diquinu' arqui'hua.

Uni Jesuse equie cuenda' nú la le'e bene una'a bene

(Mc. 10:1-12; Lc. 16:18)

19 Chenu ulaxu nú uni Jesuse scua, uchiu'unu lu iliu Galilea nu uriñanu lu iliu Judea stucu chú re'cu Jordán. ²Nu uyanala huaxi bee bene li'inu, nu ze'e uriyecanu bee bene enu riti.

³Che uyabica chiucu chuna bee fariseo lunu para nú ri'i beei preu li'inu, nu unedichia' beei lunu nú unibeei:

—¿Nu' modo nú le'e niyu una'ai equie xitse tucu nú uri'inchu la?

⁴Chequie ucuaqui Jesuse nú uninu lubeei:

—¿Xie' lasca ulahua lu ichi'
Stichia' Diose elu rni, nú li'inu enu

ureche' bee bene desde nū uquixie iliulabe, "ureche'nu niyu cuna una'a la"? ⁵Le'ca uninu: "Enze'e za'na niyu pa'i cuna na'i para nū yucui una'i, che rucu beei neca beei xi neca tucutsia bene." ⁶Scua la neca' beei chiucu bene, sino que tucutsia neca beei. Enze'e leca modo nū ri'i tucu bene nū le'esa' bee bene enu uril'i Diose nū neca tucuncatse.

⁷Che uni bee fariseo lu Jesuse: —¿Xiquie nū unibiya! Moisés nū nu' modo le'e bene una'a bene, tunu acache' tucu ichi' elu rni nū le'e sa'lla?

⁸Chequei uni Jesuse lubee fariseo: —Equie nū chiqui' nziti arqui'hua, enze'e uzela Moisés nū le'ehua una'ahua. Pero chenu uquixie iliulabe né acae scua. ⁹Nu Li'á nia luhua nū titse niyu enu le'e una'a, nu la necane nū uri'i una'alla eluhuexe cuna stucu niyu, nu yuculla stucu una'a, rri'lilla dula che, nu niyu enu yucu una'a enu ule'e niyu!, le'ca rri'l i nze'e dula.

¹⁰Chequei uni bee bene' Jesuse lunu:

—Tunu scua necane lu cuenda' niyu cuna una'alla, nzalá nū la chia bene che.

¹¹Che uni Jesuse lubeella:

—La ye bee bene rri'l beya' nucua', sino que bee bene enu udete'tsia Diose elliebacu' nū ri'i beya' nucua' rri'l beya'e. ¹²Xne nu' bee bene enu desde nū ungula lá ala para nū chia, le'ca nu' bee bene enu la chia equie nū reca remedialla, nu nu' bee bene enu la chia lunú rri'lilla elliebacu' nū mejora ixiule'ella Stichia! Diose luhuare nū chialla. Enu riqui' nula chia, la chia nze'e.

Uri'ile'ya Jesuse bee endu' (Mr. 10:13-16; Lc. 18:15-17)

¹³Che uriñayu bee bene chiucu chuna bee endu' lu Jesuse para nū ricu'nu yanu equie beei nu nacu'nu lu Diose lu cuenda' beei, pero uquilya' bee bene enu uriñayu bee endu' ze'e uri'i bee bene'nu. ¹⁴Pero uni Jesuse lubee bene'nu:

—Uzelahua nū ye'ta bee endu' lua, nu la cahua nū ye'ta beei lua, xne liñibe elurnibiya! Diose neca para bee bene enu neca arqui' xi neca arqui' bee endu' quie'.

¹⁵Chenu ulaxu nū uricu'nu yanu equie bee endu' ze'e, che chu nzanu.

Ubedichia'nu tucu bene xene Jesuse (Mr. 10:17-31; Lc. 18:18-30)

¹⁶Uya bi'ya tucu bene Jesuse nu unedichia' bene ze'e lunu nū uni:

—Maestro enu neca bene nze'ca, xi nū neca nze'ca ri'á para nū lu'cua elunehuañi nū leca xunga laxu?

¹⁷Nu uni Jesuse lui:

—¿Xinú rnilu nū neca bene nze'ca? Leca ni' tucu bene nze'ca tucutsia Diose neca bene nze'ca. Pero tunu niarqui'lu lu'culu elunehuañi nū leca xunga laxu liñibe, uzu'cu' nū rni bee mandamiento.

¹⁸Che uni bene ze'e lu Jesuse:

—¿Ta bee mandamiento rqui'ñā nū zucua che?

Nu uni Jesuse lui:

—La utilu bene, la na'tselu stucu una'a enu la neca una'alu, nu la ri'ilu eluhuana', nu la ta'l lu eluquichia' bene, ¹⁹ulu'cu ula'na lu pa'l u cuna lu na'l lu, nu uzeca sa'l lu tucu nū secalu li'ilu.

20 Che uni bene ze'e lu Jesuse:
—Ye bee nucua' sucua hasta chenu
necaa endu'; ɿneequie xilá rri'i nú
zucua?

21 Nu uni Jesuse lu bene ze'e:
—Tunu niarqui'lu nú huañilu tucu
nú niarqui' Diose, uquia tuti ye
beenú rlu'culu nu ude'te' dimicua'
lubee bene enu seca elitsi, che
lu'culu eluxene liñibe, nu chu ye'ta
quielu Li'á.

22 Pero chenu ubene' bene ze'e
nucua', chiqui' nehuana utsu arquii
nziai xne chiqui' xenei.

23 Chequie uni Jesuse lubee
bene'nu:

—Li'lá nia luhua, nú chiqui' neríña'
nú chu'u tucu bene xene liñibe
elurnibiya' Diose. **24** Li'lá nia luhua,
nú mase facil nú dete tucu cameyu
i'chiu echedicu, luquelá nú chu'u
tucu bene xene liñibe elurnibiya'
Diose.

25 Chenu ubene' bee bene' Jesuse
nú uninu scua, chiqui' uyanu arqui'
beellla, nú uni beella lusa' beella:
—¿Ti nu' modo tsila' a che?

26 Nu ubi'ya Jesuse lubeella nu
uninu lubeella:

—Para bee bene neríña' neca
nucua' pero para Diose lecaxi
neríña'.

27 Chequie uni Pedro lu Jesuse:
—Li'iru utsa'naru ye beenú
rlu'curu para nú nzela quieeru li'ilu.
—Xi ati'ru, lu cuenda' nucua' che?

28 Che uni Jesuse:

—Li'lá nia luhua nú chenu riña
bichia nú aca necuqui yeene, nu
chenu zucua'a lu xleta nú nibiya'a
li'lá Bene enu uxe'la Diose, li'ihua
enu entanala li'lá le'ca zucuhua lu
chi'chiucu xleta, para nú hualuhua

lu cuenda' ye bee bene enu nze'ta
lu chi'chiucu familia Israel. **29** Nu
titse bee bene enu utsa'ná ni'i, urre
bichilla, urre zanalla, urre pa'lla,
urre na'lla, urre una'alla, urre
bee endu'lla, urre bee yu'lla equie
cuenda' Li'á, ati'lla tucu ayu'u bese
masela lunú utsa'nalla, nu le'ca
lu'culla elunehuañi nú leca xunga
laxu liñibe. **30** Pero huaxi bee bene
enu neca equie lu iliulabe quie' nee,
aca bee nze'e enu la neca equie'a
bichia ze'e, nu bee bene enu la neca
equie nee lu iliulabe quie', aca neca
equie bee nze'e bichia ze'e.

Ejemplu' bee bene enu rri'i riña' lu uva

20 Le'ca uni Jesuse lubee
bene'nu.

—Elurnibiya' Diose neca xi neca
tucu bene enu rlu'cu tucu yuu llene
nú nu' uva, nu sila'tu' uchiu'ulla
nzecua'nalla bee moso' para nú
ri'i riña' lu uva'lla. **2** Nu unixulla
lubeen moso' ze'e nú calu ixiulla
beei tebichia nu uzela beei, che
uxe'lalla beei nú che ri'i beei riña'
lu yu'lla. **3** Cheelá uchiu'ulla nzalla
tucu rquie quie' sila' nu ulañi'lla
nú nucua'a chiucu chuna bee bene
ru'u i'ya enu la lu'cu riña'. **4** Che
unilla lubeei: “Uquia ri'iuhua riña' lu
yuuua elu nu' uva nu ixiuahua lunú
rialia yaxuhua.” Che chu nzuebee
riña'lla. **5** Le'ca uchiu'lla bene ze'e
nzalla tucu rebibichia, nu le'ca
esquie nzal'alla tucu rquie chuna
uche, nu le'ca esquie'ala unilla
lubeen bene enu nucua'a ru'u i'ya
enu la lu'cu riña'. **6** Nu tucu rquie
ayu' uche, uchiu'u zeca'lalla nzalla
ru'u i'ya nu uchu'ulla stexcua'a

bee bene enu la lu'cu riña', nu unilla lubeei: “¿Xiquie nú debichia nucua'ahua ca'a nu la ri'iuhua riña'?”

⁷Che uni bee bene ze'e lulla: “Xne lá llela'ru riña' ri'iru.” Che unilla lubeei: “Uquia ri'iuhua riña' lu yuua, elu nu' uva nu ixiuahua lunú riala yaxuhua.”

⁸'Chenu uyu'u rula', uni patrón lu moso' enu rnibiyá' lubee moso': “Ubixia bee moso' nu uquixie udixiuxu bee enu uriña último, nuche chu ixiulu beelá bee enu rluti uriña.” ⁹Nu chenu uriña bee moso' enu uyu'u lu riña' tucu rquie ayu' uche, ye beei uyaxu beei tucu nú rri'i bene ana tebichia.

¹⁰Chequie chenu uyala nú yaxu bee moso' enu uyu'u rluti lu riña', uril'i beei elliebacu' nú maselá yaxu beei, pero le'ca ye beei uyaxu beei tucu nú rri'i bene ana tebichia.

¹¹Chequie chenu riaxu beei ulebeei lu patrón ze'e, ¹²nu unibeei lulla: “Bee bene quie' uriña uche, nu uril'itsia beei riña' tucu hora nu udixiulu beei tucu nú rixiulu li'iru, nu li'iru uriqui'ru uril'iru riña' lubee debichiallu.” ¹³Chequie ucuaqui patrón ze'e, nú unilla lu tucu beei: “Amigo, lecaxi nú necha neca uril'a lulu. Xne li'á unixua lulu nú calu ixiualu tebichia. ¹⁴Enze'e uyucu dimi'lú nu yaalu. Xne li'á niarquia nú ixiua bene enu uche uyu'u lu riñaa tucu nú udixiua li'ilu. ¹⁵¿Xie' leca modo ri'á lunú niarquia cuna dimiala?, urre ¿Xie' ria arqui'lú nú rri'i nze'ca la?” ¹⁶Scua necane, xne bee bene enu leca tineca nee aca neca equie bee nze'e, nu bee bene enu neca equie nee la aca neca equie bee nze'e bichia ze'e. Xne

huaxi bee bene nezene' lu inziu' Diose pero la huaxi bee bene enu chenala inziu'nu.

Udixiule'e Jesuse besé rriuna nú uti bee bene li'inu

(Mr. 10:32-34; Lc. 18:31-34)

¹⁷Chenu nza Jesuse enza Jerusalén, che ubixianu lu chichiucu bee bene'nu tucu chú nu uninu lubeella:

¹⁸—Nediya'la'hua nú nza'ahua enza Jerusalén elu dete' cuenda bee bene Li'á Bene enu uxe'la Diose lubee ule'ya enu rnibiyá' lubelá bee ule'ya, cuna lubee ulaxcuela enu reca ley, nu nibiya' beei nú atia.

¹⁹Nu dete' cuenda beei Li'á lubee bene rene para nú lli'chinu beei Li'á, nu zete'che' beei Li'á nu quie'e beei Li'á lu cruse, pero bichia rriuna huañi zecaa.

Unacu' na' Jacobo cuna Juan tucu faura lu Jesuse

(Mr. 10:35-45)

²⁰Chequie uyabica una'a Zebedeo cuna rucu lliana' beella lu Jesuse, nu utsulliquilla lunu, nu unacu'lla tucu faura lunu. ²¹Che unedichia' Jesuse lulla:

—¿Xi niarqui'lú?

Nu unilla lunu:

—Chenu nibiya'lu niarquia nú zucu tucu endua cue'tselu chúbe, nu stucui zucu cue'tselu chúbeca.

²²Pero uni Jesuse lubeella:

—La ri'iuhua beya' lunú rnacu'hua. ¿Xie' nu' modo nú nehuana zecahua tucu nú nehuana zecaa la? ¿Xie' nu' modo riqui'hua zecahua lunú riala zecaa la?

Che uni beella lunu:

—Aahua', riqui'ru.

23 Che ucuaquinu lubeella:

—Neli nú nehuana zecahua tucu
nú nehuana zecaa. Nu riqui'hua
zecahua lunú zecaa. Pero enu zucu
cue'tsea chíube urre chubeca. La
neca Li'á enu riala nibiya' nucua',
sino que necala nucua' para bee
bene enu ucañila Diose Paa liñibe.

24 Nu chenu ubene' se xi'i bee
bene'nu nucua', ule beella lu Juan
cuna lu Jacobo. **25** Pero ubixia
Jesuse beella nu uninu lubeella:

—Li'ihua nediy'a'hu, nú bee bene
enu rnibya' lu iliulabe quie' rnibya'
beei lubee bene tucu nú niarqui'tsia
beei, nu bee bene enu neca equie
cua' rri'i beei tucu nú niarqui'tsia
beei lubee bene lunú rnibya' beei.
26 Pero letahua la yala nú acane
scua. Sino que enu niarqui' nibiya'
letahua, rqui'ña nú zibi'lla lu yehua,
27 nu enu niarqui' nú mase aca neca
equie letahua, rqui'ña nú acalla enu
zibi' luhua, **28** scua tucu nú uriña
Li'á Bene enu uxe'la Diose, lá yela
para nú zibi' bee bene lua, sino
que uriña lu iliulabe para nú zibi'a
lubee bene, nu equie nú atia tsila'a
huaxi bee bene lu stula beei.

**Uriyeca Jesuse chiucu bene enu la
ye'e lu**

(Mr. 10:46-52; Lc. 18:35-43)

29 Chenu uchiu'u Jesuse cuna bee
bene'nu eyeche Jericó, nzequie
huaxi bee bene li'inu. **30** Nu chiucu
bee bene enu la ye'elu nucua'a ru'u
inziu, chenu ubene' beei nú udete
Jesuse ze'e, urixialibeei nú unibeei
lunu:

—iDetá, lli'ñi David, uhua'a arqui'
li'iru!

31 Nu uqui'ya' beei uri'i bee bene
para nú zaca beei, pero masasca'lá
urixialibeei nú unibeei:

—iDetá, lli'ñi David, uhua'a arqui'
li'iru!

32 Chequie utsuxé Jesuse nu
ubixianu rucu bee bene enu la
ye'elu ze'e nu uninu lubeeli:

—¿Xi niarqui'hua nú ri'á luhua?

33 Che unibeei lunu:

—Detá, niarqui'ru nú ye'e i'culuru
para nú lañi'ru.

34 Chequie uhua'a arqui' Jesuse
beei, nu uti'yanu i'culu beei. Hora
ze'e uye'e lubeei, nu chu nzequie
beei li'inu che.

Uyu'u Jesuse Jerusalén

(Mr. 11:1-11; Lc. 19:28-40; Jn. 12:12-19)

21 Chenu nzeriñala beella
axu Jerusalén, uriña beella
tucu dañi nú lee Olivos, axu eyeche
Betfagé, che uxe'la Jesuse chiucu
bee bene'nu, **2**nu uninu lubeella:

—Uquiahuá eyeche nú nchiucu'
enza lucua!. Ze'e llela'hua tucu
burro enu nequietu cuna lli'ñií.
Uxe'chehua beeí nu ye'tayuhua beeí
ca'a. **3**Nu tunu nu' ti ni xi ni luhua,
uni'huá lu bene ze'e nú Detá, Jesuse
rqui'ñiá, nee chu nzelayuzecaru
beeí.

4 Scua unga para nú uyalu tucu
nú uni tucu profeta hua'tu, chenu
uquie'ella:

5 Uni'huá lubee bene eyeche llene
Sión:

“Ubi'yacuruhua, nze'tala
arré'hua luhua nee,
nu nze'tanu xi nze'ta tucu bene
enu la neca equie,
nchiucu'nu equie tucu burru,
tucu burro lla'na,

lli'ñi nañi enu ruya' yuhua!"

⁶Chequie uya bee bene' Jesuse nu uril'i beella tucu nú uninu lubeella.

⁷Che uriñayu beella burro ze'e cuna lli'ñí lu Jesuse, nu uricu' beella xucu beella equie burro lla'na ze'e, nu chu uricu Jesuse equieí. ⁸Nu lunú chiqui' huaxi bee bene nucua'a ze'e, nu' beeí rcua'a xucu labe inziu elu detenu, nu texcua'a beeí uchiecu' bee leca lubeen aca ucua'a beeí labe inziu elu detenu. ⁹Che bee bene enu nzuculu, cuna bee bene enu nzequie, rixiali beeí nú rnibeeí:

—iÑia neca lu cuenda' li'inu enu neca Lli'ñi arre David! iChiqui' ñia neca lu cuenda' li'inu enu nze'ta lu cuenda' Pa'ahua Diose! iChe'tsalá Diose Paa enu nzucu liñibe!

¹⁰Chenu uriña Jesuse Jerusalén, ye bee bene ze'e uyacha beeí nu unibeeí lu sa'beeí:

—¿Ti bene quie?

¹¹Che unibeeí lusa'beeí:

—Profeta Jesuse nucua', enu neca bene eyeche Nazaret lu iliu Galilea.

Utiliaca' Jesuse bee bene labe ele'ya'

Indu llene Jerusalén

(Mr. 11:15-19; Lc. 19:45-48; Jn. 2:13-22)

¹²Chenu uriña Jesuse labe ele'ya' indu llene Jerusalén utiliaca'nú ye bee bene enu ruti cuna ye bee bene enu si labe ele'ya' indu ze'e. Nu utelletanu bee mexa' bee bene enu xi'lá dimi, cuna xleta' bee bene enu ruti bee paloma, ¹³nu uninu lubeei:

—Lu ichi' Stichia' Diose rni: "Nia chiulee ni'i elu nacu' bee bene lu Diose", pero li'ihua uril'ihuane xi neca yube' bee huana!.

¹⁴Che liñi indu ze'e uyabica bee bene enu la ye'e i'culu cuna bee

bene enu necuxu ante Jesuse, nu uriyecanu beeí. ¹⁵Pero chenu ulañi' bee ule'ya enu rnibya' lubee ule'ya cuna bee ulaxcuela enu reca ley bee milagro nú rri'i Jesuse, nu chenu ubene' beeí nú rixiali bee endu' nucua' ze'e: "iÑia neca lu cuenda' li'inu enu neca Lli'ñi arre David!", ule beeí ¹⁶nu unibeeí lu Jesuse:

—¿Riene'lu nú rni bee endu' cua'la?

Che ucuaqui Jesuse lubeeí:

—Aahua', rienea. Pero ¿xie' lasca' ulahua lu ichi' Stichia' Diose elu rni lu cuenda' nucua' la? Lu ichi' Stichia' Diose rni:

Uri'ilu nú bee endu' lla'na cuna bee endu' me'e enu rachi, neca bee enu ula bee canto nu zucu' aya li'ilu.

¹⁷Che uya'na beeí ze'e, nu uchiu'unu nzanu eyeche Betania, nu ze'e uya'nanu rula' ze'e.

Aca higo nú ubichi

(Mr. 11:12-14, 20-26)

¹⁸Chenu uye'e lu yuu stucu bichia, ubenchila' zecanu Jerusalén, nu ulia'na'nú. ¹⁹Che ulañi'nú tucu aca higo ru'u inziu nu uyabicanu lue. Pero lá llela'nú higo lue, bee lecatsia nu'lue. Chequie uni Jesuse lu aca higo ze'e:

—iLeca' xunga ayu ndixi lulu!

Hora ze'e ubichi aca higo ze'e.

²⁰Chenu ulañi' bee bene' Jesuse nucua', chiqui' uyanu arqui'beella nu unidichia' beella lu Jesuse:

—¿Xiquie nú chu ubichi aca higo cua'?

²¹Chequie uni Jesuse lubeella:

—Li'á nia luhua nú tunu nzeli arqui'hua masia teme', nu la za'

arqui'hua, la neca nú nucua'tsia ri'ihua tucu nú uri'á lu aca higo, sino que nihua lu dañique': “Uyetsu ca'a nu uzana' lu inzatu”, nu scua acane. ²²Nu ye nú nacu'hua lu Diose, tunu neli nzeli arqui'hua nú liqui'nú nucua', che yucuhuane.

Elurnibiya' nú rlu'cu Jesuse

(*Mr. 11:27-33; Lc. 20:1-8*)

²³Luze'elá uyu'u Jesuse liñi indu llene Jerusalén sete'nu bee bene, che uyabica bee ule'ya enu rnibiy'a lubeelá bee ule'ya cuna bee usticia' bee bene Israel lunu, nu unibeei lunu:
—¿Ti uliqui' stichia' nú rri'ilu ye bee nucua?', nu ¿Ti uliqui' elurnibiya' lulu?

²⁴Che uni Jesuse lubeei:

—Le'ca nedichia'a tucu luhua niarquia, tunu cuaquihua nú nedichia' luhua, che ixiole'a luhua ti uliqui' elurnibiya' nú rri'á scua. ²⁵¿Ti uxe'la Juan nú rinzalla bee bene che? ¿Diose uxe'lalla la o bee bene uxe'lalla la?

Che unibeei lusa'bee, nú unibeei:

—Tunu nia'ahua nú Diose uxe'la Juan Bautista, che ni nucua' lua'ahua: “¿Xique nú né chili arqui'hua nú unilla che?” ²⁶Nu le'ca leca modo nia'ahua nú bee bene uxe'la Juan, xne xiquia'ahua bee bene, xne ye bee bene nzeli arqui' nú neca Juan tucu profeta' Diose.

²⁷Che unibeei lu Jesuse:

—Labiya'rú.

Chequie uni Jesuse lubeei:

—Le'ca esquie la ixiole'a luhua ti uliqui' elurnibiya' nú rri'á scua.

Ejemplu' tucu bene enu ulu'cu chiucu Iliana'

²⁸Nu uni Jesuse lubeei:

—¿Xa rri'ihua elliebacu' lunú nia luhua nee? Tucu bene ulu'cu chiucu Iliana', nu unilla lu tucui: “Endu', uquia ri'i riña' lu yuua elu nu' uva.” ²⁹Che ucuaqui Iliana'lla lulla: “iLa niarquia cha'al!” Pero luze'elá uche'e elliebacu'i nu uyai. ³⁰Chequie uya ni' pa' bee lu stucui, tucu nú unilla lu enu rlu, nu uni lulla: “Nza'ca che.” Uni, pero né chai. ³¹Neequie uni'hua, éta lu rucu bee Iliana'lla uri'i lunú niarqui'lla?

Che unibeei lunu:

—Enu unilla lu rluti.

Chequie uni Jesuse lubeei:

—Li'á nia luhua nú bee bene enu rri'i cubre impuesto para Roma, cuna bee una'a huexe rluti bee nze'e chu'u elurnibiya' Diose liñibe luquela li'ihua. ³²Xne ubel'a Juan Bautista udixiule'e luhua nú xa huañhua, nu né chili arqui'hua nú unilla, a'laquie bee bene enu rri'i cubre impuesto para Roma cuna bee una'a huexe uchilí arqui'bee nú unilla. Pero li'ihua mase ulañi'hua bee nucua', ne che'e arqui'hua, para nú a chili arqui'hua nú unilla.

Ejemplu' bee moso' enu necha urí'i

(*Mr. 12:1-12; Lc. 20:9-19*)

³³Chequie uni Jesuse lubeei uzu'cu' diacahua ne nia stucu ejemplu luhua: Tucu bene uquieni bee aca uva lu yuu', nu udu'lla elu'u diqui abenchila'e, nu ureche'lla tucu elu ts'i bee uva, le'ca ureche'lla tucu elu aya para nú aca ucu yuu elu nu' bee aca uva ze'e.

'Che udete'lla yuu cua' lle'la lu chiucu chuna bee bene enu ri'i riña' lue, nu chu nzalla istu. ³⁴Chequie

chenu uriña tiembu nú le'e beella uva, uxe'lalla chiucu chuna bee moso'lla chetucu bee uva nú rialalla. ³⁵Pero bee bene enu rri'i riña' lle'la lu yuu'lla una'tse beeí bee moso' enu uxe'lalla, tucu moso' ze'e uzete'che' beeí, stucu nze'e unguuti beeí, nu stucui udu' beeí quiee. ³⁶Che bene enu neca stene yuu ze'e, uxe'lalla huaxilá bee moso'lla luquela nú rlu, pero le'ca esquie uri'linu beeí bee moso' cua'.

³⁷Último uxe'lalla endu'lla, xne uri'illa elliebacu!: “Lu endusia lu'cu beeí ula'na.” ³⁸Pero chenu ulañi' beeí nú nze'ta endu' bene enu neca stene yuu ze'e, che unibeeí lusa'bbeeí: “Bene quie' neca enu ya'nana yuu quie', te utia'hua nucua' para nú ya'nana'ahua yuu quie!” ³⁹Che una'tse beeí li'i, nu uhua beeí li'i lu yuu ze'e nu chu unguuti beeí li'i.

⁴⁰Chequie unedichia' Jesuse lubee bene ze'e nú uninu:

—Chenu riña bene enu neca stene yuu ze'e, ¿xa rri'i hua elliebacu' nú ri'inulla bee bene ze'e enu udete'lla yuu'lla lle'la lu che?

⁴¹Che unibei lu Jesuse:

—Utilla beeí sin nú hua'a arqui'lla beeí, nu dete'lla yuu'lla lu texcua'a bee bene, enu dete' cuenda ula'cu nú rialalla chenu aca ula'cue.

⁴²Le'ca uni Jesuse lubee fariseo:

—¿Xie' lasca' ulahua lu ichi'

Stichia' Diose elu rni?

Quiee nú uhua u'na bee bene enu rreche' ni'i, quiee quie' neca nú mase uzibi' ungache' ni'i.

Nucua' neca nú uri'i Diose, nu chiqui' nzenu arquia'ahua lunú uri'linu.

⁴³Enze'e nia luhua nú chiu'uchuhua elurnibiya' Diose liñibe nu chu'u téxcua'a bee bene luhuare'hua, bee enu neli ri'i tucu nú niarqui'nu.

⁴⁴Pero titse bee bene enu llica cuchiu' cuna quiee ze'e, nehuana zecalla, nu tunu nu'ti zana' quiee cua' equie la'xulii li'illa.

⁴⁵Chenu ubene' bee ule'ya enu rnibiya' lubeelá bee ule'ya cuna bee fariseo bee ejemplu nú uni Jesuse, che uri'i beeí beya' nú lu cuenda' beeí uninu. ⁴⁶Chequie hora ze'e uniarqui' beeí a na'tse beeí li'linu, pero xiqui beeí bee bene, xne nzeli arqui' bee bene nú necanu tucu profeta.

Ejemplu' tucu eluchia

(Lc. 14:15-24)

22 Chequie unilá Jesuse bee ejemplu lubeeí nú uninu:
²—Elurnibiya' Diose neca xineca tucu arre enu uri'i tucu tsa'a nú uchia endu'lla. ³Nu uxe'lalla bee moso'lla para nú chetucu beeí bee bene enu nezene' lu tsa'a ze'e, pero lá zela bee bene ze'e achaa.

⁴Chequie uxe'lalla xiucu xuna bee moso'lla, nu unilla lubeeí: “Uni'hua lubee bene enu nezene' lu tsa'a nú nescalula nú acu bee bene. Unibiya'lá nú unguti bee u'na' enu mase neru'cu, cuna beelá bee nañia enu mase neru'cu, nu ye bee nucua' nescal, uni'hua lubeella nú ye'ta beella lu eluchia.” ⁵Pero bee bene enu nezene' lu tsa'a ze'e né ri'i caso beeí nú uni bee moso' arre ze'e lubeeí. Tucu bene ze'e nza nzebi'ya yuu', nu stucui nzequien berexe', ⁶nu texcua'a beeí una'tse bee moso' enu uxe'lalla arre ze'e, nu

uzete'che' beeí bee moso' ze'e hasta nú unguuti beeí bee nze'e.
7 Chequie chiquí' ule arre ze'e, nu uxé'lalla bee sundado'lla nú utibeeí bee bene enu unguuti bee moso'lla, nu tsiquí' beeí lachi bee bene ze'e.
8 Che unilla lubee moso'lla: "Neca listola yeene para nú aca tsa'a, pero bee enu uzene' nú ye'ta lu tsa'a la yala nú ye'ta beeí. **9** Uquiahua lubee calle nu ye bee bene enu lla'cahua uní'hua lubeella nú ye'ta beella lu tsa'a." **10** Chequie nzue bee moso'lla uquiete'sa' ye bee bene enu ulla'ca beeí lubee calle, sia bee bene nze'ca nu sia bene enu necha rri'i, scua uehe ni'lí arre ze'e elu unga tsa'a.

11 Nu chenu uyu'u arre ze'e liñí ni'lí para nú lañí'lla bee bene enu nezene' lu tsa'a, che ulañí'lla tucu bene enu la nutu laquie nú rutu bene enu nezene' lu tsa'a. **12** Che uni arre lu bene ze'e: "Amigo, ¿xa uyu'ulu ca'a, nu la nutulu laquie nú riala utulu lu tsa'a?" Pero lecalí xi ucuaqui bene ze'e lu arre. **13** Chequie uni arre lubee bene enu rricu' bee elubacu lu mexa: "Ullí'ca'cuhua cuchiu' benequie' cuna yai, nu utsi'quihuai eli'ya' elu necabe, elu una'i nu aculayai." **14** Xne huaxi bee bene enu nezene', pero lle'natsia bee bene enu chu'u.

Equie cuenda' impuesto

(Mc. 12:13-17; Lc. 20:20-26)

15 Chenu ulaxu nú uni Jesuse bee ejemplu. Che uchiu'u bee fariseo luhuare ze'e nu ubedichia' beeí equie cuenda' nú xi nibeeí lu Jesuse, para nú ninu tucu bedichia' nu xa ta' quiya beeí li'inu. **16** Che uxé'lala bee fariseo cua' chiucu chuna bee

bene' beeí lu Jesuse, cuna chiucu chuna bee bene' Herodes, nú nibeeí lunu:

—Maestro, nediyá'ru nú neli beenú rnilu nu neli sete'lu nú xa niarqui' Diose nú huañi bee bene, sin nú ri'i casolo nú rni bee bene, xne la bi'yalu nú xa rnaa bee bene. **17** Neequie uni' luru: ¿Neca nze'ca nú dixiuru impuesto lu arre Cesar la, o la neca nze'cae la?

18 Pero uri'i Jesuse beya' nú necha neca elliebacu' beeí, enze'e uninu lubeei:

—Nequichia'hua, ¿xinu rri'i hua preu li'a scua? **19** Ulube'hua tucu melu nú riaxu impuesto lua.

Che chu udete' beeí tucu denario yanu. **20** Chenu ulañí'nu melu cua', che unedichia'nu lubeei:

—¿Tiluu nú nequie lu melu quie' nu ti lee enu nequie lue?

21 Nu ucuaqui beeí nú unibeeí lunu:

—Arre Cesar nucua'!

Che uni Jesuse lubeei:

—Ude'tehua lu arre Cesar lunú neca cuenda' arre César, nu ude'te'hua lu Diose nú neca cuenda' Diose.

22 Chenu ubene' beeí nú uni Jesuse scua, chiquí' uyanu arqui'beeí, che utsa'na beeí li'inu nu chu nzuebeeí.

Equie cuenda' nú huañi zeca bee bene enu unguti

(Mr. 12:18-27; Lc. 20:27-40)

23 Le'ca mismo bichia ze'e uya chiucu chuna bee saduceo lu Jesuse. Nu bee saduceo lachili arqui' nu huañi zeca bee bene enu unguti. Enze'e unedichia' beeí lu Jesuse nú unibeeí:

24—Maestro, Moisés uni nú tunu ati tucu niyu nu uya'na una'lla nu né lu'cu beella endu', che rqui'ña nú chia bichi tuxie ze'e una'a ze'e para nú lu'cu beeí endu' enu aca xi neca endu' tuxie ze'e. **25**Leta'ahua nucua'a tucu familia enu ulu'cu achi bichi. Bichi rlu beeí uyucu una'a pero unguilla. Nu né lu'culla endu' cuna una'allá, chequie uyucu bichi rruculla una'a ze'e. **26**Le'ca scua ulle'ca bichi rrucu beella, cuna bichi rriuna beella, hasta nú unguti luza' achi bichi beella. **27**Luze'elá, le'ca unguti una'a ze'e. **28**Neequie, chenu huañi zeca bee bene enu unguti, éta luza' achi bee bene cuá' neca niyu' una'a ze'e, xne ye beella uchia beella una'a ze'e?

29Nu ucuaqui Jesuse lubee saduceo ze'e nú uninu:
—Rnihua scua xne la ri'ihua beya'
Stichia' Diose nu la chuluhua xneca
neca lunú rnibiya' Diose. **30**Xne chenu
huañizeca bee bene enu unguti, la
yucua' bee bene sa' bee bene, nu la
detea' bee bene endu' bee bene chia,
sino que acatsia bee bene xi neca bee
ángelo' Diose liñibe. **31**Pero equie
cuenda' nú huañi zeca bee bene enu
unguti, éxie' lasca' ulahua lu ichi'
Stichia' Diose elu rminu? **32**"Li'á neca
Diose lu Abraham, lu Isaac cuna lu
Jacob." Nu Diose la necanu Diose
lubee bene enu unguti, sino que
necanu Diose lubee bene enu nehuañi.

33Chenu ubene' ye bee bene ze'e
lunú uni Jesuse, chiqui' nzenu
arqui'beeí lunú xa sete'nu.

Mandamiento nú máse neca equie (Mr. 12:28-34)

34Chenu ungabiya' bee fariseo nú
leca' xi allela arqui' bee saduceo

uni lu Jesuse, uyetesá' beeí. **35**Nu
tucu bee fariseo cua'a enu neca
ulaxcuela enu reca ley. Unedichia'
lu Jesuse para nú dete'i preu li'inu,
nu uni lunu:

36—Maestro, éta mandamiento nú
mase neca equie enta lu ley?

37Che uni Jesuse lui:

—“Uzeca Pa'lú Diose diquinu'
arqui'lú, cuna diqui lunú necalu
cuna diqui nu' elliebacu'lú.”

38Ninguie' neca mandamiento
rluti, nú mase neca equie. **39**Nu casi
iguaelee cuna mandamiento rrucu
nú rni: “Uzeca sa'lú tucu nú secalu
li'ilu.” **40**Enze'e titse bee bene enu
sucu' rucu bee mandamiento quie'
sucu'la nze'e ye nú rni ley, cuna ye
nú uquie'e bee profeta.

Éta lubee familia nze'ta Cristo?

(Mr. 12:35-37; Lc. 20:41-44)

41Chenu neyete'sa'sca' bee fariseo
luhuare ze'e, **42**che unedichia'
Jesuse lubeei:

—éXa rri'ihua elliebacu' lu cuenda'
Cristo? éTi lu familia' nze'tanu?

Che unibeei lunu:

—Lubee familia' David nze'tanu.

43Chequie uni Jesuse lubeei:

—Pero, éxiquie nú equie cuenda'
Espíritu Santo uni David lunu, li'ilu
rnibiya'lú lua? Xne uni David:

44Diose uni lu li'inu enu rnibiya'
lua:

“Uzucu cue'tsea chube,
hasta nú ri'á ana nibiya'lú lubee
bene enu rle lulu.”

45éEnze'e tunu neca Cristo endu'
David, xinu rni David lunu, li'ilu
rnibiya'lú lua?

46Nu ni' tucu bee bene enu
nucua'a ze'e né cuaqui ni' tucu

bedichia' lunu, nu desde bichia ze'e leca' xi unedichia' beella lunu.

Uni Jesuse nú necha rri'i bee fariseo cuna bee ulaxcuela enu reca ley

(*Mr. 12:38-40; Lc. 11:37-54; 20:45-47*)

23 Chequie uni Jesuse lubee bene'nu cuna lubee bene enu nucua'a ze'e:

²—Bee ulaxcuela enu reca ley cuna bee fariseo, sete' beeい bee bene lunú rni ley' Moisés. ³Enze'e nia luhua nú uzu'cu'hua stichia' beeい, nu ri'ihua ye nú rnibeei, pero la ri'ihua tucu nú rri'i beeい, xne li'ibeei rnibeei tucu nú rnibeei pero la ri'ibeei tucu nú rnibeei. ⁴Chiqui' neriña' lunú rnibya' beeい nú ri'i bee bene, pero puro rnibya'tsia beeい nú ri'i bee bene lunú rnibeei nu ni' la niarqui' beeい ri'i beeи elietsa' bee bene para nú ri'i bee bene lunú niarqui' beeい. ⁵Nu ye nú rri'i beeい rri'itsia beeい scua para nú lañi' bee bene. Nú riu' arqui'beeí nú riaca'cuu tucu iti nú nu'che' Stichia' Diose tiquie beeい cuna testu' xcu beeい. Le'ca riu' arqui'beeí nú rutu beeい laquie nú stuñi luxu. ⁶Nu rle' beeí nú zucu beeí luhuare elu rcua'a bee bene enu mase neca equie chenu nezene' beeí nú nzetacu beeí lu tucu eliñi, le'ca scua rri'i beeí liñi indu, ⁷le'ca riu' arqui'beeí nú lu'cu bee bene ula'na lubeei chenu xa'ca bee bene li'ibeei lu inziu, nu ni bee bene ulaxcuela lubeei.

⁸Pero li'ihua la yala nú le'huá nú ni bee bene ulaxcuela luhua xne neca tucutse li'ihua nu tucutsia ulaxcuela rlu'cu'hua nu li'inu necanu Cristo. ⁹Nu la nihua pa lu

ni'tucu bee bene iliulabe enu laca pa'hua, xne tucutsia Paa rlu'cu'hua, nu li'inu nzucunu liñibe. ¹⁰Le'ca la le'huá nú ni bee bene luhua nú necahua enu rnibya', xne nu' tucutsia enu rnibya' nu li'inu necanu Cristo. ¹¹Nu bene enu mase neca equie letahua, rqui'ña nú zibi'lla luhua. ¹²Xne bene enu sucu' aya le'catsia li'i aca lle'na nze'e, nu enu reca lle'na arqui' zucu' aya bee bene nze'e.

¹³—Cue'hua bee ulaxcuela enu reca ley nu bee fariseo, xne la ri'ihua tucu nú rnihuá!, nu la zelahua nú ri'i bee bene beya' xa riala ri'i beeí para nú aca beeí bee bene' Diose. Nu ni' li'ihua la la'nahua nú acahua bene' Diose, nu rcahua nú aca bee bene enu niarqui' nú aca bee bene' Diose.

¹⁴—Cue'hua, bee ulaxcuela enu reca ley nu bee fariseo, xne la ri'ihua tucu nú rnihuá!, xne raxihua ni'i bee una'a zaqui, nu para nú ni bee bene nú necahua bee bene nze'ca, che xee rnacu'hua lu Diose. Enze'e yalahua castiya nú mase fuerte.

¹⁵—Cue'hua bee ulaxcuela enu reca ley nu bee fariseo, xne la ri'ihua tucu nú rnihuá! Xne diqui lu iliulabe rla'nahua bee bene enu chu'u chu'huá, nu chenu uri'ilahua ana tucu bene, chiucu bese masela rri'iuhalla lli'ñi beze'lu luquela li'ihua.

¹⁶—Cue'hua, xne la ri'ihua beya' nu niarqui'hua nú zete'huá bee bene!, nu rnihuá: "Tunu nu' ti rni istá indu Jerusalén ri'ya, lecaxi neca nú ni bene scua, pero bene enu rni equie cuenda"

oro nú necache' liñi indu llene Jerusalén, rqui'ña nú ri'illa tucu nú unilla." ¹⁷ iXala netunduhua nu niquie'luhua! ¿Ta nú mase neca equie oro nú necache' liñi indu la, urre indu la? Xne indu rri'i nú necale'ya oro ze'e. ¹⁸ Nu le'ca rnihua: "Nú lecaxi neca tunu rni bene, nú rnilla istá ru'u ecu'cu ril'ya, pero tunu rnilla istá u'na nú nchiucu' ru'u ecu'cu ril'ya, rqui'ña nú ri'illa tucu nú unilla." ¹⁹ iXala netunduhua nu niquie' luhua! ¿Ta nú máse neca equie u'na la?, urre ¿Ecu'cu nú rri'i nú necale'ya u'na la? ²⁰ Enze'e bene enu rni ista ecu'cu ril'ya, nu la necane equie cuenda' ecu'cutsia le'ca necane luye nú nchiucu' lue. ²¹ Nu le'ca esquie bene enu rni nú ista indu ril'ya, nu la necane nú indutsia ril'ya le'ca ril'ya Diose Paa liñibe enu nzu presencia' liñi indu. ²² Le'ca esquie bene enu rni nú istá liñibe ril'ya, le'ca rnilla nú ril'ya Diose nu le'ca rnilla nú ril'ya xleta elu nzucunu.

²³ iCue'hua bee ulaxcuela enu reca ley, nu bee fariseo, xne la ril'ihua tucu nú rnihua! Li'ihua rdete'hua diezmo bee huáni nu lee menta, anís nu cumiñu lu Diose tucu nú rnibiyá' ley, pero la zucu'huá lunú mase neca equie rnibiyá' ley nú ril'ihua. La ril'ihua tucu nú necane lubee bene, la huáa arqui'huá bee bene nu la tsu tenilí arqui'huá lunú nzeli arqui'huá Diose. Nucua' riala nú ril'ihua, sin nú tsana' arqui'huá nú rdete'hua diezmo lu Diose. ²⁴ iLi'ihua necahua xi neca enu nequie'lu xne niarqui'huá nú zete'huá bee bene nu ni' li'ihua la acahua, nu

ri'yahua li'ihua nú la ri'ihua dula nú lle'natsia neca! iNu la bi'yahua li'ihua nú rri'ihua dula nú mase necha neca! iTucu nú rni bee bene: Ri'yahua li'ihua nú la aquihua seruchi' pero riaquihua cameyu!

²⁵ iCue'hua bee ulaxcuela enu reca ley nu bee fariseo, xne la ril'ihua tucu nú rnihua! Li'ihua necahua xi neca bee vaso cuna bee pliato nú leca xinaa di'chi, xne rlube' nú necahua bene nze'ca pero liñi arqui'huá nu' nú neyi' rcua'huá nu rcachi'huá.

²⁶ Li'ihua bee fariseo neca xi neca nú niquie'luhua: Rluti che'exu arqui'huá lunú necha rri'ihua, che lube' nú neli rri'i nze'cahuá.

²⁷ iCue'hua bee ulaxcuela enu reca ley nu bee fariseo, xne la ril'ihua tucu nú rnihua! xne necahua xi neca eluhua nú nequichi netsuu nú ñia naa tetsu'e. Pero liñi ache nu' bee arta' bene nguti cuna ye beenú necha rnaa. ²⁸ Scua necahua, xne ante lubee bene rlube' nú nze'cahuá. Pero liñi arqui'huá ache nu' nú necha neca nu chiqui' nequichia'huá.

²⁹ iCue'hua bee ulaxcuela enu reca ley cuna bee fariseo! iXne la ril'ihua tucu nú rnihua! Li'ihua rreche'hua equie eluhua' bee profeta nu suche'hua equie eluhua' bee bene enu uhuañi tucu nú niarqui' Diose, ³⁰ nu rnihua: "Tunu uhuañia'huá tiembu nú uhuañi bee bene'ahuá enu udetela, lá aria'ahuá elietsa' beella nú autia'ahuá bee profeta enu unguti beella." ³¹ Lunú rnihua scua, rri'ihua beya' nú necahua lli'ñi bee bene enu unguuti bee profeta. ³² iNeequie ula'xuhua,

uri'ihua lunú uquixie uri'i bee
bene'hua enu udetela!

³³'iNecha rri'ihua! iLi'i sihua
netsiñahua xi netsiña bee be'lá!
¿Xa modo tsila'ahua lu castiya ná
nzu zecahua ebila? ³⁴Nee xe'la
bee profeta, cuna bee bene enu
chiqui' reca, nu bee ulaxcuela enu
zete' li'ihua Stichia' Diose. Pero nu'
beella enu utihua nu nu' beella enu
quie'ehua lu cruse, nu beelá beella
zete'che'huá liñi bee indu'hua, nu
tiliaca'huá beella cada eyeche.

³⁵Enze'e li'ihua ricu' equiehua rene'
bee bene enu uri'i nze'ca lu Diose
bee enu unguti, desde rene' Abel
enu uhuañi tucu nú niarqui' Diose
nu hasta rene' Zacarías lliana' bene
enu lee Berekías Zacarías enu
ungutihua enza ru'u indu elu siqui'
bene nañi u'na lu Diose. ³⁶Li'á nia
luhua nú bee bene enu nehuáñi
nee, li'ibeei zecabeei castiya equie
cuenda' yebee nucua!.

Unguna' Jesuse equie cuenda' eyeche Jerusalén

(Lc. 13:34-35)

³⁷Nu uni Jesuse:
—iBee bene Jerusalén, bee bene
Jerusalén, li'ihua ruutihua bee
profeta, nu rdu'huá quiee bee Bene
enu uxé'la Diose luhua! iHuaxi bese
uniarquia nú quietesa'ahua xi rri'i
lli'ti chenu rquiete'sai bee ti'ñi'í
riu'u liñi cuacaí, pero né zelahua!
³⁸Enze'e nia luhua nú enta bichia
nú tsana' arqui' Diose lachihua.
³⁹Le'ca nia luhua nú leca' bichia nú
lañi'la'huá li'á hasta nú riña bichia
chenu nihuá: "Chiqui' ñia neca lu
cuenda' li'inu enu nze'ta lu cuenda'
Pa'ahua Diose liñibe."

Udixiule'e Jesuse ná rila indu llene Jerusalén

(Mc. 13:1-2; Lc. 21:5-6)

24 Chenu uchiu'u Jesuse liñi
indu llene Jerusalén nu
nzanu, che uyabica bee bene'nú
lunu, para ná lube' beella lunu
beelá bee ní'i ná necache' indu ze'e.
²Che uninu lubeella:

—Rlañi'huá indu quie' scua nee.
Pero li'á nia luhua nú nze'ta bichia
nú la ya'na' ni' stucu quiee quie'
equie sa'e. Yeene rilae.

Xi seña aca chenu enta laxu iliulabe

(Mc. 13:3-23; Lc. 21:7-24; 17:22-24)

³Che uya Jesuse cuna bee bene'nú
equie dañi Olivos, nu chenu
nzucunu ze'e, che uyabica bee
bene'nú lunu nu unibeella lunu:

—Niarqui'ru ná ixiule'elu luru.
¿Xunga aca nucua'? Nu ¿xi seña
aca chenu enta zecalu stucu bese?,
nu ¿xi seña aca chenu nze'ta laxu
iliulabe?

⁴Che uni Jesuse lubeella:

—Ubi'yahua li'ihua para ná lecati
zequienu li'ihua. ⁵Xne nze'ta huaxi
bee bene enu ni ná nze'ta beei
equie cuenda' li'á, nu nibeei luhua:
"Li'á necaa Cristo", nu scua zequienu
beei huaxi bee bene. ⁶Pero li'ihua
yene'huá ná reca xuuurre ná aca
xuu, la lliquihua xne scua nzu ná
acane, pero lasca' riña ná laxu
iliulabe. ⁷Xne liunu tucu nación
cuna stucu nación, nu liunu tucu
ubiernu cuna stucu ubiernu, nu aca
biña, nu aca xú huaxi bee luhuare
lu iliulabe. ⁸Ye nucua' neca ná
apenatsia quixie ná nehuana zeca
bee bene.

9'Che dete' cuenda bee bene li'ihua lubee bene enu ri'i nú nehuana zecahua, nu utibeei li'ihua, nu le'ca esquie ye bee bene iliulabe chana arqui' li'ihua nú necahua bee benea. **10**Chenu aca bee nucua' huaxi bee bene tsana' arqui' nú nzeli arqui'beella li'á, nu chana arqui'sa' beella, nu dete' cuenda beella sa' beella lubee usticia. **11**Le'ca nze'ta huaxi bee bene enu lia ni nú neca bee profeta' Diose. Nu zequienu beei huaxi bee bene. **12**Nu equie nú chu'u huaxi nú necha neca lu iliulabe, huaxi bee bene la zeca' beella sa'beella. **13**Pero bene enu la tsana' arqui' nú nzeli arqui' li'á diqui tiembu nú nehuañilla, tsila'a Diose bee nze'e. **14**Nu bee bedichia' nze'ca' Diose nú riene'hua nee ri'chia letsee luye bee bene iliulabe, para nú acabiya' yebee benene che laxu iliulabe.

15"Tucu nú uquie'e profeta Daniel chenu unilla: Chenu lañi'hua nú nchiucu' nú nechahua rnaa liñi indu Jerusalén luhuare elu necachi neca, enu rula ichi' quie' riala ri'i beya' xi rnii, **16**chequie bee bene enu nucua'a lubee eyeche lu iliu Judea, rqui'ña nú yecaxu'u beella enza dañi. **17**Nu bene enu nchiucu' equie ni'i, la ria'lla ana nú chu'ulla liñi ni'lla para nú na'tsell stene'lla; **18**nu bene enu nzu dañi, la benchila'lla ni'lla para nú chetuculla xuculla. **19**iCue' bee una'a enu nu' endu' xla'cu cuna bee una'a enu nuu endu' enu rachi bee bichia ze'e! **20**Una'cuhua lu Diose para nú la aca bee nucua' chenu neca tiembu iqui,urre bichia nú sulachi bee bene; **21**xne bichia ze'e

chiqui' nehuana zeca bee bene, nu lasca'lí zeca bee bene scua desde nú uquixie iliulabe, nu leca' xunga aca scua stucu bese. **22**Tunu la tsuxé Diose beenú aca tiembu ze'e, lecati tsila'a; pero tsuxenu bee nucua' xne secanu bee bene'nu enu ucañinu.

23'Chequie tunu bichia ze'e nu' bee bene enu ni luhua: "Bil'yacuruhua ca'a nzu Cristo", urre "Bi'yacuruhua, zelu' nzunu", la chili arqui'hua nú ni beei luhua. **24**Xne nze'ta bee bene enu ni nú neca Cristo, urre bee enu lia ni nú neca profeta' Diose nu ri'ibeei bee milagro cuna beelá beenú ri'i nú chiqui' chenu arqui' bee bene para nú zequienuu beei bee bene, nu tunu nu' modo hasta bee bene enu ucañila Diose zequienu beei. **25**Udixiule'exulá luhua lunú aca. **26**Enze'e, tunu nu' bee bene enu ni luhua: "Bi'yacuruhua Cristo nzu lu dañi achi cua!", la chahua ze'e, urre tunu ni bee bene luhua: "Bi'yacuruhua, Cristo, nzu liñi ni'i cua!", la chili arqui'hua nucua!. **27**Xne scua tucu nú ria'la lee nú rdu'llie'e desde elu rliñi bichia nu hasta enza rats'e' bichia, scua aca chenu riña zecaa li'á Bene enu ux'e'la Diose. **28**Nu tucu nú reca chenu riete' sa' bee ulabichi tucu luhuare, elu nuxu nañi ati scua aca bichia ze'e.

Chenu nze'ta zeca Bene enu ux'e'la Diose

(Mr. 13:24-37; Lc. 21:25-33; 17:26-30, 34-36)

29'Pero bee bichia ze'e chenu udetela nú nehuana ulle'ca bee bene, cabeli lu bichia, nu la du'lliea' ellie' guu, nu zana' bee belaa enu

nchiucu' liñibe lu yuu, nu yebee nú nu' liñibe cuñi. ³⁰Chequie lañi' bee bene seña nú nzela enza liñibe, li'á Bene enu uxe'la Diose, nu ye bee bene iliulabe chiqui' una' chenu lañi' beeí nú nzela li'á Bene enu uxe'la Diose leta xcabe liñibe, nu tu'na rulu siqui' nzela cuna ye poder nú rlu'cua. ³¹Nu xe'la bee ángelea nu juerte bixia bee trompeta para nú quiete'sa' beenu bee bene enu ucañilá diqui lu iliuulabe.

³²'Ulu'cu cuendahua ejemplu' aca higo: Chenu enta ye' ellutsa lue, cuna leca lue, nediy'a'l'hua nú enta riñala tiembu tsibee. ³³Le'ca scua chenu lañi'hua nú recalá bee nucua', uri'ihua beya' nú nzula nú riña zeca li'á Bene enu uxe'la Diose. ³⁴Li'á nia luhua nú yebee nucua' aca ante nú ati bee bene enu nehuañi tiembu quie!. ³⁵Liñibe cuna iliulabe nitilu, pero stichia'a la dete nú yalu yeene.

³⁶'Pero lecati ri'i beya' xi bichia nu xi hora nú aca yebee nucua', nu ni' bee ángele liñibe, nu ni' Lli'ñi Diose la ri'i beya' xunga aca bee nucua'. Tucutsia Diose Pa liñibe nediy'a' xunga aca bee nucua'.

³⁷'Tucu nú unga tiembu nú uhuañi Noe, le'ca esquie aca bichia chenu riña zeca li'á Bene enu uxe'la Diose. ³⁸Xne tiembu ze'e, ante nú xe'la Diose quiua'tsa' lu iliulabe, racu bee bene nu rue' beeí, nu uchia beeí, nu udete' beeí xinchiu'cu beeí uchia, scua uri'i bee bene hasta bichia nú uyu'u Noe liñi barco; ³⁹nu chenu la za'lí arqui' bee bene uquixie ulaca tucu quiua'tsa' nu unguya' inza ye bee bene nu scua ungutibeei. Le'ca scua aca

chenu riña zeca li'á Bene enu uxe'la Diose. ⁴⁰Nu bichia ze'e chiucu niyu enu nucua'a dañi, tuculla nza nu stuculla ria'na. ⁴¹Le'ca chiucu una'a enu riuu, tuculla nza nu stuculla ria'na.

⁴²'Enze'e ucua'a tsínahua xne la ri'ihua beya' xi bichia nzela zecaa, li'á enu rnibiya' luhua. ⁴³Pero li'ihua nediy'a'hua nú tunu tucu bene nediy'a' xi hora rula' riña huana' chu'u ni'lla cachi' stene'lla, la a'tsellu nu la zelalla nú chu'u huana' ni'illa cachi' stene'lla. ⁴⁴Enze'e, rqui'ñá nú le'ca ucua'a tsínahua xne chenu la za'lí arqui'hua, riña zeca li'á Bene enu uxe'la Diose.

Moso' enu rri'i nze'ca nu moso' enu la ri'i nze'ca
(Lc. 12:41-48)

⁴⁵?Uri'ihua xi rri'i tucu moso' enu uya'na ucu ni'i patron', uya'n nulla ye bee moso' para nú dete'lla nú acu beeí hora nú riala nú acu beeí? ⁴⁶Nia neca lu cuenda' moso' enu rri'i tucu nú rialane chenu riña patron'lla. ⁴⁷Li'á nia luhua, nú patron cua' tsa'nalla lu moso' cua' nú bi'ya nucua' ye stene'lla. ⁴⁸Pero tunu moso' ze'e necha rri'illa, nu ri'illa elliebacu' nú rle'elá benchila' patron'lla enu rnibiya' lulla, ⁴⁹nu quixiella nú liunulla bee moso', nu acunulla nu hue>nullla bee unqui, ⁵⁰chequie riña patron'lla tucu bichia nú la ri'ililla elliebacu' nú riñalla, nu tucu hora nú la ri'illa beya', ⁵¹nu che chiqui' juerte dete' patron'lla castiya li'illa, nu xe'la patron'lla li'illa elu nzue bee bene enu necha rri'i. Elu una'lla nu acu layalla.

Ejemplu' chi'i bee una'a e'ne'

25 ¹Le'ca uni Jesuse stucu ejemplu lubee bene'nu: Para nú chu'u bene liñibe elurnibya' Diose, huaxi bee bene zeca tucu nú ulle'ca chi'i bee una'a e'ne' enu nuya' quinqué nzetsuquiee novio. ²Ayu' beenchu lá ri'i elliebacu' xi rqui'ña nu sayu' beenchu uri'i elliebacu' xi qui'ña. ³Bee enu lá ri'i elliebacu' xi qui'ña, unguya'tsia beenchu quinqué' beenchu pero né uya'lá beenchu aceite para nú chu'ulá liñi quinqué' beenchu, ⁴pero sayu' bee enu uri'i elliebacu' nú xi qui'ña, unguya' beenchu quinqué' beenchu nu le'ca unguya'lá beenchu aceite para nú chu'ulá liñi quinqué' beenchu. ⁵Nu lunú rle'e nú riña novio, una'tse cala' ye beenchu, nu uda'tse beenchu. ⁶Nu che tucu ulela' rula', ubene tucu chi nú juerte uni: "iNze'tala novio; uquia cha'caluhualla!" ⁷Che uzetee ye bee una'a ze'e, nu uquixie beenchu nú utsuche' beenchu quinqué' beenchu. ⁸Nu sayu' beenchu enu lá auya' aceite uni beenchu lu sayu' sa'beenchu enu nuya' tsíña aceite': "Ala' chiu'u arqui'hua uli'quihua lle'na aceite'hua chu'u liñi quinqué'ru, xne enta yalala quinqué'ru." ⁹Pero bee enu nuya' tsíña aceite ucuaqui: "La chiu'u arqui'ru liqui'rune, xne tunu liqui'rune la riqui'i ni' para li'ru nu ni' para li'ihua. Nzala nú uquiahua elu riquii nu ze'e tsihuane tsí'hua aceite'hua elu riquii." ¹⁰Pero diquila nú nze tsí beenchu aceite' beenchu, uriña novio. Che uyu'utsia

ayu' beenchu enu nucua'a tsíña lu eluchia, cuna novio, nu chu uyacu' ru'u puerta. ¹¹Luze'elá uriña sayu' bee una'a ze'e, nu uni beenchu: "iDetá, detá, ala' uxalá ru'u puerta chu'uru!" ¹²Pero ucuaquilla lubeenchu: "Nia luhua nú la xa'lane xne la chuluahua."

¹³Chequie uni Jesuse lubee bene ze'e:

—Ucua'a tsíñahua, xne la ri'ihua beya' xi bichia nu xi hora riña zeca Liá Bene enu uxe'lá Diose.

Ejemplu' dimi

(Lc. 19:11-27)

¹⁴Le'ca uni Jesuse stucu ejemplu lubee bene'nu: Elurnibya' Diose neca xi neca nú uri'i tucu bene enu nza istu, pero ante nú challa ubixiaxulla bee moso'lla para nú tsa'nalla dimi'lla lubeei.

¹⁵Lu tucu moso' ze'e udete'lla ayu' mili, nulu stucui udete'lla chiucu mili, nulu stucui udete'lla tucu mili. Scua udete'lla yabeee tucu nú aca cada tucua beei ri'inu beei berexe. Cheelá nzalla istu. ¹⁶Moso' enu uyucu ayu' mili bexu, uri'inui dimi cua' berexe nu uri'i ana se sayu' mili bexu mase. ¹⁷Le'ca scua uri'i moso' enu uyucu chiucu mili, uri'i berexe cuna dimi cua', nu uri'i ana se xiucu mili mase. ¹⁸Pero moso' enu uyucu tucu mili, uduche' a'chi'i dimi' patron ze'e liñi tucu i'chiu nú uda'ñii lu yuu.

¹⁹Chequie xee tiembu uya patrón' bee moso' cua', che ubenchila' zecalla nu uquixiella unacu'lla cuenta' dimi'lla. ²⁰Nu rlutila uya moso' enu uyucu ayu' mili lulla, nu udete' cuendai ayu' mili bexu'lla nu

cuna se sayu' mili bexu lli'ñine, che uni moso' ze'e lu patron'i: "Detá, li'ilu uliqui'lú ayu' mili bexu ya nu ngui se sayu' mili bexu lli'ñine nú uri'á ana dete cuenda yaalu." ²¹ Che uni patron'i lui: "Neca nze'ca nú uri'ilu, necalu tucu bene nze'ca. Nu uri'ilu tucu nú necane, nu lunú uri'ilu tucu nú necane lu lle'na nú uliquia lulu, nee tsa'nalá huaxilá nú tsa'na lulu. Uyu'u nu ñia utsu arqui' cuna li'á." ²² Chela uriña moso' enu uyucu chiucu mili bexu, nu uni lulla: "Detá, uliqui'lú chiucu mili bexu ya, nu ngui se xiucu mili bexu lli'ñine nú uri'á ana dete cuenda yalu." ²³ Che uni patron'i lui: "Neca nze'ca nú uri'ilu, necalu tucu bene nze'ca. Nu uri'ilu tucu nú necane nu lunú uri'ilu tucu nú necane lu lle'na nú uliquia lulu, nee tsa'nalá huaxilá nú tsa'na lulu. Uyu'u nu ñia utsu arqui' cuna li'á."

²⁴ Pero chenu uriña moso' enu uyucu tucu mili bexu, uni lu patron'i: "Detá, li'á nediyaa nú la lu'cu arqui'lú bee bene, nu riuculu ula'cu elu lá ri'ilu riña' nu rri'ilu ula'cu elu lá du'lú nii. ²⁵ Enze'e ulliquia, nu uya'a uduche' a'chia'a dimi'lú luyuu. Pero ngui dimi'lú dete cuenda nee." ²⁶ Che uni patron'i lui: "Necalú tucu moso' enu necha rri'i nu nebichiú. Tunu nediyaa'lú nú riucua'a ula'cu nú lá ri'á riña'lú nu rri'á ula'cu elu lá du'a nii, ²⁷ ¿xi que nú né du'lú dimia banco? Nu chenu benchila'a ayucua'a dimia cuna lli'ñine." ²⁸ Che uni patron ze'e lubee bene enu nucua'a ze'e: "Uxihua tucu mili bexu cua' ya benecua', nu ude'te'huane ya bene enu nzenela

chi'i mili bexu. ²⁹ Xne bene enu rlu'culane ati'la' nze'e huaxiláe, nu hasta nú lu'cu sobrallae, pero bene enu lle'natsia nú rlu'cu, hasta lu lle'na nú rlu'culla yetsu yalla. ³⁰ Nu moso' enu la zibi' quie', uluahuai eli'ya' elu necabe nzu, nu ze'e una'i nu acuxa' layai."

Chenu hualu Jesuse lu cuenda' ye bee bene iliulabe

³¹ Chenu nze'ta zeca Bene enu uxel'a Diose nze'tanu cuna poder nú rlu'cunu, nu cuna ye bee ángele'nu para nú zucunu lu xleta elu nibiya'nu. ³² Nu ye bee bene iliulabe yete'sa' lunu, nu huachunu beella letasa' beella, xi rri'i bene enu rriucu bee sanchi nú rluachulla sanchi leta bee chipa. ³³ Nu bee bene enu neca bee bene'nu cua'anu bee nze'e chube'nu nu bee bene enu laca bee bene'nu cua'anu bee nze'e chubeca'nu. ³⁴ Che li'inu enu neca arre ninu lubee bene enu nucua'a chube'nu: "Utehua yehua bee enu uri'l le'yala Pa liñibe. Nu uyu'uhua liñibe elu rnibiyaa'nu elu utsuche'lánu para li'ihua desde chenu uquixie iliulabe. ³⁵ Xne chenu ulia'naa uliqui'hua nú udacua, nu chenu ubichia uliqui'hua nú ungü'a, nu chenu unzea xi enze bene rene, uliqui'hua elu uya'naa. ³⁶ Nu chenu leca' xucua uliqui'hua xucua, nu chenu unga ritia ubet'a bi'yahua li'á, nu chenu ullutsea ni'cu' ubet'a bi'yahua li'á." ³⁷ Che ni bee bene enu uri'i nze'ca ze'e: "Detá, ¿xunga ulañi'ru nú ulia'na'lú nu uliqui'rú nú udaculu? Nu ¿xunga ulañi'ru nú ubichi'lú nu uliquiru nú ungü'e'lú?" ³⁸ Nu ¿xunga ulañi'ru nú unzelu xi unzée bene rene, nu uliqui'rú elu uya'nalu? nu ¿xunga

ulañi'ru nú leca' xuculu, nu uliqui'ru xuculu? ³⁹ ¿Nu xunga ulañi'ru nú ritilu nu ubela bi'yaru li'ilu?, nu ̄xunga ulañi'ru nú netselu ni'cu' nu ubela bi'yaru li'ilu?" ⁴⁰ Nu li'inu enu neca arre, cuaquinu nú ninu: "Li'á nia luhua nú ye nú uri'ihua elietsa lu tucu bee benea mase nú lecati neca nze'e, neca xi neca nú lua uri'ihua elietsa."

⁴¹ 'Che ninu lubee bene enu nucua'a chubeca: "Ulluna'hua lua, li'ihua enu necha uri'i, uquiahua lu quii nú leca xunga yala elu neca para beze'l u cuna bee ángel'e'i. ⁴² Xne chenu ulia'naa, né liqui'hua nú acua, nu chenu ubichia, né liqui'hua xi ahua'a; ⁴³ nu chenu unzea xi enzee tucu bene rene né liqui'hua elu aya'naa, nu chenu leca' xucua né liqui'hua xucua nu chenu ungaritia, nu le'ca ullutsea ni'cu' né ye'ta bi'yahua li'á." ⁴⁴ Chequie ni bee bene ze'e lunu: "Detá, ̄xunga ulañi'ru nú ulia'na'l u ubichi'l u, nu uya nzeelu xi enzee tucu bene rene, urre xunga ulañi'ru nú uzecala'cha'l u xuculu, urre ungaritilu, urre xunga ulañi'ru nú ullutselu ni'cu', nu ne ri'iru elietsa lulu?" ⁴⁵ Che cuaquinu lubee bene ze'e: "Li'á nia luhua, luye nú né ri'ihua para nú ari'ihua elietsa lubee benea mase nú lecati neca nze'e, le'ca neca xi neca nú lua né ri'ihua elietsa." ⁴⁶ Nu bee bene quie' chaa lu castiya nú leca xunga laxu, nu bee bene enu uri'i nze'ca lu'cu elu nehuañi nú leca xunga laxu liñibe.

Uri'i bee bene elliebacu' xa modo utibeei Jesuse

(Mr. 14:1-2; Lc. 22:1-2; Jn. 11:45-53)

26 Chenu ulaxu uni Jesuse scua lubee bene, che uninu lubee bene'nu:

² —Li'ihua neduya'hua nú xiucutsia bichia rri'i nú aca eliñi baxcu, nu li'á Bene enu uxe'la Diose dete' cuenda bene li'á lubee bene para nú quie'e beei li'á lu cruse.

³ Chequie bee ule'ya enu rnibiya' lubeelá bee ule'ya, cuna bee ulaxcuela enu reca ley nu cuna bee usticia' bee bene Israel, uyetes'a' beei ru'u ele'ya ni'l ule'ya Caifás enu rnibiya' lubeelá bee ule'ya. ⁴ Nu ze'e ubedichia' beei nú xa modo zequienu beei Jesuse para nú na'tse beei li'inu nú uti beei li'inu. ⁵ Pero unibeei lusa'beei:

—La ria'ahua scua diqui nú reca eliñi para nú la tsu reche bee bene.

Tucu una'a udu' perfume equie Jesuse

(Mr. 14:3-9; Jn. 12:1-8)

⁶ Chenu nzu Jesuse eyeche Betania, ni' Simón enu ri'chia bene leproso, ⁷ che uriña tucu una'a lunu nu nuya'nchu tucu frasco perfume nú chiqui' huaxi seca, nu udu'nchue equienu chenu nzucunu lu mexa. ⁸ Chenu ulañi' bee bene' Jesuse nucua', ulee beella nu unibeella lusa'beella:

—¿Xinu util'chianchu perfume cua' scua? ⁹ Ala' a'l aiqui perfumecua' para nú ri'inchu elietsa lubee bene enu seca elitsi.

¹⁰ Nu chenu ubene' Jesuse nú uni beella, che uninu:

—¿Xinu rlehua lu una'a quie'? Nu lunú uril'inchu lua neca nze'cae. ¹¹ Xne bee bene elitsí siempre nucua'a letahua, pero li'á la tsua siempre letahua. ¹² Nu lunú udu' una'a quie' perfume equiea, neca nucua' nú nzuche'la cuerpoa chenu

achi'a. ¹³Li'lá nia luhua nu catse lu iliulabe elu ixiule'e bee bene bedichia' nze'ca' Diose, le'ca nibee bene nú uri'ini una'a quie' li'lá, para nú ellu'cu arqui' bee bene li'inchu.

Udete' cuenda Judas Jesuse

(*Mr. 14:10-11; Lc. 22:3-6*)

¹⁴Che tucu lu chi'chiicu bee bene'nu enu lee Judas Iscariote, uya lubee ule'ya enu rnibiy'a lubeela bee ule'ya, ¹⁵nu uni Judas lubeela:

—¿Calu liqui'hua para nú dete cuendaa Jesuse luhua che?

Che udete'beella alallich'i melu plata yai. ¹⁶Nu desde bichia ze'e ucua'na Judas xneca modo dete' cuendai Jesuse lubeen ule'ya.

Último exee nú udacunu Jesuse bee bene'nu

(*Mr. 14:12-25; Lc. 22:7-23; Jn.
13:21-30; 1 Co. 11:23-26*)

¹⁷Bichia xee eliñi baxcu chenu racu bee bene Israel pa nú la chu'u levadura equie, che uyabica bee bene' Jesuse lunu, nu unibeella lunu:

—¿Cá niarqui'lu nú nzereche'ru nú da'cux'e'ahua reché baxcu?

¹⁸Chequie uninu lubeella:

—Uquiahu Jerusalén, nzucu tucu bene enu nihua lu: "Singue rni Maestro: Nze'ta riñala hora'nú, nu niarqui'nú nú acuxenunu bee bene'nu exee baxcu ni'lu."

¹⁹Che uri'i bee bene'nu tucu nú unibiya'nú nú ri'i beella, nu ureche' beella nú acuxee beella reché baxcu.

²⁰Chenu uyu'u rula', uzucu Jesuse lu mexa cuna chi'chiicu bee

bene'nu, ²¹nu diquila nú racuxee beella, uninu lubeella:

—Nia luhua nú tucuhua dete' cuenda li'lá para nú atia.

²²Che chiqui' nehuana utsu arqui'beella nu uquixie unedichia' tucua tucua beella lunu, nu unibeella lunu:

—Detá, ¿li'lá nze'e la?

²³Nu ucuaqui Jesuse lubeella:

—Enu se'e pa le'ca liñi pliato elu se'a pa nze'e neca enu dete' cuenda li'lá lubee bene enu uti li'lá. ²⁴Neli nú li'lá Bene enu uxel'a Diose, rqui'ña nú zecaa tucu nú rni lu ichi' Stichia' Diose; pero icue' bene enu dete' cuenda li'lá! Máse neca nze'ca lu cuenda' bene ze'e nú né alaxulla.

²⁵Chequie Judas enu dete' cuenda li'inu, uni lunu:

—Maestro, ¿li'lá nze'e la?

Che uni Jesuse lui:

—Ahua', li'ilu nze'e.

²⁶Diquila nú racu beella, una'tse Jesuse tucu pa nu udete'nu che'tsa lu Diose, nu chu ule'nu pa ze'e udete'nu ya beella, nu uninu lubeella:

—Udacuhua pa quie', ningui'e neca cuerpoa.

²⁷Che chu una'tsenu tucu copa biñu, nu udete'nu che'tsa lu Diose nu chu udete'nu copa cua' ya beella, nu uninu lubeella:

—Uhue' yehua biñu quie', ²⁸xne neca nucua' renea nú ri'chia chenu atia para nú tsila'a huaxi bee bene iliulabe, xne equie cuenda' nú atia ya'la tucu inziu cuqui nú ri'i Diose perdonna stula bee bene. ²⁹Pero nia luhua nú la hua'a biñu nú necache'e uva ni' stucu bese, hasta bichia nú hua'anuahua biñu cuqui liñibe elurnibiya' Diose.

Udixiule'e Jesuse nú ni Pedro nú la chululla li'inu

(*Mr. 14:26-31; Lc. 22:31-34; Jn. 13:36-38*)

30Chenu ulaxu ungula beella canto lu Diose, che chu nzuebeella dañi nú lee Olivos. **31**Che uni Jesuse lubeella:

—Yehua tsana' arqui'hua li'á rula' quie', tucu nú rni lu ichi' Stichia' Diose elu rni: “Utia bene enu rriucu bee sanchi, nu ri'chialestse beeíí.”

32Pero chenu huañi zecaa, rlutilaa nza'a Galilea, cheelá riñahua ze'e.

33Chequie uni Pedro lu Jesuse:

—Añinzuca nú tsana' arqui' yebeella li'ilu. Pero li'á la tsana arquia li'ilu.

34Che uni Jesuse lu Pedro:

—Nia lulu nú nee rula' quie' ante núa bixia tiula, unilalu chuna bese núa chululu li'á.

35Pero uni Pedro lunu:

—Mase nú atia cuna li'ilu, la cachia nú nu'lua li'ilu.

Nu le'ca scua uni ye beelá bee bene'nu lunu.

Unacu' Jesuse lu Diose tucu luhuare elu lee Getsemaní

(*Mr. 14:32-42; Lc. 22:39-46*)

36Che uriña Jesuse cuna bee bene'nu tucu luhuare nú lee Getsemaní, nu uninu lubeella:

—Ucua'ahua ca'a, diquila nú nzenacua lu Diose inchiu'.

37Che chu nzenunu Pedro cuna rucu lliana' Zebedeo, nu uquixie nú chiqui' nehuana nzu arqui'nu hasta núa lixiua' nzu arqui'nu, **38**nu uninu lubeella:

—Chiqui' nehuana nzu arquia hasta núa se'ca núa atia, ya'nasca'hua ca'a, nu ucua'a naahua cuna li'á.

39Che chu nza Jesuse lle'na enza lu ze'elá, nu utsu lliquinu hasta núa uti'nu tequieru lu yuu, nu unacu'nu lu Diose núa uninu:

—Paa, tunu nu' modo utsila'a li'á lunú nehuana enta zecaa, pero la acatsia tucu núa niarquia, acatsia tucu núa niarqui'lu.

40Chenu ubenchila' zecanu elu nucua'a bee bene'nu, ulluna'nu beella núa ra'tse beella, nu uninu lu Pedro:

—¿Xie' lá riqui'hua acua'anahua masia tucu hora cuna li'á la?

41Ucua'a nahua nu una'cuahua lu Diose para núa la ri'li beze'lu ana luhua. Xne li'isihua chiqui' nu' ana arqui'hua núa ri'ihua tucu núa neca nze'ca, pero la riqui' cuerpo'hua.

42Bese rrucu núa uya na'cunu lu Diose uninu:

—Paa, tunu leca modo nu la zeca lunú nehuana nzu núa zecaa, acatsia tucu núa niarqui'lu che.

43Chenu ubenchila' zecanu elu nucua'a beella, ulañi'nu núa ra'tsea'la beella stucu bese xne urí'i cala' ana lubeella. **44**Nu utsa'nanu beella ze'e nu uya na'cu'nu lu Diose bese rriuna cuna bee bedichia' núa unilamu. **45**Chenu ubenchila'nu elu nucua'a beella, uninu lubeella:

—¿Xie' ra'tsesca'hua nu sulachisca'hua la? Nu li'á Bene enu uxel'a Diose, uriñala hora núa dete' cuenda bene li'á lubee bene enu necha rri'i. **46**Uzetehua ne cha'ahua nee, xne axula nze'ta enu dete' cuenda li'á.

Una'tse bee bene Jesuse

(*Mr. 14:43-50; Lc. 22:47-53; Jn. 18:2-11*)

47Rdichia'nusca' Jesuse bee bene'nu chenu uriña Judas, enu

neca tucu lu chi'chiucu bee bene'nu, urinayui huaxi bee bene enu nuya' espada cuna acarute lunu. Nu una'tse beei Jesuse xne unibiya'la bee ule'ya enu rnibiy'a lubeela bee ule'ya cuna bee usticia Israel nú acane scua. ⁴⁸Nu Judas enu udete' cuenda Jesuse unilai lubee bene ze'e xa ri'i chenu dete' cuendai li'inu, nu uni lubeella:

—Nee enu acua bichiu' xeca, nze'ella nu nze'e na'tsehua.

⁴⁹Chequie chenu uriña Judas ze'e uya bicai lunu nu uni:

—iMalune, Maestro! Nu chu udacui bichiu' xecanu.

⁵⁰Che uni Jesuse lu Judas:

—Amigo, urí'i lunú nze'talu ri'ilu.

Che chu una'tse bee bene ze'e Jesuse para nú uya' beei li'inu.

⁵¹Che tucu bee bene enu nzunu Jesuse ze'e uhua espada' nu uchiec'u'lла tucu diaca moso' ule'ya enu rnibiy'a lubeel ule'ya. ⁵²Chequie uni Jesuse lulla:

—Udu'che' espada'l'u xne ye bee bene enu rri'i xu cuna espada, le'ca cuna espada atilla. ⁵³¿Xie' la ri'ilu beya' nú nu' modo nacua lu Paa liñibe, nu chu xe'l'anu huaxi mili bee ángele'nu enu ri'i elietsa lua la?

⁵⁴Pero tunu ri'á scua, ¿xneca modo yalu tucu nú nequie lu ichi' Stichia' Diose elu rni nú scua riala zecaa?

⁵⁵Che chu uninu lubeel bene ze'e: —¿Xinu nze'tahua cuna espada nu cuna acarute para nú uya'hua li'á xi neca tucu huana? Ye ye'e nzua letahua uzeteahua Stichia' Diose liñi indu llene Jerusalén, nu né na'tsehua li'á. ⁵⁶Pero ye bee nucua' unga para nú yalu tucu nú nequie lu ichi' Stichia' Diose nú uquie'e bee profeta.

Chequie ye bee bene'nu utsana' arqui'beella li'inu nu uyecaxu'u beella nzuebeella.

Nzu Jesuse lubee usticia

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷Che bee bene enu una'tse Jesuse unguaya' beei li'inu ni'i Caifás, ule'ya enu rnibiy'a luye bee ule'ya, ze'e neyete'sa' bee ulaxcuela enu reca ley cuna bee usticia' bee bene Israel. ⁵⁸Nu istu istu nzequie Pedro Jesuse hasta ru'u ni'i ule'ya ze'e, nu chenu uriña Pedro ru'u ni'i ule'ya ze'e uzuculla leta bee bene enu rriicu ze'e para nú lañi'lla xi ri'inu bee benecua' Jesuse.

⁵⁹Chequie bee ule'ya enu rnibiy'a lubeel ule'ya, nu cuna ye bee usticia ucua'na beella xa modo ta' beella eluquichia' Jesuse para nú atinu.

⁶⁰Pero lá llela' beella xi eluquichia' ata' beella li'inu añinzuka nú huaxi bee bene uni nú la neli contra li'inu, che luze'elá uriña xiucu bene enu le'ca uni nú la neli contra li'inu, ⁶¹nu unibeei:

—Benequie' uni: “Li'á aca chila indu' Diose nu reche' zecane lu chunatsia bichia.”

⁶²Chequie utsuli ule'ya enu rnibiy'a lu ye bee ule'ya nu unilla lu Jesuse:

—¿Xiquie nú lecalí xi cuaqilu?

¿Xi nucua' rnibeei lu cuenda'l'u?

⁶³Pero lecalí xi uquaqui Jesuse. Che uni ule'ya ze'e lunu:

—Equie cuenda' Diose enu nehuañi, uni'i nú neli neca lua tunu li'ilu necalu Cristo li'lñi Diose.

⁶⁴Che uquaqui Jesuse nú uninu:

—Li'á nze'e. Nu le'ca nia luhua nú lañi'hua li'á Bene enu uxel'a

Diose nú nzucua'a cue'tsenu chúbe, li'inu enu rlu'cu ye poder, nu le'ca lañi'hua nú nzela liñi xcabe enza liñibe.

65 Chenu ubene' ule'ya ze'e nucua' che utsalla xuculla, nu unilla:

—Lu Diose rni nucua' bedichia' nú necha neca, ¿xinu la'na'lá'ahua testigo? Li'ihua ubene'lá'hua bee bedichia' nú necha neca uni nucua' lu Diose. **66** ¿Xa nihua nee?

Che ucuaqui bee bene ze'e nú unibeei:

—Riala nú ati nucua'.

67 Che utsuxene beei lunu nu udiñi beei li'inu, nu nu' beei enu udichiee lunu. **68** Nu unibeei lunu:

—Tunu li'ilu necalu Cristo, iuni' ti udiñi li'ilu!

Uni Pedro nú la chululla Jesuse

(Mc. 14:66-72; Lc. 22:56-62; Jn. 18:15-18, 25-27)

69 Díquila nú nzucu Pedro ru'u eli'ya' ni'i ule'ya ze'e, che uyabica tucu criada' ule'ya ze'e lu Pedro, nu uninchu lulla:

—Se'ca nú le'ca nuulu enzenuulu Jesuse enu neca bene lu iliu Galilea.

70 Pero utsacu' arqui' Pedro nú nu'lulla Jesuse lubee bene ze'e, nu unilla:

—La ri'á beya xi rniliu.

71 Che chu nza Pedro enza ru'u puerta eli'ya' ze'e, nu ze'e ulañi' stucu criada li'illa nu uninchu lubee bene enu nucua'a ze'e:

—Le'ca nuu benecua' enzenu Jesuse bene eyeche Nazaret.

72 Chequie utsacu' arqui' zeca Pedro stucu bese nú la chululla Jesuse, nu uquie'ella Diose nú unilla:

—La chulua benecua'.

73 Nu luze'etsia bee bene enu nucua'a ze'e uyabica beei lu Pedro, nu unibeei lu Pedro:

—Ache nze'ca rlube' nú necalu tucu bene' bene cua', xne rdichia'lú tucu nú rdichia' beei.

74 Pero utsuta! Pedro nú unilla:

—Dete! Diose castiya li'á tunu la nia nú neli neca la chulua bene cua'.

Nu che hora ze'e ubixia tucu tiula.

75 Che ullu'cu' arqui' Pedro lunú uni Jesuse lulla: “Ante nú bixia tiula unilálu chuna bese nú la chululu li'á.” Che chu uchiu'u Pedro ru'u eli'ya' ze'e nu chiqui' unguna'lla nú nehuana nzu arqui'lla.

Uyayu bee bene Jesuse lu Pilato

(Mr. 15:1; Lc. 23:1-2; Jn. 18:28-32)

27 Chenu uye'e lu yuu, uyetesá' ye bee ule'ya enu rnibiya' lubee ule'ya cuna bee usticia Israel nu unga tucu necatse stichia' beella nú xa modo ri'i beella para nú ati Jesuse. **2** Che ullica'cu beella Jesuse unguaya' beella lu gobernador Poncio Pilato.

Xa unguti Judas

3 Nu Judas enu udete' cuenda Jesuse, chenu ulañi'i nú necala nú atinu chiqui' necha ulle'cai, nu uya de'te cuenda zecai ala llichi'i melu plata lubee ule'ya enu rnibiya', cuna lubee usticia Israel, **4** nu uni lubeea:

—Uri'á dula xne udete cuendaa tucu bene enu lecaxi uri'i para nú ati.

Nu ucuaqui beella lu Judas:

—¿La biya'ru enze'e? ¡Necatsiahua' cuenda'lú!

5 Chequie uya utsi'qui Judas bee melu ze'e liñi indu llene Jerusalén, nu chu uya tsí'i añii nu ungutii.

6 Che uquiete'sa! bee ule'ya enu rnibiya! bee melo ze'e, nu uni beella lusa' beella:

—Leca modo dua'ahua melu quie' liñi alcancía elu nu' dimi u'na, xne necane melo nú uyaxu nú ati tucu bene.

7 Che chu unga tucu necatse stichia' beella nú tsi beella tucu yuu elu rlua bee bene yuu nú recache' exqui'ñia cuna dimi ze'e, para nú aca ze'e pandiuñi elu achi' bee bene rene. **8** Enze'e hasta nee lee yuu ze'e, yuu rene. **9** Scua uyalu tucu nú uni profeta Jeremías chenu unilla: “Uyucu bee bene ala llichi'i melo plata (precio nú uni bee bene Israel nú secanu), **10** nu cuna melo cua' utsi beella tucu yuu elu rlua bene yuu nú recache'e exqui'ñia, tucu nú uni Diose lua nú acane.”

Unedichia' Pilato lu Jesuse

(*Mr. 15:2-5; Lc. 23:3-5; Jn. 18:33-38*)

11 Chenu uyayu bee bene Jesuse lu gobernador Poncio Pilato, che unedichia'lla lu Jesuse, nú unilla:

—¿Li'ilu necalú arre! bee bene Israel la?

Che uni Jesuse lulla:

—Ahua!, tucu nú unilu scua necane.

12 Nu chenu rta'quiya bee ule'ya enu rnibiya! lubee ule'ya cuna bee usticia' bee bene Israel li'inu, lecalí xi ucuaquinu. **13** Che uni Pilato lunu:

—¿Xie' la yene'lu ye beenú rni cundra bee benecua' lu cuenda'lu la?

14 Pero ni' tucu bedichia' né cuaqui Jesuse lu pilato, che chiqui' nzenu arqui'lla.

Unibiya' bee bene nú ati Jesuse

(*Mr. 15:6-20; Lc. 23:13-25; Jn. 18:38-19:16*)

15 Nu bee bichia ze'e reca eliñi baxcu neca costumbre! Poncio Pilato nú rla'alla tucu bene enu nchiñi ni'cu', tatse tucu bene enu nacu' bee bene nu la'a. **16** Le'ca bee bichia ze'e nchiñi tucu bene enu lee Barrabás ni'cu', nu ye bee luhuare nediyala' bee bene ti necalla. **17** Nu chenu neyete'sa'la bee bene ze'e, unedichia' Pilato lubeella nú unilla:

—¿Ta bene enu niarqui'hua nú la'a: Barrabás la?,urre ¿Jesuse enu rni bee bene nú neca Cristo la?

18 Uni Pilato scua xne uri'illa beya' nú equie nú riatsia arqui'beella enze'e udete' cuenda beella Jesuse lulla.

19 Chenu uzucu Pilato elu rnibiya'lla nu rlualulla lu cuenda' Jesuse, uriña tucu resuna' una'alla lulla nú uninchu lulla: “La ri'chialu benecua' xne lecaxi equiya rlu'culla, xne necha uni xcala'a rula' quie' lu cuenda'lla.”

20 Pero bee ule'ya enu rnibiya' lubeelá bee ule'ya cuna bee usticia' bee bene Israel udu' beella arqui' bee bene enu nucua'a ze'e nú nacu' beei lu Pilato nú la'alla Barrabás, nu ati Jesuse. **21** Chequie unia'la Pilato lubeei:

—¿Ta lu rucu beella niarqui'hua nú la'a che?

Che uni bee bene ze'e lulla:

—Ula'a Barrabás.

22 Nu uni Pilato lubeella:

—¿Nu xi ri'linua Jesuse enu rni bee
bene nú neca Cristo?

Che uni ye beella:

—iUquie'e nucua' lu cruse!

23 Nu uni Pilato lubeella:

—Pero ¿xi nú necha neca uri'illa?

Che stucua'la urixialibeella nú
uni beella:

—iUquie'e nucua' lu cruse!

24 Chenu uri'i Pilato beya' nú
laria'lla ana tsulla lubee bene ze'e
sino que maselá rixialibeei, che
unibiya'lla nú ye'tayu tucu bene
inza, nu unalla ante lu ye bee bene
ze'e, nú unilla:

—Lecaxi culpaa nú ati bene cua',
necatsia nucua' cuenda'hua.

25 Che uni ye bee bene ze'e lu
Pilato:

—iNeca nucua' culpa'ru cuna bee
lli'ñiru, nú ati benecua!

26 Chequie ula'a Pilato Barrabás,
nu chu unibiya'lla nú zete'che'
bee sundado Jesuse, nu udete'
cuendalla li'linu lubee sundado para
nú quie'e beei li'linu lu cruse.

27 Che unguya' bee sundado ze'e
Jesuse liñi palacio' gobernador, elu
uyetesa' ye beei lunu. **28** Che ulua
beei xucunu, nu ungutu beei li'linu
tucu laquie neluu, **29** nu ureche'e
beei tucu ellu'ñi nú necache' eche
uzucu' beei equieno, le'ca uzucu'
beei tucu bara yanu chube. Che
chu utsulliqui beei lunu nu xitse
uri'chia beei li'linu nú unibeei lunu:
—iHuañi arre' bee bene Israel!

30 Nu le'ca utsuxene beei lunu, nu
mismo bara nú udete' beei yanu
unguxi beei yanu udu'beei equieno.

31 Chenu ulaxu nú xitse uri'linu beei
li'linu, ulua zeca beei laquie neluu
nú ungutu beei li'linu, nu ungutu

zeca beei nú necaca xucunu li'linu.
Che unguya' beei li'linu para nú
quie'e beei li'linu lu cruse.

Uquie'e beei Jesuse lu cruse

(Mr. 15:21-32; Lc. 23:26-43; Jn. 19:17-27)

32 Chenu nzenu beei Jesuse nú
quienu lu cruse ulla'ca beei tucu
bene eyeche Cirene, enu lee Simón,
che unibiya' bee sundado ze'e lulla
nú uya'lla cruse' Jesuse.

33 Nu chenu uriña beei tucu
luhuare nú lee Gólgota, nu rni
nucua' Lluca equie bene nguti.

34 Ze'e udete' beei biñu nú nucha
inza nú nelá güe'nú, pero chenu
util'ñia'nue, né zelanu agüe'nue.

35 Chenu ulaxu nú uquie'e bee
sundado ze'e Jesuse lu cruse, urita
beei tucu rifa equie xucunu para
nú ritsi'beei xucunu lu sa'beei. Scua
uyalu tucu nú uquie'e tucu profeta
lu ichi' Stichia' Diose elu rni: "Ita
bee sundado tucu rifa equie xucua
bi'ya ta beei ri'i anae." **36** Che chu
ucua'a beei ze'e para nú ri'iucu
beei li'linu. **37** Nu equie cruse'nú
uquie'e beei tucu letrero nú rni
xinu uquie'e beei li'linu lu cruse.
Nu letrero ze'e rni: "Neca ningui'e
Jesuse arre' bee bene Israel."

38 Le'ca uquie'e bee sundado ze'e
chiucu huana' lu tucua cruse, tucu
nze'e cue'tsenu chube nu stucu nze'e
cue'tsenu chubeca. **39** Nu bee bene
enu udete lunu ze'e, uri'qui equie
beei nu rnibeei bee bedichia' nú
necha neca lunu, **40** nu rnibeei lunu:

—Manú unilu nú chilalu indu
llene Jerusalén nulu chunatsia
bichia reche' zecalue, utsila'a li'ilu
nee. Tunu neli'ilu nú necalu lli'ñi
Diose, ulaca lu cruse cua!

41 Le'ca scua bee ule'ya enu rnibiyá! lubeelá bee ule'ya cuna bee ulaxcuela enu reca ley, cuna bee fariseo nu cuna bee usticia Israel, uni beella huaxi bee bedichia' nú necha neca lunu, nu unibeella lusa'beella:

42 —Utsila'a nucua' bee bene, pero laca nucua' tsila'a nucua' li'i nucua'. Tunu neca nucua' arre! bee bene Israel, chu laca nucua' lu cruse nu che chili arquia'ahua nucua'.

43 Nzelí arqui' nucua' Diose, nee tsila'a Diose nucua' tunu secanu nucua', xne rni nucua' nú neca nucua' lli'ñi Diose.

44 Nu hasta bee huana' enu nequie lu stucu cruse cue'tsenu unibeei bee bedichia' nú necha neca lunu.

Chenu unguti Jesuse

(Mr. 15:33-41; Lc. 23:44-49; Jn. 19:28-30)

45 Chenu unga rrebichia ucabelí diquineca lu iliulabe, hasta rquie chuna uche. **46** Nu rquie chuna uche ze'e, urixiali Jesuse nu uninu:

—Elí, Elí, ¿llama sabactani?, rni bedichia' cua': Diosea, Diosea, ¿xinu utsana! arqui'lú li'á?

47 Chenu ubene' bee bene enu nucua'a ze'e nú uninu scua, che unibeei lusa'bee:

—A'a rixialla profeta Elías.

48 Che chu uyaxu'u tucu beeí nu ucuacha nze'e tucu esponja lu inza vinagre, nu uzucu'lí lli'i tucu ixí', nu util'i esponja cua' ru'u Jesuse para nú güe'nu inza vinagre cua'. **49** Pero texcua'a beeí enu nucua'a ze'e uni:

—La ri'inululla scua bi'ya se nze'ta Elías tsila'a li'illa.

50 Che juerte urixiali Jesuse stucu bese, nu chu ungutinu.

51 Chequie hora ze'e utsa cortina llene nú nzi'quinala liñi indu llene Jerusalén, nu utsa arli'tillune hasta aya nu hasta aquié. Nu unga xuú lu iliulabe nu ule'e bee quielaa, **52** nu uya'la bee eluhua nu uhuañi zeca huaxi bee bene enu nzeli arqui' Diose, bee enu unguti. **53** Che uchiu'u beella liñi eluhua lulá nú uhuañi Jesuse, nu uyu'u beella Jerusalén. Nu ze'e ulañi' huaxi bee bene li'ibeella.

54 Che capitán cuna beelá bee sundadu'lla enu rriucu Jesuse, chenu ulañi' beella nú reca xú nu cuna ye beenú reca, chiqui' ulliqui beella nu unibeella lusa' beella:

—iNeli nú neca benequie' Lli'ñi Diose!

55 Nu huaxi bee una'a enu uyaquie Jesuse desde Galilea enu uri'i elietsa lunu nucua'a beenchu istu ze'e ri'ya beenchu lunú reca.

56 Leta bee una'a quie' nzu María Magdalena, cuna María na' Jacobo nu José, nu cuna na' bee lliana' Zebedeo.

Chenu uhuachi' Jesuse

(Mr. 15:42-47; Lc. 23:50-56; Jn. 19:38-42)

57 Chenu uyu'u rula', uriña tucu bene xene enu lee José, necalla bene eyeche Arimatea, nu le'ca uyanzenullu Jesuse. **58** Nu uyalla lu Pilato uyana'culla cuerpo' Jesuse. Che unibiya' Pilato nú dete' cuenda bee sundado cuerpo' Jesuse lulla,

59 nu chu una'tsellu cuerpo' Jesuse nu utelallanu tucu sábana nú lecaxi naa **60** nu che uya ca'chi'lla cuerpo' Jesuse liñi tucu eluhua cuqui nú neca stene'lla, nú uda'ñilla liñi tucu quielaa, nu utsacu'lla tucu

quiee llene ru'u eluhua ze'e nu chu nzialla. ⁶¹Ru'u eluhua ze'e nzucu María enu neca bene eyeche Magdalena cuna stucu María.

Uriucu bee sundado ru'u eluhua' Jesuse

⁶²Chenu uye'e lu yuu bichia nú sulachi bee bene uya bee ule'ya enu rnibiyá' lubee ule'ya cuna bee fariseo lu Pilato, ⁶³nu uni beella lu Pilato:

—Detá, nchiucu' arqui'ru nú chenu nehuañisca' bene enu nequichia' cua', uni nucua' nú detetsia chuna bichia huañizeca nucua' lu eluti. ⁶⁴Enze'e unibiyá' nú aca ucu ru'u eluhua cua' hasta nú za' chuna bichia para nú la cha bee bene' nucua' rula' che cachi' cuerpo' nucua', nu ni bee bene' nucua' lubee bene nú uhuañi zeca nucua' stucu bese. Xne tunu ri'i bee bene' nucua' scua che masesca'lá aca llene eluquichia' cua' luquelá eluquichia' nú uni nucua' rluti.

⁶⁵Che chu uni Pilato lubeella:

—Nucua'acua bee sundado. Para nú ri'i ucue. Uya'hua beeí nu utsa'cuta'hua ru'u eluhua ze'e.

⁶⁶Che nzuebeella, nu utsacu'ta' beella ru'u eluhua ze'e, nu chu utsa'na beella bee sundado rriucue.

Chenu uhuañi zeca Jesuse nú ungutinu

(*Mr. 16:1-8; Lc. 24:1-12; Jn. 20:1-10*)

28 Chenu udete bichia nú sulachi bee bene, nu chenu uye'e lu yuu zila' domingo. Che uyabi'ya María Magdalena cuna stucu María ru'u eluhua' Jesuse. ²Che tu'natsia unga tucu xú nú

juerte, xne ulaca tucu ángele' Diose enza liñibe nu uyabica ángele ze'e ru'u eluhua nu uyucunu quiee nú nacu' ru'u eluhua ze'e, nu uzucunu equiee, ³nu rulu siqui' ángele ze'e xi rulusiqui' lee chenu ria'lane, nu xucunu niquichiu a'quie'e xi nequichi iqui. ⁴Chenu ulañi' bee sundado enu rriucu ru'u eluhua ze'e ángele cua', chiqui' unga tse'tse' beeí nú ulliqui beeí, nu uzana' beeí lu yuu xi uzana' benenguti. ⁵Che uni ángele cua' lubee una'a cua':

—La lliquihua. Li'á nediyaa nú rla'nahua Jesuse, enu uquie lu cruse. ⁶Pero leca'nú ca'a, xne uhuañi zecanu lu eluti tucu nú uninu. Utebi'yacuruhua elu uricu cuerpo'nu ne lañi'hua, ⁷nu nee chu uquia tixiule'exuhua lubee bene'nu: “Nú uhuañi zecanu lu eluti, nu rlutilánu nzanu lu iliu Galilea, luquela li'ihua nu ze'e lañi'huanu.” Nucua'tsia neca nú rixiule'a luhua.

⁸Chequie uchiu'u beella ru'u eluhua ze'e, nu xexu'u beella nzuelia nzetixiule'e beella lubee bene'nu. Diquitse xiqui beella nu le'ca ñia nzu arqui'beella. ⁹Chenu nzuebeella ulube'lú Jesuse lubeella inziu nu uninu lubeella. Che uyabica beella lunu nu ulu'cu beella ula'na lunu, nu uchi'chi beella cuchiu'nu, ¹⁰nu uninu lubeella:

—La lliquihua. Uquia tixiule'ehua lubee benea nú cha beella lu iliu Galilea, nu ze'e lañi' beella li'á.

Lunú uni bee sundado

¹¹Diquila nú nzubee bee una'a ze'e, le'ca nzubee chiucu chuna bee sundado eyeche ze'e nzetixiule'e beeí lubee ule'ya enu rnibiyá' lubeelá bee ule'ya

luye nú unga. ¹²Che bee ule'ya enu rnibiya' cua' uyabedichia'nu beei bee usticia' bee bene Israel para nú tucu ricuche'tse stichia' beella, nú xi ri'i beella nu che udete' beella huaxi dimi ya bee sundado, ¹³nu uni beella lubee sundado ze'e:

—Uni'tsiahua nú rula' chenu ra'tsehua ube'ta bee bene' Jesuse ucachí' cuerpo'nu. ¹⁴Che tunu acabiya' gobernador nucua!, li'icaru niru lulla para nú lecaxi ri'inulla li'ihua.

¹⁵Che una'tse bee sundado dimi, nu urí'i beei tucu nú unibeella lubeei nú ri'i beei. Nu eluquichia' cua' nzeli arqui' bee bene Israel hasta bichia quie!

Lunú unibiya' Jesuse nú ri'i bee bene'nu

(*Mr. 16:14-18; Lc. 24:36-49; Jn. 20:19-23*)

¹⁶Che nzubee ye chetu'cu bee bene' Jesuse lu iliu Galilea, equie

dañi elu unilanu lubeella nú chue beella. ¹⁷Nu chenu ulañi' beella Jesuse ulu'cu beella ula'na lunu, añinzuka nú nu' beella la chili arqui' nú necanu Jesuse. ¹⁸Che uyabica Jesuse lubeella nu uninu lubeella:

—Uliqui' Diose ye poder lua para nú nibiya'a liñibe cuna luyuu iliulabe. ¹⁹Enze'e uquiahuá diqui lu iliulabe uze'te'hua bee bene stichia'a para nú aca beei bee benea. Nu urinzahua beei equie nú lee Pa liñibe, cuna equie cuenda' lli'ñinu nu cuna equie cuenda' Espíritu Santo, ²⁰nu uze'te'hua bee bene nú zucu' beei ye nú unilaa luhua. Nu nia luhua nú ye bee bichia nzua cuna li'ihua, hasta chenu laxu iliulabe.

Amén.